

Ekwo Jiobu

Akọ ẹhu Jiobu

¹ O nweru onye alì Uzu lanu; teke o shi nọdu be ẹpha iya bu Jiobu. Nwoke obu bu nwoke, uta adudu le ndzu iya bya aburu onye pfuberekoto. O bu onye atsuhuje Chileke ebvu haa eme ejomeme. ² Iphe, o nwutaru bu unwoke esaa waa unwanyi eto. ³ O nwekwarupho eku. Aturu iya du unu iri l'esaa l'ukporo iri. Inya-kamelu iya du unu esaa l'ukporo iri. Eswi, a turu njigba ebo ebo du unu njigbabe eswi ugbo labo l'ukporo ise. Ne nkapfu-igara iya du unu l'ukporo ise. Ndu bu nemadzu, ejeru Jiobu ozi kwatakpo du igwerigwe mebyikpo. O buepho l'oo ya bu onye shi kakota shii l'iphe, bukpo nemadzu, a nwuru anwunwu l'uzo enyanwu-awawa l'ophu.

⁴ Unwu iya ndu ophu bu nwoke nodu aboje obo-iphe l'ibe phe. Onye owa-a -bo ogiya; ogiya ozo onye ozo abo; ephe -nodu abo obo-iphe obu; ephe ezia unwune phe ndu ophu bu unwanyi pho ephe n'eto; ephe abya le nri ono. ⁵ O nodu abujeru; a -bochaa iphe ono teke ephe abo iya; Jiobu ekua phe bya edoo phe nsọ. Nchita-abohu iya l'o bya egweeru Chileke ngweja-akpo-oku l'iswi ehu phe l'ehu l'ehu. Kele orije su: “?A maru ?unwu iya te eme adaru nu iphe-iji? ?A maru ?ephe te egudeadanu obu phe

koo Chileke onu?" O buru nno bu ge Jiobu shi emeje iya tekenteke.

Nsetanu ahu Jiobu ama

⁶ Obenu ujiku lanu; unwu Chileke bya g'ephe goshi onwophe l'iphu Chipfu. Nsetanu tsokwaru phe pho bya. ⁷ Chipfu su Nsetanu: "Bu awe be i shi bya?"

Nsetanu su Chipfu: "Mu ejenupho ejeje alwa alwalwa l'eliphe. Mu tsonurupho oma mgboko aghaphe botorii."

⁸ Chipfu su Nsetanu: "Enya tsuru ngu l'eka onye-ozu mu, bu Jiobu no? Mbụ l'o to duedu nemadzụ, dū g'oo ya le mgboko l'opfu. O bu nwoke, p̄fuberekoto bya aburu onye uta adudu le ndzu iya; buru onye atsuhuje Chileke ebvu; haa eme ejo-ememe."

⁹ Tobudu iya bu; Nsetanu bya eyeeru Chileke onu su iya: "Iipfu to? Jiobu nonyaerupho tsuhaha gube Chileke ebvu? ¹⁰ Tobudu ngu kporu okpokuu kpo-pee yele ndibe iya mgburugburu; mekpoo iphemiphe, o nweru? Iphemiphe, oome l'eka be i meru; o buru upete; k'opfu bu l'eku iya tukoru ekameka. ¹¹ Machinaa eka nta-a denyi l'iphemiphe, o nweru enweru g'ihuma l'oo-pfuru l'atatiphu ngu koo ngu onu."

¹² Tobudu iya bu; Chipfu sunu Nsetanu: "O du ree; iphemiphe, o nweru duwaa ngu l'eka; oo ephe ge mkpushi-eka ngu te erwu iya l'ehu."

Nsetanu kwoephe gburumu; o bueru iya pho eshi l'iphu Chipfu l'eka ono tugbua.

13 Tọbudu iya bụ; o be ujiku lanụ; ụnwu Jiobu ndu kẹ nwoke mẹ ndu kẹ nwanyi dzukọbe l'ulo ọkpara nna phẹ kẹ nwoke abọ iphe; eri nri; angụ mẹ. 14 Onye-ozị bụerupho phẹreketeteke l'iphu Jiobu bya asụ iya: “Oke-eswi, eegudeje eje ozi ẹgu bẹ e gudegbaa eje ozi ẹgu; nkapfụ-igara dọkwarupho l'agụga ẹka ono ata nri. 15 Ndu Sheba fọaru phẹ; bya atụko phẹ rwuta; bya egbushia ndu ejeru ngu ozi. Ọ bụru mbedua kpoloko bụ onye gbalaru nụ sụ gẹ mu bya epfuaru ngu g'ọda.”

16 Onye k'ono kpụkwaduru-a opfu l'ọnu epfu; onye ọzo kwobata bya asụ: “Ọku, shi l'ẹka Chileke bẹ shiẹpho l'igwe daa bya atụko aturu ngu l'ophu kee; kechaa kee ndu-ozị ngu kefu; ọ bụru mbedua kpoloko bụ onye gbalaru nụ sụ gẹ mu bya epfuaru ngu g'ọda.”

17 Onye k'ono kpụkwaduru-a opfu l'ọnu epfu; onye ọzo kwobata bya asụ: “Ndu ọ-lwua-ọlaa, shi lẹ Babilonu buru ọgbo ẹto tua lẹ mkpa lẹ mkpa bya awụpyabe inya-kamelu ngu g'ọ ha rwuta; bya egude ogu-echi gbugbushia ndu ejeru ngu ozi. Ọ bụru mbedua kpoloko bụ onye gbalaru nụ sụ gẹ mu bya epfuaru ngu g'ọda.”

18 Onye k'ono kpụkwaduru-a opfu l'ọnu epfu; onye ọzo kwobata bya asụ: “Ụnwu ngu unwoke mẹ ụnwu ngu ụnwanyi dọkwaru abọ iphe; eri nri angụ mẹ l'ibe nwune phẹ nwoke k'ogeranya. 19 A bya ele ẹnya; oke phẹrephere shiẹpho l'echiẹgu ziru taphutaphu rwua bya enwungaa ụlo ono l'ophu; ụlo zee zepyabẹ ụnwu ngu ono g'ẹphe ha; ẹphe nwushihu; ọ bụru

mbèdua kpoloko bụ onye gbalaru nù sù gè mu bya epfuaru ngu g'òda.”

²⁰ Tòbudu iya bụ; Jiobu bya agbalihu bya eworu uwe yèbedua, bụ Jiobu zijaa; bya eworu ishi kpushia; bya eworu onwiya tụa gbii l'alì baaru Chileke eja; ²¹ sù:

“Oo ọto bẹ mu gba teke mu
shi l'ẹpho ne mu daa l'alì.

Ọ bụkwarupho ọto bẹ mu
a-gbaru laa.

Ọo Chipfu nuru; ọ buru
Chipfu wotaru iphe,
ọ nuru.

G'e tukwaa Chipfu ẹpha.”

²² Iphemiphe-a mekọtaru Jiobu; ọphu o mekwaru Chileke iphe-ẹji; ọphu ọ sụkwaru lẹ Chileke meru iphe, erwubeduru iya nù.

2

Nsetanu ahụ Jiobu ama k'ugbo ẹbo

¹ Noo ya; o bekwa mbọku ọzo; unwu Chileke byakwa g'ẹphe goshi onwophe l'iphu Chipfu. Nsetanu tsokwaru pẹ phọ bya egoshi onwiya.

² Chipfu sù Nsetanu: “?Bụ awe bẹ i shi bya?”

Nsetanu sù Chipfu: “Mu ejenupho ejeje; alwa alwalwaa l'eliphe. Mu tsonurupho oma mgboko aghaphe bọtorii.”

³ Tòbudu iya bụ; Chipfu sù Nsetanu: “?Enya tsuru ngu l'ẹka onye-ozì mu, bụ Jiobu nọ? Mbụ l'ọ tọ duedu nemadzu, dọ g'ọo ya lẹ mgboko l'ophu. Ọ bụ nwoke, obu guru iphóró; bya aburu onye ụta adudu lẹ ndzu iya; buru onye

atsuhuje Chileke ebvu haa eme ejo-ememe. I kpatachakpooru; mu mekpaa ya ehu; mebyishia ya l'ebe o du iphe, o meru. O gudeshie-a onwiya g'o gudeshi onwiya."

⁴ Nsetanu su Chileke: "Hanaa g'a rwunaa ya eka l'akpuru-anya-oji! ?Ti madu le nemadzu amikota anya l'iphemiphe, o nweru enweru g'o buru le ya anodu ndzu? ⁵ Mbụ le-a; machinaa eka rwua ya l'okpu ye le anu-ehu g'ii-huma l'oopfuru l'atatiphu ngu l'eka ono koo ngu onu."

⁶ Chipfu sunu Nsetanu: "Ngwanu; o no ngu l'eka. Ole o bu; dobekwa iya ndzu!"

⁷ Tobudu iya bu; Nsetanu shiepho l'iphu Chileke l'eka ono; o buru iya atugbu bya eje ewoerupho ejo ekpa-ebyi chia Jiobu l'ehu. O shiepho l'okpa zakotae ya pho barii l'ehu jasu l'ishi. ⁸ Jiobu gbeshiepho je agwo l'ikpozu. O buru agbagba mbeji be oogudeje gude ako onwiya oko.

⁹ O buru iya bu l'o nonyaepho; nyee ya su iya: "I gudeshipho onwongu g'i gude iya? ?Tii kodu Chileke onu nwuhu?"

¹⁰ O su iya: "Opfu ngu gbẹ adakwa g'i bu onye lanu l'ime unwanyi, amadu iphe. ?Buepho iphe-oma be anyi a-nodu anata l'eka Chileke? ?Anyi taa kabekpoedu nata ejo iya?"

Iphemiphe ono mekotakpoo Jiobu; ophu o saduru onu pfuswee Chileke.

Ndu onya Jiobu

¹¹ O be teke ndu ephe le Jiobu eshi onya; umadzu eto; numaru ejo-iphe, anwugbaaru iya nu; ephe shigbaa l'ekameka, ephe shi byatashia

ya agbaru mkpu; k'oplu epe a-du iya obu. Ndu byaru nu bu Elifazu, onye Temanu; waa Bilidadu, bu onye Shuwa; wafukwapho Zofa, bu onye Nama. Epe n'eto ono tugbaberu onu eswe ujiku lanu bya g'epe gbaaru Jiobu mkpu dua ya obu. ¹² Epe byarwuta bya agbe uzanya huma iya; ophu epe ahubeeduru iya ama. Epe toko kwata tu uzu-ekwa ke woo; bya eyegbaa aka l'uwe phe lajashia; bya ekpotagbaa urwuku ekpugbaa onwophe l'ishi. ¹³ Epe gwodoshihu l'ali l'eka ono; epe l'iya gwokoru nno no abali esaa; eswe l'enyashi. O kpo phe opfu; ophu o dudu onye ophu duru ike saa onu pfuru opfu yeru Jiobu. Noo kele epe humaru l'iphe-ehuka, ooje kwata shihu ike mebyi eshihu.

3

Opfu, shi Jiobu l'onu

¹ Tobudu iya bu; e mechaepho; Jiobu saa onu wata epfu opfu; bya awata ephu eswe, a nwuru iya iphu. ² O pfushiahaa su:

³ "G'eswe, a nwuru mu
bukwaru ola-l'iswi!

G'enyashi, a tsuru ime mu
bukwarupho enyashi,
laru l'iswi!

⁴ Ge mboku ono gbahukwa
ochii!

Ge Chileke ophu bu l'eli ta
agubehekwa iya iphe;
ophu o dukwa iphe,
du g'iphoro, adukwadu

mbọku ono!

⁵ G'ochii yee tsukiribaa
tsunyikwaa eswe ono
enya!

G'urwukpu sopyabekwa iya!
G'eswe mbọku ono
gbahukotakwa tsurikitiki!

⁶ Mbụ-a; g'ejo dadishi tukwa
enyashi mbọku ono
gburumu swiswia!

G'a ta guhekwaru iya ye
l'eswe, nwuru l'apha!

Ophu a gukwaru iya ye
l'eswe lanu l'onwa!

⁷ Mu suru-a; g'enyashi
mbọku ono bukwaru
mbọku, gba eka nwa!

G'o to dukwa olu emereme,
aa-numa iya l'ime!

⁸ Ge ndu atuje mbọku onu
tukwaa mbọku ono onu;
mbu ndu kwakoberu
akwakobe emete
ejo-oke-agiyi.

⁹ Ge kpokpode nchi-abohu
iya gbahukwa ochii.

G'o lekwa enya l'iphoro
abya adudu;
e -mechaa lo buru ke
mmanu; ophu o
humakwa geregere utsu
enya ahuma ophu.

¹⁰ Noo kele o to mechiduru

ẹpho ne mu
 g'a ta nwu mu mboku ono;
 k'ophu aphu owa ata
 atsoduru mu.

11 Mbụ-a; ?bunaa gunu meru
 g'o gude ophu o budu teke
 aanwu mu;
 mbu l'oo teke ono,
 mu shi l'epho afuta ono
 be mu gege atụ-buhu
 unme nwuhu?

12 ?Bunaa gunu meru g'o gude
 utapfu hee mu hefuta?
 Mbụ; ?denuanu g'o gude era du
 k'ophu mu nguru iya
 angungu ophu?

13 Kele nta-a be mu gege
 azekpooro nwadoo.
 Mu gege anoro ge mu ze le
 mgbenya.

Oo ya bu me mu anoduro
 pyakoo onwomu
 nwa nggujunguji;
 14 mu le ndu eze me ndu
 mgbazi unwu-eliphe;
 ndu kwashiru unuphu
 doberu onwophe
 l'eliphe-a;
 ole nta-a be o bukotawa
 ochobu.

15 Mu le ndu-ishi, bu ndu shi
 nweru mkpola-ododo;
 ndu shi doo
 mkpola-ochaa dojia ulo

phẹ godogodo.

16 Ọzokwanu ẹ-a; ?bunaa ọnu
kparu iphe,
mu adudu ọ nwa,
a byaru anwu;
ọ nwuhuwaa ne iya l'ẹpho;
e woru iya je elia; mbu
ọ nwaswa, asakpodarunu
ẹnya asasa ophu.

17 Ẹka ono ọ ndu ẹjo-iphe
a-babuhu hanyihanyi.

Ndu ike bvuru a-ọdu iya
tutaahaa unme.

18 Alì-maa ono ọ ndu mkporo
yichaa ọ ndu ọ iya atuta
unme.

Ẹphe ta anuhedu olu ndu
anọduje achi phẹ g'ohu.

19 Ndu ha nwanshii ọ l'ẹka
ono;
ndu ha shii ọdu iya.

Ọphu ndu shi buru ohu anọdu
l'ẹka nnajiuphu phẹ.

20 ?Denu g'o gude iphoro ọdu
adujeru ndu ejegbu onwophe
l'iphe-ẹhuka.

A ọdu ahajekwadu ndu aphu
tsoru g'ẹphe dzukwaduru
ndzu;

21 mbu ndu anwuhu agu ẹgu;
ọphu o kwedu phẹ egbugbu;
ndu anọduje achi iya ọ
ndu achi ẹku,

- ere ire, e domiru edomi.
 22 Ndu eteje ẹswa ntumatu;
 mbu kwata mee ẹmereme
 m'ẹphe bahu l'ime ilu.
 23 ?Denuanu g'o gude iphoro
 nodu adujekwarupho onye
 e domiru uto iya edomi;
 teme Chileke gude
 okpokuu kpọ-pee ya
 mgburugburu; o kwaa
 l'ime iya?
 24 Noo kele o buwaa atsu ude
 bu nri,
 epyoje mu onu.
 Mgbede, mu ata duẹpho
 g'eka mini aso gborogboro.
 25 Iphe, mu atsushi ebvu ike
 buẹpho iphe,
 mechaaru byaru mu nu.
 O bu ru iphe ono, mu anmaru
 pyaapyaapya mechaaru
 mee l'ehu mu.
 26 Ehu ta adujeduru mu guu;
 ophu mu atutajeduru unme;
 ophu ehvujeduru mu
 ebvuru.
 Oo epho iphe-ehuka be mu
 l'iya anoduje eme.”

4

Onu, Elifazu yeru

- 1 Tobudu iya bu; Elifazu onye
 Temanu bya eye e onu su:

- 2 Nemadzụ -sụkwanu gẹ ya
 yee nwọnu nwilile;
 ?tọo kpatsudu ngu nụ iwe?
 Ọlobu ?bụ g'iphe aduje baa
 nemadzụ edobe ọnu doo?
- 3 Leanarọya; gube onye ziwaru
 ikpoto nemadzụ iphe.
 Ndu dahụwaru adzụlakpa bẹ
 i meru;
 ẹphe gbakerehu.
- 4 Onye ada adada bẹ i pfuru
 opfu yeru;
 opfu ngu kwolia ya.
 Mbụ l'ikpere ngwọkinaki bẹ
 i meru;
 ọ pfuru kẹkereke.
- 5 Nta-a bẹ iphe-ẹhuka
 byapfutaru gubedua
 l'ishi onwongu.
 Aphụ ji ngu obu ẹgube
 ọwa-a;
 mbụ l'ọ turu ngu gbaa
 l'ẹhu; meji tọfu ngu.
- 6 Eshinu ị bụ onye atụ Chileke
 ebvu; dakobenụ iya!
 L'ị chiru ẹnya yeru abubu,
 ị bụ onye ụta adudu lẹ
 ndzụ iya.
- 7 Rinaa ya ariri; ?bụ onye bẹ
 ị makpọoru,
 bụ onye iswi dọ mma,
 lajeru l'iyi?
 ?Bụ awe bẹ ị hụmajeru l'onye

- pfuberekoto
 chihuru le mgboko?
- 8 O chikwaa iphe, mu ahumaje
 bu le ndu woru ejo-ememe
 ako g'onye ako opfu;
 bya eworu iphe-ehuka anma
 iya bukwapho
 iphe ono be ephe akpataje
 iya.
- 9 Chileke -zikwadaa unme fuu;
 ephe ephukashihu.
 Teke ehu egu iya swolihuru;
 ephe aburu ola-l'iswi.
- 10 Oduma asujekwa ekiri;
 baa hanyihanyi; byaa enari;
 obenu l'oduma,
 dafuru ibogolo
 be eekwoshije-ele-a eze.
- 11 Oduma, ahumaduru iphe,
 oo-ri alaje l'iswi;
 unwu oduma agbaa
 nanu nanu.
- 12 "Mbu-a; o nwekwaru iphe,
 e pfujeru mu le mpya.
 O buru-a nwiphiphe be mu
 numabutaru iya.
- 13 Mu nodu arwo ejo nrwo
 lenyashi;
 le teke ono, ndiphe
 adajewa odamgbenya
 ono.
- 14 Ndzu guahaa mu;
 ehu nmaahaa mu
 pyaapyaapya;

k'ophu okpu,
 no mu l'ehu nmakotaru
 yilayila.

15 A nonyaepho; nwamaa bya
 eshie mu pho
 l'ataphu ghata.

Edzu swie mu pho l'ehu;
 ishi nyia mu ke kpalaa.

16 Maa ono bya apfuerupho
 kekereke;
 ophu mu adukwanu ike
 ako g'o gbaru.

O buepho l'o nweru iphe,
 pfuru mu l'iphu.

Ekameka dakotaepho
 nyonyoronyo.

A nonyaa; mu numa olu-opfu
 onye suru mu:

17 ?O nweru g'oo-dunaa
 nemadzū mmanū
 abya aka Chileke
 apfubekoto?

?O nwenuru-a g'oo-du
 nemadzū abya aka
 onye meru iya nū aduebe
 ree?

18 Eshinu Chileke te egudedu
 ire ndu ejeru iya ozi aka;
 teme o nodu abajeru
 unwu-ojozi-imigwe iya
 mba l'iphe, ephe mesweru;
 19 ?buchia nemadzū be oo-ha;
 mbu nemadzū ono,

bu l'ulo epuchi,
 a turu okpa iya l'ali;
 ndu azo-gbu phe
 ka nphe eme l'azo-gbu
 mbeberibe!

20 A -bya eshi l'utsu noo jasụ ge
 nchi jihu be e gwewaru
 phe uji.

Ephe alaa l'iyi jeye le
 tuutuutuu le miiimii;
 o to dudu onye enya erwu
 l'eka ono.

21 O -buru l'a gbabufuru eri,
 gude ndu phe;
 ?ephe ta anwuhudu l'ebe
 enwe egomunggo?"

5

1 Kunaa oku nta-a maru me
 ?o nweru onye a-za ngu
 enu.

?Denu unwu imigwe ono
 ophu ii-gharu iphu
 g'o gbaaru ngu mkpu?

2 Ovuma egbukwa onye-eswe;
 teme iji enya nodu aphuje
 onye amazidu iphe
 terii.

3 Mu humajeakwaru eka
 onye-eswe agba ogharabvu;
 ophu o dudu g'o no-beru;
 atuphuwa iya l'onu.

4 Unwu iya kwatakpo awa
 awawa;

mbụ l'eegweje p̄hē
 arakabya l'ẹka ekpe
 ikpe.

O to nwedu onye agbaru p̄hē
 ọdzori.

5 Ọ bụru ndu ẹgu agu erifuje
 iphe, ọ kpatarụ l'ẹgu
 iya;
 mbụ l'ẹp̄he ewotajęchaa
 wota ọphu
 nọ l'ẹka o pheduru ẹswa.

Ndu ẹhu achi ọku nọdu
 alwuje iya alwulwu.

6 Kele mkpawere te eshijedu
 l'urwuku futa;
 ọphu iphe-ẹhuka efutajędu
 l'ali.

7 Ọle ọ bụ; nemadzụ bę a
 nwukwaru ye
 l'ẹje iphe-ẹhuka ẹgube-a,
 ẹkoroku bụ: ọ -gbaa l'o
 phelihu-a.

8 Mbụ l'ọme ọo mu;
 mę mu edooru iya Chileke;
 mbụ mę mu ewoerupho g'ọ
 daru mu shi
 ishi lanụ dokotaru iya.

9 Lẹ Chileke emeje iphe,
 dųgbaa biribiri,
 bųgbaa akpavu l'ishi;
 mbụ l'oomeje iphe,
 dų ebvu igwerigwe kpọ.

10 Eliphe bę oodzejeru mini.

O nọdu asọjeru mini sọba
l'ẹgu.

11 Ookulije ndu lwaru alì imeli
imeli;
tẹme o nọdu ekulije ndu
agu aphu
dobe l'ẹka adudu iphe,
byaru eme phẹ nu.

12 Ndu ẹregede bẹ oomeje;
o too jehuduru phẹ g'ẹphe
tuberu;
k'ophu bu l'ẹka phẹ ta
adudu iphe,
ẹphe emefuje ọnyà.

13 Ndu maru iphe bẹ oogudeje
ẹregede,
ẹphe agba nmata.

Tẹmanu mmamiphe ndu
ntuphu-ire
bẹ oomeje l'ọ daa idaphu.

14 Nchi ejipfuje phẹ l'echilabo
eswe.

Ẹphe eje dadishi l'echi
gbadagbada eswe
g'onye eje l'echi abali.

15 Ndu adudu g'ọ du phẹ
bẹ ọodzotaje l'ẹjo ọnu phẹ.

O nọdu adzotaje phẹ l'ẹka
ndu du ike;

16 k'ophu bu lẹ ndu ukpa bẹ
ele ẹnya g'adzoo phẹ.

O mee iphe, apfuduru-oto
mee ọnu sọtukumu.

- 17 Ẹhu-utso bẹ a gọru nù onye
 Chileke abajeru mba;
 k'ọphu bụ:
 Ọkalibe-kangokotaru-nù
 -nọdu alọ ngu ẹka lẹ nchi;
 ta anmakwa iya
 phulaphula;
 18 kele ọolojeru ọnyá tų
 nemadzų l'ẹhu;
 l'ọ bya epfube iya iphe
 l'ọnyá ọbu.
- Ọ nọdu emekajẹ nemadzu
 iphe;
 e -mechaa l'o mee ya l'ọ
 kpọhu.
- 19 Iphe-ẹhuka a-byaru ngu akpọ
 ishi;
 l'ọ dzọchaa ngu;
 mẹkpoo akpọ ẹsaa;
 ọle o too kwedu g'ọ dųru
 iphe, oo-me ngu.
- 20 Lẹ teke akpa-nri; bų iya
 a-gbarų ngu mkpu
 g'ị tị kpagbu onwongu
 lẹ nri.
- Teke aalwų ọgu l'o mee g'e te
 egbu ngu mma.
- 21 E -pfuaru ngu ẹjo opfu;
 o too kwedu g'o rwua ngu
 l'ẹhu;
 ọphu ịitsudu ebvu mẹ
 ọla-l'iswi rwua.
- 22 Ọo ọchi bẹ ịi-nọduje achi

ọla-l'iswi yẹe ọkpa-nri;
 ọphu ị tsudu anụ-ẹgbudu
 k'eliphe-a ebvu;
 23 kẹle gu lẹ mkpuma, nọ
 l'ẹgu a-gbachaa ndzụ.

Unu l'anụ, bu l'ẹgbudu
 a-dụchaa lẹ ree.

24 Ibe ngu bẹ ịi-makporu l'ọ tọ
 dudu iphe,
 e-me iya nụ.

L'ị bya agụa iphe, bụkpoo
 iphe,
 i nweru enweru ọgu;
 hụma l'ọ tọ dudu ọphu
 etuphahụ etuphahụ.

25 L'ị maru l'unwu ngu a-dụ
 igwerigwe.

Awa ngu a-kpofushi g'ẹswa,
 furu l'alị.

26 L'ị kakpọo nka kaghee ya
 akaghe
 tẹme l'ị bahuje l'ilu.

L'ị dụ g'ereshi, e gburu l'ògè
 iya.

27 Anyi nyokpọwaru iphe-a
 enyonyo hụma
 l'ọ bụ ire-lanụ.

Mbụ-a; nụmakwa iya woru
 iya ye lẹ ndzụ ngu!

6

Ọnu, Jiobu yeru

- 1 Tòbudu iya bụ; Jiobu yee
 ọnu sụ:
- 2 Ọ dū mu g'a sụ g'e wota
 mgburwashị ẹhu mu
 tịa atùtù g'a hụma
 g'ọonyi-be ẹrwa.
 Mbụ g'a tuko iphe-ẹhuka mu
 chiru ye l'iphe,
 aatùje ẹrwa iphe.
- 3 Ọ tọ dudu g'e meru g'ọ tọ ka
 ẹja, nọ l'eze-ẹnyimu
 anyị ẹrwa.
 Ọ bụru iya kparụ iphe,
 opfu mu adanuka
 kpaakpaa.
- 4 Kele apfụ,
 Ọkalibe-kangokotaru-nu
 gbackashiru mu gugbaaru
 mu eguru l'ẹhu.
 Uphu, ọophu mu nọdu alọ
 mu ẹka lẹ meji;
 mbụ lẹ Chileke eyeẹ mu
 phọ ebvu mkpẹe-lanụ.
- 5 Nkapfụ-igara-ọswa ?ooraje
 ọrà mẹ ọ -nọdu ata
 ẹswa?
 Tọo eswi ?oogbuje ọrà mẹ nri,
 oori dukwadu?
- 6 ?Eerije nri, enwedu ọtso l'ẹbe
 e ye iya únú?
 Tọo ?ọ duru ọtso, dū l'ẹka
 ono, achajẹ ụcha
 l'ẹkwa-ọku,

e shiru eshishi ono?

7 Mu te ekwejedu iya edenyi
 ẹka;

kele ẹgube nri ono abyaje
 mu ẹgbo l'onu.

8 O gogo dukwaru mu ree;
 ome ee-meru mu iphe,
 mu epfu g'e meeru mu;

mbu le Chileke gege
 akabenu nu mu iphe,
 mu ele enya iya;

9 mbu le Chileke gege
 atukpoepho obu iya
 onyo gwee mu uji;
 g'o tuhakpoepho ẹka ta
 mu l'ehu ke paa;

mee ge mu chihu le mgboko.

10 Oo ya bu me o bukwanuru
 iphe,

gege anodu adu mu obu;
 mee g'ehu tsokpoo mu
 nu l'iphe-a,

l'atakposhi mu
 g'ootakposhi mu-a;
 noo kele mu ta ahajeduru
 eme olu onye ono,
 du nsọ ono.

11 ?Bu ike gunu be mu
 nwekwaduru
 k'anodu elekwadu enya
 iphe?

?Mu maru iphe, kpo-chiru
 ndzu mu ishi ophu mu

- e-pfukwadu k'ata nshi?
 12 Okpehu nkemu ?ọ bu
 okpehu
 agbara-mkpuma?
 Tọo anụ-ẹhu nkemu ?ọ bu
 akpọ-igwe?
 13 ?Mu nwekwaduru ụvo,
 mu e-gude yeru onwomu
 ẹka
 nta-a, a natawaru mu ike,
 mu shi nweru-a?
 14 Onye meji atọfu atọfu
 gbakpọru g'ònyà iya
 phe
 anọdu aphuru iya
 obu-imemini;
 m'o betakpọ ophu o
 tsuhedu
 Okalibe-kangokotaru-nu
 ebvu.
 15 Obenu l'unwune nkemu be e
 te gudedu ẹka.
 Ephe du g'oke nggele, mini
 tahuru l'onanwu;
 ọle o -be l'udzumini;
 ọ byaa utso tuko ekameka
 sweta;
 16 me mini, doru iya nu,
 shi hukoo ahuko
 dazeshihuepho;
 ọ buru iphe, swetaru iya
 nu bu aka-mini-sunoo.
 17 Ole onanwu -chaepho l'o
 tuko buru sutukumu.

Mbụ okpomọku

-kpoahaefo;

ọ tọ duedu ọphu

a-dụkwadu l'ọgba iya.

18 Ndu ije aparu ụzo phez haa
lashia l'okorobo-egu
je anodu l'eka ono buru
ola-l'iswi.

19 Ndu ije ọphu shi le Tema
choru mini ono
achochu.

Ndu ije ọphu shi le Sheba
lee enya iya;
ọ buru k'iphoro.

20 Iphere gudewaru phez;
kele eka ephe shi kporu
obu yeru be ephe
rwuru;
ọphu ọ dudu g'ephe riru.

21 Unubedua l'onwunu bya
egoshikwapho
l'o tọ dudu urwu, unu aba.

Unu humaru iphe, eye ebvu;
unu tsuahaa ebvu.

22 ?Mu sujetpooru g'e meeru
mu iphe-oma?

Tọo ?o nweru onye mu sujeru
g'o gude iphe,
o nweru je anuru mu
uphalazu?

23 G'unu bya adzota mu l'eka
ndu ohogu mu;
ozoo g'unu bya agbafuta

mu l'ẹka ndu ewebushi
akurepho.

24 Zinaa mu iphe;
ge mu e-dobe onu doo!
Goshinu mu ẹka mu jeberu;
uzo kpo-swehu!

25 Lewarọ g'ire-lanọ emebeje
ẹhuka l'ẹhu!

Obenu le-a; iphe-a,
unu epfu-a;
?o goshikporu gunu?

26 ?Bu mba be unu byaru mu
abarọ?

Mbu-a; ?unu eme g'unu su
l'opfu onye ono,
ejegbu onwiya l'iphe-ẹhuka
ono bu opfu,
laru le pherephere?

27 Ono du-a g'onye aturu
nwogbee,
enwedu nna ido;
bya aburu ere onye unu
l'iya eshi onya erere.

28 Ole g'o du nta-a bukwa le-a;
aswaru, unu a-swaru mu
bukwa g'unu
lekpada mu nu ophu bu
enya;
kele-a; ?mu a-kabehunu
nodu unu l'iphu
dzua uka?

29 Jikonu; unu tunaa mgbeleke
nwanshi;

hanaa eme iphe,
 apfuduru-oto!
 Unu ri-phunu oriri azu;
 kele apfubekoto mu
 dukwapho g'ọ du.
³⁰ ?O nweru iphe, apfuduru-oto,
 mu pfuru nta-a?
 Tọo ?mu ta akabeedu maru
 teke mu pfuru ejo opfu?

7

¹ Nemadzu ?tọ budu iphe,
 ọ byadoru eliphe,
 bu ese akanya;
 mbu le ndzu, ọ no dūepho
 ge ndzu
 onye e butaru g'o jee ozi.
² Ọ du g'ohu, eje ozi, bu iphe,
 ọonoduje ele enya iya bu
 ge nchi e-me jihu;
 dukwapho g'onye e butaru
 ozi, bu iphe,
 ọonoduje ele enya iya bu
 ugwo, aa-pfu iya.
³ Ọo egube ono be e meru
 onwa l'onwa nodu
 abukotajeru mu ke mmanu.
 Iphe, bukpo enyashi nodu
 abukotajeru mu
 mgburwashị-ehu.
⁴ Mu -zee azee; mu echiru
 l'oriri su:
 ?Mu e-kukpoo mgbenya

owa-a jasụ teke ole?
 Ẹnyashi nọdu anọduje akpu
 onwiya gologolo.

Mu nọdu echijeępho
 gburugburu jasụ nchi
 abọhu.

⁵ Inyi tuko mu ẹhu sweta;
 ẹkà nọdu atụ mu rikarika
 l'ẹhu;
 mbụ l'ẹhu mu l'ophu
 kejashihucharu
 ekejashihu;
 ọnyá, nọ iya nụ nọdu atụ
 rikarika.

⁶ Eswe ndzụ mu nọdu agba
 warawara gę ngga,
 e gude ekwe ẹkwa;
 mbụ ẹ ndzụ mu eje
 mgbabirishi l'ẹbe adụ iphe,
 mu levuru ẹnya iya.

⁷ Jiko Chileke; nyatakwa ẹ
 ndzụ mu ta adudu
 iphe ọzo,
 ọ bụ gbahaa udzu-ọnu.

Ẹhu ta atsọbaedu mu uto ẹ
 ndzụ mu owa-a ọzo.

⁸ Onye humaru mu nta-a
 e-mechaa;
 ọ tọo humabaedu mu ọzo;
 mbụ l'ii-mechaa chọo mu
 achọcho;
 ọle ị tịi humabaedu mu.

⁹ Ọo g'igwe erwuje erwurwu
 gbaka-a;

ọ ọto lwabaedu azu-a
 bu g'onye e kpochiru l'ilu
 ta alwajeedu azu ọzo;
 10 mbu l'onye ono ta
 alwajebaedu azu l'ulo
 iya ọzo;
 ọphu unuphu ibe iya
 ahumajeedu iya
 enya ọzo.

11 "Noo g'o gude ọphu mu
 edobedu ọnu doo.

Mu a-nodu ata kpookpookpo
 ge mu ata-a.

Mu epfunu iya pho ge mu
 epfu iya-a.

Mu a-tukonupho g'ooghube
 obu mu gu-gbua l'aphu.

12 ?Mu bu eze-enyimu;
 ọto ?mu bu ejo-oke-agiyi;
 k'ọphu unu yeru ndu nche;
 a nodu eche mu nche?

13 Mu gbẹ ari l'iphe-azẹe,
 mu zẹ azẹe e-me g'ẹhu du
 mu guu;
 mbu l'etemu-anamu mu
 e-me ge nggumaphu
 lwa mu ali.

14 Obenu l'i gudele-a ejo nrwọ
 eme ge ndzu gu mu;
 bya egude ọphulenyanya eye
 mu ebvu;
 15 k'ọphu bu l'aswi-gbu
 onwonye byaru aka
 mu ree.

Anwuhu ka mu ree eme l'udu
 ndzu owa-a, mu dzu
 nta-a.

16 Mu ta agubeeduru ndzu mu
 iphe;
 mbu l'ọ to dukpoedu mu
 g'a su
 le mu no ndzu anono ophu jasu
 le tuutuutuu le mijimiimii.

Pakpoeru mu pho haa;
 le ndzu,
 mu no nta-a buwaa
 iphe-mmanu!

17 ?Nemadzu bu gunu ke g'i
 meje iya g'ọ ha shii?
 ?Ke g'ikpojeru obu yeru iya?

18 ?Ke g'i lerweje iya enya
 elerwe
 l'utsu mboku-mboku;
 ahụ iya ama tekenteke?

19 ?Tii-kabekpoda wofu mu
 enya;
 ozoo g'i hakpo mu nu ge
 mu noo
 nwekinyi mu nwanshi
 nwanshi?

20 O -buru le mu meru Chileke
 iphe-eji;
 ?mu meru gubedua gunu?
 mbu gube onye eche
 nemadzu nche.

?Denu g'o gude o buru l'ehu
 mu be enya ngu du?

?Mu anyiwa ngu erwa to?

21 ?Denukpoo g'o gude ophu i
 kabekpodaa guaru
 mu nvu l'eka mu
 meswekpooru;
 mbu pawarunu haa
 l'ejo-iphe obu, mu eme obu;
 kele o to dukwa
 g'oo-no-beru l'e kpochia
 mu eja.
 L'i chọo mu nta chọo imo;
 i tji humaedu mu.”

8

Onu ke Bilidadu

- 1 Tọbudu iya bu; Bilidadu,
 bu onye Shuwa bya eyeeru
 iya onu su iya:
- 2 ?Ii-pfukpoo udu opfu ono
 pfuberu teke ole?
 Opfu ngu dukwa ge
 pherephere,
 ezi taphutaphu.
- 3 ?Chileke ekpeje ikpe
 l'eregede too?
 Okalibe-kangokotaru-nu
 ?ogbanweje iphe,
 pfuru nhamunha?
- 4 O kwa iphe-eji, unwu ngu
 meru iya
 be o buru phe nggo iya.
- 5 Obenu teke o bu l'i gbapfuru
 Chileke; mbu wata arwo
 Okalibe-kangokotaru-nu

arwɔrwo;

⁶ ọ -buru l'ì dẹbe ree bya
 aburu onye ire-lanu
 bẹ ọ tọ dudu m'obeta ọ
 buru nta-a ọphu
 ọo-rikota onwiya gbaaru
 ngu mkpu;
 woru ngu dophu azu
 l'ẹka shi rwube ngu nu.

⁷ Teke ì wataru iya bẹ ọo-du
 nwa mkpẹmkpẹe;
 obenu o -rwua l'iphu bẹ
 ìi-wata aba yoyoyo.

⁸ Jinaa ndu shihawaa nu;
 g'ẹphe kọoru ngu iphe,
 shi anwujeru ndiche phẹ;
⁹ kele anyibedua bu-a
 unyaphu bẹ a nwuru anyi;
 ọphu ọ dudu iphe,
 anyi mawaru;
 teme ndzu anyi l'eliphe-a
 dọepho kẹ nwa tsokere.

¹⁰ Ndu ono e-zi ngu-a iphe
 pfua opfu ye ngu lẹ nchi;
 mbu l'ẹphe e-gude
 mmamiphe phẹ saaru
 ngu opfu.

¹¹ Èjì; ?oovuje ogologo ẹka
 ẹpuchi adudu.

Mbu-a; ẹswa, du l'uda
 ?obaje yoyoyo mẹ mini
 adudu l'uda?

¹² Ọobujeru;

ọ -nọdu ezekwadu-a;
 e tee gbudu iya egbugbu;
 ẹphe akpọshihu nkụ;
 mbụ ka ẹswa akpọhu nkụ
 ẹgwegwa.

13 Noo g'ọoda-pfuje iphe,
 bụkpoo ndu zọharu Chileke.

Ọ bụru ẹgube ono bụ g'ele
 ẹnya iphe
 ndu amadu Chileke alaje
 l'iyi.

14 Iphe, ọ dakoberu aduje
 phuge phuge.

Iphe, ọ kpọru obu yeru bụru
 udude.

15 Teke ọ dakoberu ụgbu
 ẹlwu-ẹlwu iya ono
 l'o rikashihu;
 l'ọ bya agbakua ya ẹka;
 ọ tọ dudu ọphu eme nụ.

16 Ọ dū g'iphe, a kuru l'anwu
 agba iya mini.

O rwushia irwu ọphúú wushi
 kẹ jashii l'ime mgbabu
 ono;

17 bya agbaa ọgbarabvu
 je agbakua l'agbara-mkpuma;
 bụru ẹka ọcho bụ ẹka
 dū epfu-epfu.

18 Obenu teke e phefuru iya
 l'ẹka ono, ọ kpọru ono;
 ẹka ono ajika iya sụ lẹ ya
 teke ahumaswekwaa
 ya.

- 19 G'e lekeberu ɛnya epfu;
 ndzɔ iya anwɔlwashiɥu;
 iphe, a kuru akuku ozo
 eshi l'alɪ l'ɛka ono
 wata efushi.
- 20 Mbɔ lɛ-a; Chileke ta
 ajikajekwa onye
 adudu iphe, o meru;
 ɔphu ɔ bujekwanuru
 agbarike onye ɛjo-iphe.
- 21 Oo-mecha mee;
 ɔnu aburu ngu ɔchi ɔchi.
 Ogbogboromonu ngu aburu
 iphe, e-ji iya nɔ bu
 okoo ngu.
- 22 Ndu ɔhogu ngu bɛ ee-ye
 iphere g'uwe;
 l'a phokashia ulo-ɛkwa,
 ndu ɛjo-iphe
 kweberu buru.

9

ɔnu, Jobu eye

- 1 Tɔbudu iya bu;
 Jobu bya eyee ɔnu sɔ:
 2 Tororo bu ishi opfu bu lɛ mu
 maru l'oo eviya.
 Obenu lɛ-a; ?denu gɛ
 gwɔpya-gwɔpya iphe-a,
 bu nemadzɔ-a e-me
 pfube-ɛka-oto l'iphu Chileke?
 3 Onye ɔ du gɛ yɛ Chileke tua
 ya bɛ ɔo-jikwa

unu-kuru-unu aji;
 ọ tọo zadu g'ọ ka mma
 l'ọo nanu.

4 Ọ maru iphe maghee ya
 amaghe;
 bya adu okpehu du-ghee
 ya adu-ghe.

?Bu onye kwefujeru iya ike;
 e mecha;
 ọ duru iya le ree?

5 Úbvú be oonwuribejeru;
 úbvú ta amakpodanu l'e
 nwuriberu iya;
 ọ ndu egudeje ehu-eghu
 ghaa ya igharaphu.

6 Mgboko l'ophu be
 onmaghuje anmaghu
 mee itso, e gude kpobe iya
 g'o tee kpaakpaakpaa.

7 Enyanwu be oopfujeru opfu
 yeru; l'o chibuhu;
 iphóró, du le kpokpode bu
 iya byanyibotaru iya.

8 Ọ buru yebedua kpoloko
 susaru akpaminigwe
 g'ọ susaru ono;
 bya aburu iya bu onye ahaje
 okpa l'eli akparamini,
 atu l'echi eze-enyimu.

9 Ọo ya meshiru oke kpokpode
 kpokpode,
 dugbaa nu;
 mbu kpokpode, bu biye;

yẹ orayonu;
 waa peleyadesu;
 męwaro eze kpokpode
 kpokpode,
 nọgbaa l'uzo ndọhali.

10 Oomeje iphe, dọ biribiri,
 adudu ẹtu, iya dọ nọ;
 tẹme iphe-ọhumalenya
 nkiya buru aguta aguta.

11 Ọobujeru; a -nọnyaa
 l'ọ bya aghata mu;
 mu ta ahumadu iya;
 teke ooje l'iphu l'iphu mu
 ta amadu.

12 Ọ -nata nemadzu iphe;
 ?bu onye a-su iya g'o
 to meshi?

?Bu onye suru g'ọo-ji iya su:
 ?Bu gunu be iime egube
 ono?

13 Ehu -nodu egbu Chileke egbu
 be o too selajekwa eka
 azu;
 mbu le ndu ojogu Rehabu
 daru kpurumu
 le mgboru okpa iya.

14 ?Denu ge mu e-jeje ge mu
 l'iya je eme opfu?

?Mu doberu onu l'awe ke ge
 mu l'iya bya
 awata atu ego opfu?

15 O -betakponu ophu o dudu
 iphe, mu meru;

mu te ejekwa iya asaru
opfu.

Iphe, mu a-nduekwapho
eme bukwa ge mu
rwonupho yebe onye-ikpe
mu ono g'ọ phuaru mu
obu-imemini.

16 Mu -kukpoo ya nu oku;
ọ -za mu enu be mu ta
arikipokwanu l'oo-yeru
mu onu.

17 O oke pherephere be
oo-gude bya bya egwee
mu arakabya; bya emee onya,
tukoru mu ehu-a ka shii
l'ebe adu iphe, mu
meru.

18 O too kwedu g'unme rwua
mu onu-epho.

O chia mkpawere be oo-gude
tsua ndu mu ntsugiji.

19 O -buru l'iphe,
eepfu bu k'okpehu;
ọ bu onye ike du shii.

Teke ọ bu k'ikpe;
?bu onye suru iya eku
ikpe?

20 O -betakponu onu ọ du du
iphe,
mu meru be opfu,
shi mu l'onu anmale
mu-a ikpe.

Iswi -dukpoo mu nu mma;
l'ọ sule-a l'ikpe nmaru

- mu.
 21 A makwaru-a l'ọ tọ dudu
 iphe, mu meru;
 ọle mu ta ayọdu ọshi
 onwomu.
 Ndzu mu dūwaa mu ashi.
 22 Mbụ l'ọ tukuru buru iphe
 lanu;
 ọ buru iphe ono meru g'o
 gude mu sụ:
 “Oomebyishije ndu adudu
 iphe, ẹphe meru;
 yẹe ndu bụ ndu ejo-iphe.”
 23 Eze-iphe-ẹhuka -dapfuta ndu
 adudu iphe,
 ẹphe meru;
 meahaa g'ọ pyi-gbua phe;
 k'ophu meji tofuaharu phe
 atofu;
 bụle-a ọchi bẹ ọonoduje
 achị phe.
 24 Mgboko dabaru l'eka ndu
 ejo-iphe.
 O gude ẹka pyi-chishia
 ndu-ikpe iya ẹnya.
 Ọ -budu iya eme iya ?buhunu
 onye bẹ eme iya nụ?
 25 “Ewe ndzu mu kakwa onye
 maru ọso eme ẹgwa.
 Oophegbaepo
 phaaphaaphaa
 epheghashi;
 ọphu ọ dudu g'ọ ka mma
 l'ọo nwa ẹhu-utso,

- ha nwanshii, dụ iya nù.
- 26 Oochikọtaje búruru chighaa
g'ugbo,
e meru l'owa-uda;
zia phaa zighaa g'ugo,
ephe ejepfu iphe, oo-ri.
- 27 Mu -sù gẹ mu zọhaa k'agụ
aphụ
bụ iphe, mu e-me bụ gẹ mu
gbanwee iphu
wata anwụja ọnu-ọchi.
- 28 Obenu l'iphe-ẹhuka,
mu eje bẹ mu
atsụkwadu-a ebvu;
kẹlẹ mu maru l'ị tị byadu
ekwe l'ọ tọ dudu iphe,
mu meru.
- 29 Eshinu a nmawaru mu ikpe;
?mu a-yọbahunaa ọshi
k'ole?
- 30 Ọ tọ duka m'obeta mu saa
onwomu dụ g'eberugo;
bya egude ncha kwọọ ẹka
mu; ọ nọdu ama mma
31 bẹ ii-patalẹkwa mu-a chie
wuu l'ime iduma,
echi búruru bütubu;
k'ophu bụ l'uwe, mu yeru
l'ẹhu bẹ mu a-dụchaa
ashị.
- 32 Chileke ta bukwa nemadzu
gẹ mu bụ-a;
mẹ mu eyekwaaru iya-a ọnu;
mẹ mu l'iya eje edogbabe

iya l'ulo-ikpe.

- 33 Ophu o dukwanu onye
 egbogbo g'o gbokahu
 anyi,
 bu onye e-seta anyi l'eka
 doshiaru anyi opfu;
 34 mbu onye a-nafu Chileke
 echachi ono,
 oowa mu l'ehu g'owa mu
 iya-a;
 k'ophu ebvu, ooye mu
 a-kabe lwa mu ali l'ehu.
- 35 Noo teke mu e-pfu g'onu ha
 mu;
 mu ta atshedu iya ebvu.
 Obenu g'o du nta-a be mu ta
 adukwa ike epfugbu
 g'onu ha mu.

10

- 1 Anodu ndzu dukwaa mu
 enyiru.
 Oo ya bu le-a;
 ge mu bya evushia
 mgburwashu-ehu mu kube;
 mbu le mu e-pfugbuapho
 g'ooghube mu l'obu.
- 2 Mu a-su Chileke: Ta
 anmashinu mu ikpe!
 Gushichiaru mu iphe,
 bu iphe,
 iisu l'oo ya bu iphe,
 mu meru!

- 3 Tọo ?bụkpoepfo iphe,
 dụ ngu ree
 bụ g'i mee mu mkpawere;
 g'i gbuphua iphe,
 i gude ẹka ngu mee;
 ọle idzu, ndu ẹjo-iphe
 chiru bẹ bụle-a ọnu-ọchi
 bẹ iinwujajeru iya?
- 4 ?Bụ ẹnya nemadzụ mmanụ
 bẹ i nweru?
 Mbụ ?bụ gẹ nemadzụ eleje
 iphe ẹnya bụ gẹ
 gụbedua eleje?
- 5 ?Bụ gẹ nemadzụ anọ-bejeru
 bụ gẹ ii-nọ-beru?
 Mbụ ?bụ apha ole,
 nemadzụ anọje bẹ
 ii-nọkwapho?
 6 mbụkwanu meru g'o gude i
 nọdu avọkpoepfo
 achọ ẹka o deru mu;
 akpa ishi iphe,
 mu meru ngu ẹji.
- 7 Ole i makwaru l'ikpe ta
 anmaduru mu;
 ọme ọphu ọ dudu onye
 a-nafuta mu l'ẹka ngu.
- 8 Ọo ngu gude ẹka ngu mee
 mu gẹ mu dụ-a.
 ?Ii-bya aghakọbe nta-a bya
 emebyishiẹhukwa mu
 phọ?
- 9 Nyatakwa l'i kpuru mu

g'eegudeje ụrwa kpua
iphe.

?Ii-bya bya egwee mu uji
ozo ọo?

10 ?Tọbudu g'aawuje ẹra-eswi-a
bu g'i wuru mu ye;
bya emee mu; mu daa adada
g'ọhu-manu?

11 I bya eworu akpo-ẹhu
yẹ anu-ẹhu yee mu
g'onye yeru uwe;
bya egude okpu yẹ
umi-okpu dzepfua
mu nanu.

12 Oo ngu meru; mu nọdu ndzu;
tẹme i nọdu egoshi l'i yeru
mu obu.

O buru g'i gude ehe mu meru
g'o gude i nọdu eche ndzu
mu nche.

13 Ole i wolẹru-a iphe-a domia
l'ime okpoma ngu;
mbu le mu maru-a
l'oo iphe,
i turu atutu dobe l'ime
obu ngu;

14 le mu -mee iphe-ẹji be
ii-nodukpoepho ege mu ngge;
ophu igujeduru mu nvu
me mu meswee.

15 Ikpe -nmaa mu;
be o bukwapho aphu
tsoru mu!

Iswi -dukpoo mu nu mma;

mu ta apalidu ishi apali;
 kele iphere dushi mu ike;
 teme iphe-ehuka,
 mu eje ripyabewa mu.

16 Mu -woru ishi ngakobe;
 l'i chihaha nta mu g'eka
 oduma achi nta iphe,
 oo-ri;
 l'i woru okpehu ngu ono,
 du biribiri ono tukoshi mu.

17 Tekenteke be ichikobeje
 ndu a-nodu agba mu ekebe;
 teme i nodu anoduje avuru
 mu ovuma.

Ndu ojogu ngu nodu atu
 kpereree abya mu etso ugu.

18 Mbua-a; ?bunaa gunu meru
 g'o gude i kufuta mu l'ophu
 l'ophu l'epho ne mu?

O du mu g'a su le nemadzu
 -byaru ahuma mu enya;
 mu nwuhuwaa.

19 O gege aka mu ree;
 ome mu ta adujekpodarunu
 adudu ophu;
 ozoo ome a nwuru mu paa
 mu eli eli jeye l'ilu.

20 Nwujiku olemole, mu nweru;
 ?to bvuada?

Wofunu iphu l'eka mu no;
 k'ophu eh u a-tsokpo mu
 nwa ililekpoo;

21 teme mu alashiwaro eka

bụ: a -laa; a lwagu azu;
 ẹka agba ọchii bya adu
 tsukiribaa;
 22 ẹka ẹnyasi nkiya bu
 abali-ishi;
 ẹka bu iphe, du iya nu
 bu tsukiribaa;
 iphemiphe, du iya nu
 ghalashihu aghalashihu;
 ẹka nwiphe, du g'iphoro,
 du iya nu du g'eka ọchii
 agba l'ibiya-a.”

11

Zofa ebo iya Jobu

- 1 Tobudu iya bu; Zofa,
 bu onye Nama bya eyee onu su:
- 2 Ikpoto opfu owa-a a-lakota
 ke mmanu
 g'e te eye iya onu to?
 ?Aa-haru onye owa-a,
 epfu opfu igwerigwe-a
 enge to?
- 3 Tukpo-tukpo-tukpo ono,
 iipfu ono;
 ?o-kpo nemadzu opfu
 to?
 ?To o bu i -mecha ndiphe
 sukusuku ono,
 iime phe onoya;
 o to dudu onye agboru ngu
 uja to?
- 4 Kele i suru l'iphe, iipfu geru

asa;
 bya asukwapho l'ì dubebe
 ree l'ènya Chileke.

⁵ Ọle ọ bu; ọ dụ mu g'a sù
 lẹ Chileke e-ye ọnu
 l'onwiya;
 mbụ saa ọnu pfuru opfu
 nụ ngu;

⁶ mbụ kpuhaa iphe,
 pharu lẹ mmamiphe woru
 gheberu ngu ọnu;
 kele ọkpobe mmamiphe
 aduje mkpopfu mkpopfu.

Ọphu ìi-makpoadaru;
 Jiobu; bụ l'iphe, Chileke eme
 ngu ta ahakpọkwanu
 g'ẹjo-iphe, i megbaberu.

⁷ ?Ìi-dụ ike chọkpoepho
 chọfuta iphe, dụ omilomi,
 nọ l'ime Chileke?

?Ìi-dụ ike vọkpoepho
 vọfuta ẹka
 Ọkalibe-kangokotaru-nu
 jeberu?

⁸ Ọ kakwa akpaminigwe
 ephekerephe.

?Ìi-mekwanu iya ime-agma
 nta-a?

Ọ dukwapho omilomi ka
 ali-maa omilomi;
 ?bụ gunu bẹ ìi-dụ ike maru?

⁹ Ogologo bẹ ọ ka mgboko-a
 l'ophu ogologo.

Teme ọsa iya ka eze-onyimu
phosa phosa.

10 Ọ -bya nta-a;
bya akputa ngu tų-chia;
bya ekua ngu ikpe;
?bų onye sųru iya akposhi?

11 Ọphu e-do ngu ẹnya ree
bų l'ọ makọtaru ndu
ẹregede.

Tọo teke o humaru ejo-iphe;
?ọ dų ngu g'ọ tọo tųbejedu
iya nvọ?

12 Tọ buchidaa iphe,
ọ bų bų lẹ teme onye-eswe
enweru egomunggo
bų mẹ nkapfų-igara-ọswa
nwųa nwata-okoro.

13 “Ole ọ bų; i -wowaru ọkpoma
ngu doziaru Chileke
bya amachiaru iya ẹka labọ;
14 bya atųko iphe-ẹji, dų ngu
l'ẹka hakọta ememe;
ọphu i kwedu g'ọ dųru
ejo-iphe, a-dų l'ibe ngu;
15 noo teke ịi-pali iphu
ephekerephe;
iphere ta adųedu ngu.

L'ị pfuru kẹ kwaragadagangu;
ndzų ta agųedu ngu.

16 Noo teke ịi-tųko iphe-ẹhuka
ngu zọha-gbua.

L'ọ dų ngu g'ẹgube-a, utso
agbajẹchaa l'o kpofua.

- 17 Ndzu ngu abya egbuchafu
 bya aka echi eswe agu
 ìphóró.
 Ochii abya agusahuru ngu
 duepho g'eka nchi abohu
 abohu.
- 18 L'i kpoo g'abara; kele o
 duru iphe, iile enya iya.
 L'i leaha enya mgburugburu;
 atutakporo nwanme, iituta;
 o to dudu iphe,
 byaru eme ngu nu.
- 19 L'i zee azee; o to dudu onye
 byaru eye ngu ebvu.
 L'a du igwerigwe byaaha
 g'i yeru phe aka.
- 20 Obenu l'anya e-mechakwaa
 pyashihu ndu ejo-iphe.
 Ephe a-cho uzo agbala;
 o to dudururu phe.
 Iphe, ephe a-nodu ele enya
 iya aburu atu-buhu unme.”

12

Onu, Jobu eyeru Zofa

- 1 Tobudu iya bu; Jobu bya
 eyeeru iya onu su:
- 2 A taa tudu iya atutu;
 o unu bu o-pfuchaa-o-bvu.
 O buru unu le mmamiphe
 a-swì laa.
- 3 O le egomunggo dukwa mu-a

- g'ọ dọ unubẹdua.
 Ọ tọ dọkwa ẹka ẹnuya lwawaru
 mu l'ẹka unu nọ.
 ?Bụ onye ta makọtadu
 iphemiphe ono g'ọ ha?
- ⁴ Nta-a bẹ mu bụwaa iphe,
 ezi ndu mu l'ẹphe eshi
 ọnyà ọnu-ọchi;
 l'ẹka mu shikwa ekuje
 Chileke oku;
 l'ọ numa olu mu.
 Mu bya abụwaru nọ onye
 aachị pfuripfuri
 lẹ mube onye pfuberekoto
 bya aburu onye iswi
 dọ mma.
- ⁵ Ndu ẹhu dọ guu emeje ndu
 iphe-ẹhuka byapfutaru
 sukusuku; sọ l'ọo ẹpho
 onye ẹpurukutu chikọtaru
 abya atọ l'alị bẹ ọobyapfutajẹ.
- ⁶ Ọle ndu abalidebvụ bukwa
 ntusarehu;
 ọphu ọ dọkwa onye asuje
 ndu ono sụu,
 bụ ndu anọduje akpatsu
 Chileke iwe;
 mbụ ndu Chileke phẹ bụ
 l'ọbochi-ẹka phẹ bẹ ọ nọ.
- ⁷ Obenu lẹ-a; unu je ajia anu;
 ẹphe a-kọru-a unu iphe,
 mu abya epfupfu-a.
 Ọdumeka unu ajia ya ẹnu,

ephe l'eli; ephe a-koru
iya unu.

8 Teke o dudu unu abooru uja
yeru ali g'o zia unu iphe.

Ozoo unu angabe nchi g'ema,
no le mini zia unu iphe.

9 ?Bu onye ole le ndu ono,
mu gushiru ono ta amadu
l'oo Chipfu gude aka iya mee
iphe-a, meru nu-a?

10 Oo Chileke be ndzu
iphemiphe,
e meru dobe nokota l'eka.

O buru l'eka iya be unme,
onyemonye atu no.

11 Nchi ?te egejedu iphe,
o numaru egege to;
mbu egube ono,
ire edejada l'iphe, onu
e-ri ono?

12 ?Mmamiphe ta abudu l'eka
aahumaje iya
bu l'ehu ndu kahwaru nu?

?Tobudu onye karu nka
ogologo be iphe edoje
anya ree?

13 Oo Chileke nwe mmamiphe;
bya enweru ike.

Idzu ye nkwaanya
bukwarupho nkiya.

14 Iphe, o lashiru alashi be o to
dukwa onye suru iya
ekpukwa; ophu o dukwa onye

- suru atufu onye o turu mkporo.
- 15 Oo ya bu; o -sephu mini azu;
ali akpo0 jegengu.
- Teke o gbaharu mini aka
l'o tuko ekameka saha
gborogboro l'ali.
- 16 Oo ya be okpehu yee
okpobe mmamiphe
du l'aka.
- Onye a ghoru ugho;
yee onye ghoru iya ya nu
tuko du yebedua,
bu Chipfu l'aka.
- 17 Ndu akpo-zijeru ndu ozo uzo
be ogbabeje okpa oto
duta phe dufu;
teme o nodu emeje
ndu-ikpe g'ephe buru ndu
egomunggo swehuru.
- 18 Ndu eze be onafuje okwa
eze phe;
mee phe; ephe aburu ohu.
- 19 Ndu bu uke be ogbabeje
okpa oto duta phe dufu;
teme o nodu akwatsuje
onye shihawaa uzanya buru
onye noshiru ike.
- 20 Ndu e gude ire phe aka be
oomeje g'ephe ta mahe
iphe, ephe e-pfu.
- Tememe o nodu anafuje ndu bu
ogeranya iphe,
gege edo phe nya ree.

21 Ndu a maru ẹpha pẹ be
 ọnmaje phulaphula.

Teme ọ nọdu anashije ndu
 ọkpehu du ike,
 ẹphe nweru.

22 Ọo ya egoshije iphe,
 du omilomi, nọ l'ọchii.

Teme ọ nọdu ewofutaje iphe,
 gbaru tsukiribaa togbo
 l'ìphóró.

23 Ọo ya emeje ọha g'ọ ha shii;
 teme ọ bukwaru iya pho
 emebyishije pẹ.

Ọo ya emeje ọha g'ẹphe zua
 azuzu ha ọsa;
 teme ọ nọdu ehujekwa pẹ
 pho adagba nchi l'ali.

24 Ọo ya emeje ge ndu bu
 ndu-ishi unwu-eliphe
 mehu phukunaa.

Ọ nọdu enwujeru pẹ ye
 g'ẹphe je etsoru
 okorobo-egu ghaphee
 l'ẹka gbororo adudu.

25 Ẹphe -gbeshi;
 ẹphe eje etsoru aghaphe
 l'ọchii l'ẹka ìphóró
 adukpoda adudu ophu.

L'o mee pẹ; ẹphe akpo
 kulakula g'onye mee atsụ.

13

1 Mbẹdua gudeakwa ẹnya mu

hụmakota iphemiphe ono.
 Mu gudewaa nchị mu nụma
 iya; o doo mu ẹnya.
² Iphe, unu maru bẹ mu
 makwaru-a.
 Ẹnya ta alwakwaru mu l'ẹka
 unu nọ.
³ Ọle ọ dụ mu g'a sụ lẹ mu
 e-pfuru opfu nụ
 Ọkalibe-kangokotaru-nụ.
 Gẹ mu lẹ Chileke l'onwiya
 tụa ya.
⁴ Obenu l'unubedua gude
 ntuphu-ire eme mu
 nrwa pọmupomu.
 Unu bukota mkpọkoro ndu
 eme ọbvụ g'unu hakọta!
⁵ Ọ dụ mu g'a sụ l'unu
 a-tụkokpoephō dobe
 ọnu doo; mbụ l'ono
 gege abụkpoerupho unu
 mmamiphe.
⁶ Unu ngabewaro nchị nụma
 oke ọnu mu!
 Unu ngabẹ nchị l'opfu,
 shi mu l'ọnu!
⁷ ?Bụ unu -nọdu epfu ẹgube
 ẹjo-opfu ono, unu epfu ono;
 unu asụ l'ọo Chileke bẹ
 unu epfu iya etuku tọo?
 Mbụ-a; ?bụchakwaa ya phọ
 bẹ unu epfutura opfu
 ẹregede ẹregede ono,

unu epfugbaa ono?

8 ?Unu a-nọdu abọ nemadzu
 ẹbo etuku iya tọo?

?Unu eme g'unu yeeru
 Chileke oke ọnu iya?

9 ?Oo-du-a ree me o -jeshia
 unu enyocha?

?Unu a-dua ike nmaa ya
 phulaphula ge nemadzu
 anmaje nwibe iya-a?

10 Chileke bafutajekwaru unu
 mba me unu gude mpya
 le mpya abọ nemadzu ẹbo.

11 ?Akpabiri iya ta akabeduru
 eye unu ebvu?

?Ndzụ-agugu iya ta akabedu
 gudepyabe unu?

12 Kpaakpaa ono, unu asagbaa
 ono bukota etu etu,
 wulahuru le ntu.

Edodo, unu edo g'unu dofu
 iya onwunu l'ehu buru
 edo, kwaru l'epuchi.

13 Mbụ-a; unu
 ndukpoekwapho doo
 ge mu pfua phee onwomu.

Iphe, e-mekpo mu nu g'o
 mee!

14 Mu e-tsebe ndzu mu l'onu eta;
 bya atua ndzu mu ntumatu.

15 O to dukwa m'obeta o phua
 mu aphupu;
 mu adakobelakwa iya-a ge

mu dakoberu iya.

Mu a-pfuekwaru iya pho
l'iphu adzo onwomu.

16 Mbụ l'ọ kwa iphe ono
a-buru iphe,
a-dzota mu nu;
kele ọ to dudu onye ta
atsudu Chileke ebvu
a-dụ ike akpafu iya l'iphu.

17 Unu ngabekpoekwapho nchi
ree numa iphe-a,
mu epfu-a!

G'iphe-a, mu epfu-a bamikwa
unu abami le nchi!

18 Le nta-a, mu edowa opfu mu
ishi ria be mu makwaru-a
l'aa-gbaru mu odzori.

19 ?O duru onye a-bya apfuru
pfua iphe, oo-su le mu meru?
O -dụwaa nno;
mu a-takpube onu nwuhu.

20 Su-a; gube Chileke;
menaaru mu iphe labo-a,
mu abya ngu arworwo-a;
ge mu ahaa edomi onwomu
edomi l'iphu ngu!

21 Wofukpoe mu pho aka l'ehu
ewofu ophu.

L'i haa mu eyephe ebvu ono,
iiye mu ono.

22 Noo teke bu: i -kua mu oku;
mu aza ngu enu.

Teke odumeka;

haa gę mu pfuje epfupfu
g'i yejeru mu ọnu.

23 ?Bụ emeswe ole yęe iphe-eji
ole bę mu mekpọoru?

Goshięshikwa mu ęka o deru
mu yęe iphe-eji, mu meru.

24 ?Dęnu g'o gude ọphu
ii ghaduru mu iphu;
i woru mu mee onye opfu
ngu?

25 ?Bụ mkpęekwo, phęrephere
apa bę ii-nu chiipfuu?

Tọo ?bụ ęswa, a phushiru
l'iphe bę ii-wata achi ọso?

26 Noo kęle iphe, i deshiru lę
mu meru buchaa iphe,
rwuru mu l'anu-mee;
tęme i tuko ejo-iphe,
mu meshiru teke mu bu
okoroębya byabę
mu l'ishi.

27 I chiru mu ọkpa ye lę
mkpọro;
tęme i nọdu anọduje
enyocha iphemiphe,
mu emekpọo ememe l'ophu;
mbu mechaa mu ọhubama
l'ichirupfu ọkpa;
k'ophu ii-majeru ęka mu
zọru ọkpa.

28 Noo g'o gude nemadzụ nọdu
erwushihuje g'iphe,
rehuru erehu;

mbụ ị nmadzụ alaję pyętee
g'uwe,
mkpu tapyashiru.

14

- ¹ Nmadzụ, nwanyị
nwuru-a
bę eswe ndzụ iya adudu
igwerigwe.
Tęme ọ buerupho iphe-ęhuka
bụ iphe, jiru iya nụ.
- ² Ọjatajẹ ęgwegwa g'okoko;
l'ọ buhukwaru iya pho
anwulwashihu.
- Ọ buru g'ononyo,
a taa nọribejeduru-a
bụ g'ọ tọ dudu ęka
ọono-bejeru.
- ³ ?Bụ ęgube nmadzụ ono
bę iije eworu ęnya swọbe?
?Ii-jeje iya akputa bya g'i
kpee ya ikpe l'iphu
ngu?
- ⁴ ?Bụ onye suru g'oo-ye ęka
l'iphe, adubebedu ree
wofuta iya iphe, dubebe ree?
Ọ tọ dudu!
- ⁵ Eshinu a guwaru eswe,
nmadzụ a-nọ-beru ndzụ
ọgu doberu iya;
tęme ị bya atụ-buwaru iya
onwa ole, ọo-nọ l'eliphe-a;
bya egoshiwa iya

g'oo-jebejeru l'eliphe-a;
⁶ wofunu iya ɛnya;
 hanaa ya g'ọ tɔsaru ɛhu;
 jasɔ l'o jee ọke ozi iya
 jeghee g'onye e butaru
 ozi.

⁷ Kele-a; oshi, bvuru l'ali
 nwekwaru iphe,
 oole ɛnya iya;
 mbu l'e -gbutsua ya
 l'omita ọzo l'upfu iya.

Ono, ọ mɔtaru k'ọphúú
 ono abya adzuru ọzo.

⁸ Ọgbarabvu iya erehu kwaa
 l'ime ali.

Upfu iya anodu l'ali nwuhu.

⁹ Teke igwe dzeerupho mini
 l'ọ kpọ-futa;
 mbu l'o rwua irwu ọphúú
 g'iphe, a kuru akuku.

¹⁰ Obenu le nemadzu abujeru;
 ọ -nwuhu; nkiya abvu.

Ọ -tɔwaa unme ikpazu;
 ọ tọ tubaedu ọzo.

¹¹ Ọo g'eze-ɛnyimu aduje me
 mini tabota iya-a;
 ọzoo g'aguga aguga nggele
 aduje nkwagbo-nkwagbo
 me ọ tahu-a;

¹² noo ge nemadzu aze-zetaje;
 ọ tọ gbeshibaedu jasɔ
 teke igwe ta aduhedu.

Ọ tọ byadu agbeshibaa;

ọphu e metebaedu iya le
mgbenya ono, turu iya
nu ono.

13 O du mu g'a su l'ii-wotakpoe
mu pho je edomia l'ali-maa;
mbu kpuchia mu iphe
l'eka ono jasu ehu
eghubuhu ngu eghe.

O du mu g'a su l'i gege
atukpoephe su l'owa-a
g'oo-no-beru baa;
teme l'i nyatabaa mu.

14 Mbu-a; nemadzu
-nwuhuchaa; ?oo-dzuru
ndzu ozo?

Mbu eswe ujiku olemole-a,
mu eje ozi mkponwu
ehu-a be mu gege
angabeephe g'o rwua
eswe mboku, ee-me mu
ge mu du k'ophuu
k'ophuu.

15 Noo teke bu: i -kua mu oku;
mu aza ngu enu.

Onye ono, bu ngu gude eka
ngu mee ya dobe ono
aduaha ngu ree l'enya.

16 Noo teke i-nodu agukwanu
ije mu ogu.

I tii nyochaekwanu iphe-eji,
mu meru.

17 Iphe, bukpoo emeswe,
mu mesweru ngu aburu
iphe,

ii-chiru ye l'eda kechia.
L'i woru iphe kpuchia l'iphe-eji,
mu meshiru ngu.

18 Obenu le-a; ọo g'úbvú
anonya l'o ribashihuaha
eribashihu phọ;
ọ buru g'aanonya l'a
phọfu oke agbara-mkpuma
l'eka ọ kporu phọ;
19 mbu le-a; ọo ge mini emeje
mkpuma l'o chi swacha
swacha phọ;
teme ochioku-mini nodu
asochataje eja, no l'ali phọ;
noo g'iisotaje iphe,
nemadzu ele enya iya
sofukpoepho asofu.

20 Oo ugbo lanu be ikapyabeje
nemadzu enya l'ọ buru
iya atugbu.

L'i mee ya g'ọ gbanwube
iphu l'i chifu iya.

21 Teke aakwabẹ unwu iya
ubvu; ọ to duedu iphe ono,
duru ophu ọ makwaduru.
Teke eehu phe adagba-nchi
l'ali;
ọ to duedu ophu
oohumakwadu.

22 O buwaru iphe, erwuje iya
l'ehu bu iphe,
eme iya ehuka l'ehu nkiya.
O -nodu agu aphu l'ọ guwaru

iya rọ onwiya.

15

Elifazu epfu lẹ Jobu nmawaru onwiya ikpe

- ¹ Tọbudu iya bụ; Elifazu onye
 Temanu bya eyee ọnu sụ-a:
- ² Onye maru iphe; ọopfuje
 opfu, enwedu ishi;
 ọzoo tsukoo okpomọku,
 shi lẹ pherephere
 ẹnyanwu-awawa
 tsụ-jia onwiya ẹpho?
- ³ Ọbụ mkpọkoro-opfu bẹ onye
 maru iphe egudeje
 eye ọnu l'opfu;
 mbụ epfuphepho opfu,
 adudu mẹ nanu, baru urwu?
- ⁴ Mbụ lẹ gubedua wokpọerupho
 k'atsụ Chileke ebvu hua
 l'ali;
 bya akpọshikwapho
 g'e te pfujehẹ nụ Chileke
 epfupfu ophu;
- ⁵ kẹle ọo iphe-ẹji ngu ezi ọnu
 ngu iphe, oo-pfu;
 mbụ l'ọo ire onye ẹregede
 bẹ i gude epfu opfu.
- ⁶ I gudeakwa ọnu ngu anma
 onwongu ikpe.
 Ọ tọ bụekwa mbẹdua anma
 ngu ikpe.
 Ọ bụru ogbogboromọnu ngu
 agba ngu ekebe.

- 7 ?Bụ ngu bu nwa mbụ,
e beberu nwua?
?O dụ g'i vu úbvú úbvú ụzo
nọdu l'eliphe-a?
- 8 ?O dụ g'i nụmaru idzu,
Chileke chiru?
?Tọọ ịiri l'ọo ngu maru iphe
nwẹkinyi ngu?
- 9 ?Bụ gunu bẹ ị maru,
anyịbedua amadu?
?Bụ gunu bu iphe,
edoje ngu ẹnya,
te edodu anyịbedua?
- 10 Ndu ishi buwaa ẹwó ẹwó;
mbụ ndu kahụwaru akahụ
bẹ anyi l'ephe nọkwa l'ẹka-a;
mbụ ndu a nwụadaru
tẹme a nwua nna ngu.
- 11 ?O dụ g'obu ono, Chileke adu
ngu ono parụ ngu nwanshịi
l'ẹnya; mbụ opfu ono,
a tọru nwẹhu rwebe ẹhu
erwebe epfu anụ ngu ono?
- 12 ?Denu g'o gude ị haa ọkpoma
ngu g'o duta ngu dufu?
Mbụ-a; ?denu g'o gude ẹnya
nọdu atụ ngu vaavaava
g'ootu ngu ono
- 13 kẹ g'i woru ẹhu-eghu ngu
atụ-koshi Chileke;
tẹme opfu, dụgbaa ẹgube ono
shigbaa ngu l'ọnu afushi?
- 14 ?Bụ gunu bẹ nemadzu bu kẹ

- gę ọ bya adubebe ree?
 Mbụ-a; ?bụ ụnu be
 nemadzụ ono,
 bụ nwanyị nwuru iya ono
 bụ kę g'ọ pfube-ẹka-oto?
- 15 Ọ -buru lę Chileke te
 egudedu ire ndu nkiya ẹka;
 ọphu imigwe adubebedu
 ree l'ęnya iya;
- 16 ?tọ kadunu ta agube
 nemadzụ iphe;
 mbụ nemadzụ ono,
 adudu iphe, ọ bụ;
 tẹme urwuali ji iya ẹhu;
 tẹme ọ nọdu angu ejo-iphe
 g'onye angu mini?
- 17 Ngaberu mu nchị ree gę mu
 mee g'iphe doghee
 ngu ęnya edoghe;
 gę mu kọoru ngu iphe,
 mu gudewaa ęnya mu huma;
- 18 mbụ iphe, ndu maru iphe
 pfuru tọgbo iya ẹba;
 ọphu ọ dudu iphe,
 ndiche phę pfuru phę duru
 ọphu ẹphe domiru edomi.
- 19 Ndiche phę ono bụ phę
 gędegede bę a nuru alị-a;
 ọphu ọ dudu onye lwaru
 alwalwa, tųswaru
 l'echilabọ phę.
- 20 Sụ-a; onye ejo-iphe
 anọdujekwa atsụ pfupfupfu

mkp̄urumkpuru
 jas̄ukpoo g'̄oo-n̄o-beru;
 ndu ewebushi ak̄urepho
 n̄odu an̄oduje
 aghak̄otaep̄ho gburugburu
 l̄e nwime apha olemole,
 e doberu ph̄e l'eliphe-a.

21 Ip̄he, an̄oduje aph̄u iya
 gbudugbudu l̄e nchi
 b̄uerup̄ho ip̄he, eye ebvu.

Teke ip̄he duk̄poo
 rengurengu kp̄o;
 noo teke ndu abalidebv̄u
 abyaj̄e ibe iya.

22 Ọ to byadu ekwe l̄e ya a-lwa
 ndz̄u l'ime ọchii ono,
 ọ bah̄uru ono.

Ọ buru l'ogu-echi b̄e
 oo-mecha laa.

23 Ootsojeru aghap̄he ach̄o ẹka
 ya a-kpata nri.

Ọ -n̄odu l'ọoji s̄u:
 “?B̄u awe b̄e ọ n̄o?”

Ọ maanar̄u-a l'eswe,
 a-gba ọchii b̄e n̄okwa
 iya ntse.

24 Ējo ip̄he-ehuka ȳe ip̄he-aph̄u
 abyaj̄e abyab̄e iya
 ndz̄u-aḡugu l'eh̄u.

Ēp̄he an̄odu echeru iya
 ẹka mgba g'onye eze,
 doziru onwiya abya
 eje ọgu.

- 25 O buru iphe, tukoru iya
 kpaabụ l'ootsuru
 Chileke ẹka l'okpoma.
 Teme o nọdu ekoshi ophoo
 l'iphu
 Okalibe-kangokotaru-nu.
- 26 Oogudeje olu,
 aha kpaakpa
 agba biribiri etso iya ogu;
 parụ phosa phosa iphe,
 shihuru ike,
 ya e-gude gboberu onwiya
 l'ogu, yee ya alwu.
- 27 "A makwaru-a l'iphu aza
 iya tootootoo;
 o tsua anu ke nyimunyimu
 l'upfu;
 28 obenu l'eka oo-mecha buru
 bu mkpukpu,
 buwaa ochobu;
 buru l'okorobo ulo,
 adudu onye bu iya nu;
 ulo, a hawaru; o buru ikpozu.
- 29 O too nweheduru iphe;
 ophu eku iya a-noribeduru;
 ophu iphe, o setaru eseta
 ejedzuduru ali iya.
 30 O toonahudu ochii.
 Teme o buru oku e-mechaa
 kee irwu, o rwuru.
 Chileke a-phua ya onu
 phukashia.
- 31 G'o to jekwa eme onwiya

eswe l'akporu obu ye l'iphe,
 abudu iphe;
 kele o to dudu iphe,
 oo-rita iya.

32 O too no-rwudu ndzu l'ishi;
 l'a pfuwaa ya ugwo iphe,
 oome pfu-dzua ya ya
 apfu-dzu;
 ophu ekali iya ajadu ajaja.

33 Oo-du ge vayinu,
 e chikoshiru akpuru iya
 l'ebe o cha achacha;
 mbu l'oo-duephoo g'oshi
 olivu, tuchaaru ige;
 o rishihu;
 34 kele iphe, bukpo ndu ta
 atsudu Chileke ebvu
 a-gbakotaru eka nwa.

O buru oku e-tsufu ulo ndu
 yeru obu l'eri uphalazu.

35 Egube ndu ono atsutaje
 ime ncho-kopfu.

E -mechaa; ephe anwua
 ejo-ememe.

Eregede du phe l'epho
 evu evuvu."

16

Jobu epfu l'onya iya phe duru iya ehuka

¹ Tobudu iya bu; Jobu bya
 eyeo onu su:

² Mu anumajehaakwa egube
 opfu-a, unu epfu-a.

- Ayọ ọshi k'unu bẹ unu
 gudekwa ayọpyashi
 nemadzụ ayọpyashi.
- ³ Opfu, pherephere apa ono,
 unu epfu ono;
 ?tọo bvụdu abvụbvụ?
 ?Bụ gụnu bẹ kpatsuru unu
 k'epfu g'unu epfu ono?
- ⁴ Mbẹdua gege epfukwa g'unu
 epfu ono;
 ọme ọ duru unu g'ọ duru
 mu-a.
- Mu gege anọdukwa epfu
 ẹrengete opfu gude eyeru
 unu ọnu;
 ekweru unu une.
- ⁵ Ọle mu gege akabekwa gude
 ọnu mu dọa unu obu;
 mbụ l'ọshi, mu gude obu mu
 phọ yọoru unu gege
 emekwa g'ẹhu gụa unu phoo.
- ⁶ Ọle ọ bụ; mu -pfua opfu gẹ
 mu epfuhabe;
 iphe, eme mu nụ emeጅ
 mu-a l'ẹka oome mu.
- Teke mu harụ epfufu;
 ?bụ g'ọ ka mma?
- ⁷ Mbụ-a; Chileke mewaru;
 ike bvụ mu;
 bya eworu ndibe mu l'ophu
 mee; ẹphe lakọta l'iyi.
- ⁸ O mewaru mu;
 mu gbajọshihuchaa
 agbajọshi.

Ono buru iphe, ekebe du.
 Awufu, mu wufuru buru
 okpu bukwaru pho iphe,
 agba mu ekebe.

9 Chileke gudewaa ehu-eghu
 lajashia mu alajashi;
 mu bya adu iya ashi;
 teme o nodu ataru mu
 eze nyikinyiki.

Onye ohogu mu ono nodu
 agba mu enya agbagba.

10 Ndiphe anoduje ebvu mu
 onu l'ehu.

Teme ephe nodu anoduje
 echi mu eka le nchi
 gude eme mu iphe-iphere;
 mbu tugba nanu g'ephe
 kponyia mu enya.

11 Chileke nwuwaru mu
 yeru ndu ejo-iphe;
 mbu-a; o nwuwaru mu ye
 ndu ejo-iphe l'eka.

12 Ehu shikpøekwapho
 du mu gubala;
 o bya anyakashia mu togbo;
 pyita mu l'ekpiri woru mu
 hua ehurugehu.

O woru mu mee iphe,
 o gude anwu agba mgbeka.

13 Apfu iya shi mu l'iphu shi
 mu l'azu ada mu l'ehu
 purumu purumu.

Ophu imemini mu adukpoda

- ya g'òosufushi mu meji.
 Ọtso-ilu mu nọdu awụ l'alì
 kẹ torotoro.
- 14 O -gude l'o yeru mu ọru l'o
 yekwase mu iya ọzo.
 Ọ nọdu azuje mu gburumu
 pfulii g'onye ọgbogu.
- 15 Mu chitawaru uwe-aphu
 kpube onwomu;
 bya eworu ukuu-nya mu
 nwua l'imime urwuku.
- 16 Mu rawaru ẹkwa;
 ẹnya chakota mu kẹ tororo;
 mbu l'nya gbahukotawaru
 mu kẹ tsukiribaa.
- 17 Ọle ọ to dukwanu
 iphe-kpanganga,
 mu asu le mu mejeru.
 Teme epfupfu, mu anọduje
 epfu anu Chileke buru
 iphe, doru risaa.
- 18 Gube ali; te erikwa mee mu!
 Jiko ge mkpu,
 mu echi ba adamihukwa
 adamihu!
- 19 Mbu le ntaakponu be
 onye-ekebe mu nokwa
 l'imigwe.
 Onye agbaru mu odzori
 anodukwapho
 l'ephekerephe.
- 20 Ọo ndu mu l'ephe eshi onya
 ekweru mu une.
 Ọle onye mu arakwanu ẹkwa

ekpu bụ Chileke.

21 E gege akabekpoo rwo
Chileke l'iswi ehu nemadzu
egube ono, nemadzu arwoje
arworwo l'iswi ehu
nemadzu ibiya ono.

22 “O kwa nwapha olemole
phoduru;
mu ejeshia iphe-ozo ono,
bu: mu -jee ya mu ta
alwabaedu onoya.

17

1 Okpoma ta aduekwa mu
ree.

Eswe ndzu mu be e meakwaru;
o tsu-phu azu.

Ilu echeakwa mu echeche.

2 Mbụ le ndu noru mu
mgburugburu
bukotaepho
ndu ekweru mu une.

O buerupho eka enya mu
atubaje bu l'aphu,
ephe akpatsushi mu.

3 Natanu mu mkpalaka;
jiko Chileke;
kele o to dudu onye ozo,
suru g'ona mu mkpalaka
gbahaa gubedua.

4 I mechiwaru phe eka
egomunggo;
ophu o duedu iphe,
edoje phe enya.

- Ọo ya bunu l'i tii kwedu
 g'ẹphe mekpee mu.
- 5 Onye jikaru ndu ọle iya
 eshi ọnyà l'opfu g'e bua
 ya nggo bukwa unwu
 iya be ọnya e-mechaa
 nyishihu.
- 6 Chileke mewaru mu iphe,
 onyemonye gude
 atụ phukuku.
- Mu buru onye ndiphe agbu
 ọnu-mini l'iphu.
- 7 Mu jewaru iphe-ẹhuka jasụ mu
 nọdu aphuwaa ragaraga;
 mbụ l'ẹhu mu l'ophu erewa
 ọphere.
- 8 Ndu obu pẹ guru ìphóró
 be ọ tufuru ẹhu.
- Ndu iswi dụ mma swọlihu
 tsoru ndu te emedu
 ele Chileke.
- 9 Ọle g'ọ dọhabe;
 ndu pfuberekoto
 a-buenurupho onye
 ẹphe bụ;
 tẹme ndu iswi dụ mma
 a-nọdu akaẹpfo ọkpẹhu
 eje.
- 10 Obenu l'unubedua;
 unu bya atuko g'unu ha
 nọkobe.
- Ọle ọ bụ; mu ta ahumakwa
 g'ọ ka mma l'ọo onye lanu,

maru iphe lẹ g'unu ha.

11 Eswe ndzụ mu bvụakwaru;
 iphemiphe,
 mu rịru k'ememe bụakwaa
 kẹ mmanụ.

Nokwaphọ g'iphe gụru mu
 ẹgu ememe dụkwapho.

12 L'unubedua woru ẹnyasi
 kua echi eswe.

Ọ bụru l'ẹka ọchii gbaru
 tsukiribaa bẹ ẹphe nọ sụ:
 Ha! Ìphóró adụakwanu.”

13 Ọ -bụru lẹ mkpakọ unuphu
 mu ele ẹnya iya bụ
 alị-maa;
 ọ -bụru l'ẹka mu e-je agbaa
 iphe-azẹe bụ l'ẹka gbaru
 tsukiribaa;

14 Ọ -bụru lẹ mu sụru ilu
 l'ọo ya bụ nna mu;
 bya ekua ẹkà nene mu;
 ọzoo kua ya nwune mu;

15 ?bụbahunaa gụnu ọzo bẹ
 mu e-lebaa ẹnya iya-a?

?Bụ onye a-sụbaa mu l'ọwa-a
 iphe,
 mu a-nọdu ele ẹnya iya
 bụ ọwa-a?

16 ?Oo-tsoru mu nwuda
 l'alị-maa tọo?

Anyi l'iya a-tụko bụru
 wurumu l'ilu tọo?

18

Bilidadu abaru Jobu mba

- ¹ Tɔbudu iya bu; Bilidadu,
 bu onye Shuwa bya eyeeru
 iya onu su iya:
- ² ?Denukpoo teke ii-pfubuhu
 g'iipfu owa-a?
 G'egomunggo dunu ngu;
 k'ophu anyi a-maru g'anyi
 e-gude eye onu l'iphe-a.
- ³ ?Denu g'o gude anyi du g'anu
 l'enya ngu;
 mbu l'i tukoru anyi kua
 ndu mmanu?
- ⁴ Gube nwophu ehu ghutaberu
 egu;
 k'ophu i woru onwongu
 labushia nanu nanu;
 ?bu g'a gbadoru ngu
 mgboko l'ophu?
 Tɔo ?bu g'e je aphoshiaru
 ngu agbara mkpuma
 g'o to duhe l'eka o du?
- ⁵ "Sua; iphoro, duru ndu
 ejo-iphe be aa-phunyikwa;
 ophu oku iya enwuekwa
 enwunwu.
- ⁶ Iphoro, shi du l'ulo iya
 a-bukwaru ochii.
 Oku anyihu l'oroku,
 o su-kuberu onwiya.
- ⁷ Okpa ono, o shi azoje
 gbunyingu gbunyingu ono

ta adụekwa ike, adụ iya nū.
 O bụru iphe, ọ chīru idzu
 ememe e-nwuta iya
 tūa kpurumu l'alī.

⁸ Ọkpa, ọ zọru azọzo bụ l'ẹka ọ
 zọru iya bụ l'ụgbu,
 e geru doberu iya.

Teme ọ bụru l'eli igbudu
 bẹ ọo-zọ ọkpa.

⁹ Agburu, e kweberu iya a-tụ
 iya l'ichiripfu ọkpa.

Ọ-tụ-gburumu atūa ya swiṣwia.

¹⁰ A tūru obu-alī domiaru iya
 l'uzo, ooshi;
 bya agbabekwaru iya phọ
 ọnyà lẹ gbororo.

¹¹ N-yemebvu emeje gẹ ndzụ
 gụ iya l'ekameka, ooshi.

Teme ọ nọdu anọduje etsoe
 ya phọ pūrupuru l'iphe,
 bụkpoo ẹka ọ zọru ọkpa.

¹² Ike shi dū iya;
 obenu lẹ nta-a bẹ ọokpuwaa
 rigorigo.

Teme eze iphe-ehuka nọdu lẹ
 mgboru iya kwaberu iya
 m'obvu teke ọo-da.

¹³ Akpọ, dū iya l'ehu bẹ
 ọonoduje atapyashi.

Ọkpara anwuhu nọdu
 atukoje iya ọkpa yee
 ẹka tajishia.

¹⁴ Aa-kpūta iya l'okpehu

kpufu l'òbú iya,
 bú ẹka ọ kpọru obu ye;
 dube iya ẹka je enwuru
 yeru onye eze n-yemebvu.

15 Ọ tọ duedu iphe,
 nọ l'ulo iya ọphu ẹka
 iya a-du.

Ọ buru ọku nshì-egbe bẹ
 ee-woru kpua l'ulo iya.

16 Ọo-kpọhu nkú jasú
 l'ogbarabvu;
 nwua lwaa jasú l'ẹkali iya.

17 Ọ tọ dudu onye anyatabaa
 ya nù l'eliphe-a;
 ọphu oonwehedu ẹpha
 lẹ mgboko-a.

18 Aa-chifuta iya l'ẹka ìphóró
 dū;
 chiru iya je eye l'ẹka agba
 ọchii;
 mee ya l'ọ chihu lẹ mgboko
 mgburugburu.

19 Ọ too dobedu nwa;
 ọphu o nweedu abubu lẹ
 ndu ẹka o shi.

Ndibe iya ta aduedu adudu
 ọphu l'ẹka o bujeru.

20 Ndu shi l'uzo ẹnyanwu-ariba
 -bya bya ahuma
 g'oonwuru iya;
 ndzụ erwuta phe.

Ndu shi l'uzo
 ẹnyanwu-awawa

-huma iya;
ishi anyia phe edzu.

21 Hoo haa; nokwa g'oduje
l'ibe onye eme ejo-iphe,
bu onoya.

O kwa egube ono bu g'oduje
l'unuphu onye amadu
Chileke."

19

Jiobu epfu g'opfu ono gude erwube iya l'ehu

1 Tobudu iya bu; Jiobu bya
eyee onu su:

2 "Unu a-nukpoo mu aphu
owa-a,
unu anu mu owa-a jasu
teke ole?

?Bu teke ole be unu
e-gweberu mu uji owa-a,
unu gude opfu egwe mu
g'unu egwe mu owa-a?

3 Owaa kwewaa ugbo iri,
unu koru mu onu;
ophu iphere adudu unu eka
unu abya mu l'iphu
ehuka-ehuka.

4 Ome o bukpoonu l'oo eviya
le mu shiswewaru uzo;
emeswe obu, mu mesweru
obu bukwa mu be o no swiru.

5 Unu -nodu etu onwunu
ophushugbu eje
abyapfuta mu;

bya egude iphe-iphere,
anwuru mu nụ abarụ mu
mba;

⁶ unu maekwarupho
l'ọ kwa Chileke meru mu eji.

Ọo ya woru ugbu-egege iya
woru lọ-pee mu
mgburugburu.

⁷ Mu chia mkpu sụ l'eemekwa
mu eji;
ọphu ọ dudu onye yeru
mu ọnu.

Mu chia sụ g'a gbaaru
mu mkpu;
ọphu ọ dudu onye haru
mu enge.

⁸ Ọo Chileke nọ-chiru mu
uzo gę mu ta aghatashi.

Ọ bya emee; ọzo,
mu eshi gbakota ọchii.

⁹ Ọ nafuru mu ụbvù,
e shi akwabeje mu;
bya eye ẹka kputa mu
okpu-eze, mu shi kpuru.

¹⁰ Ọ tọ dukpodaa ọzo,
o to shidu alajashi mu
kẹ tarara tarara jasụ mu
bvụ gę mu bvuru-a.

Iphe, mu ele ęnya l'oo-me
l'ẹhu mu bẹ o phefuaru
g'onye phefuru oshi.

¹¹ Ẹhu-eghu iya bẹ o mewaru;
o nwuhu ọku l'ẹhu mu;

bya aguru mu yeru ndu
 ọhogu iya.

12 Ojogu iya phe ọdu
 aso kpereree abyapfuta mu.

Ephe kepee mu ekepe;
 bya anọ-pee ẹka mu
 bu mgburugburu.

13 Ndu mu l'ephe bu nwune
 be o bukafuru mu l'ephe;
 bya emee ndu mu l'ephe
 shi aswi ọswi;
 ephe gbakashihu.

14 Ndu mu l'ephe bu ipfu
 gbawa nanu-nanu.

Epuru ọnyà mu phe
 zohashia mu.

15 Ebyaa, byaru mu nu;
 me ndu bu ohu mu gu
 mu l'onye lwaru alwalwa.

Ephe ọdu asuje le mu
 bu onye ohozo.

16 Mu -kua ohu mu oku;
 o toọ zadu mu enu;
 l'eka mu gudekpokwaa
 onu mu rwo ya arwo.

17 Udzu onu mu ọdu
 eshijechaa nyee mu ishi.

Unwune mu gedegede
 ọdu ebuhachaa mu ebuha;

18 mbu l'unwegirima
 nshii yichakwa le ndu
 epfutoshi mu nu.

Ephe -huma mu;

- ẹphe achi mu ọchi.
 19 Ndu mu l'ẹphe shi ọdu
 phakuu
 bẹ mu dukotawaa ashi.
 Ndu mu yeru obu ghaa
 ọhu meahaa iphe,
 a-tsuru mu nu.
- 20 Nta-a ta aduedu iphe,
 mu bu,
 abudu phulaphula akpo
 yee ojogorogo okpu.
 Nta-a buwaa iphe,
 phoduru mu l'onu,
 gege aburu eze bu
 egbu kpoloko.
- 21 Unu kabenu phuru
 mu obu-imemini unubedua,
 mu l'unu eshi onya.
 G'imemini mu kabenu du unu;
 lo kwa Chileke chiru
 mu eka-a, mu l'iya eme-a.
- 22 ?Denu g'o gude unu je
 anodu achikwa mu pho
 ge Chileke achi mu?
 ?Unu teke atajikpoda anu
 mu epho?
- 23 O du mu g'a su l'iphe-a,
 mu epfu-a be eede edede
 lekwo;
 mbu g'a su l'e ebyiru iya
 ebyibi l'ekwo dobe;
 24 l'e gude mkpurukpu-igwe
 dee ya l'eli mkpuma;

- mbụ kaa ya akaka l'agbara
mkpuma g'ọ nọwaro ojejoje.
- 25 Ọle ọphu mu maru bụ
l'onye a-gbafuta mu nụ
nọ-a ndzụ;
l'e -mechakpọepho l'ikpazu
iya bẹ ọo-pfuru-a l'eliphe-a.
- 26 Lẹ teke e
mebyishichakpọorunu
akpọ-ẹhu mu ọwa-a
bẹ mu e-gudele-a anụ-ẹhu
mu hụma Chileke.
- 27 Ọo mbẹdua l'onwomu
e-gude ẹnya mu
hụma iya gẹdegede;
ọ tọ bụdu onye ọzo;
mbụ l'oovukpọo mu
evuvu l'ọkpoma shii.
- 28 Unu -jee l'asụ:
'?Anyi a-chihunuru iya gụnu;
l'ẹka ọ bụ iya bẹ iphe-ẹhuka
ono l'ophu shi l'ẹka.'
- 29 Unu tsunapho ogu-echi
Chileke ebvu;
unubẹdua l'onwunu;
kele oke ẹhu-eghu bụkwa
og-echi bẹ oowotajeru
nemadzụ.
- Ọ bụru teke ono bẹ unu
a-maru l'ikpe dụ."

20

Ọnu, Zofa yeru

- ¹ Tɔbudu iya bu; Zofa, bu
 onye Nama bya eyee onu su:
² O kwa l'egomunggo agbanuka
 mu gharaghara meru g'o
 gude mu nodu eye onu-a,
 mu abya eyeye-a;
 kele ehuru te ebvuduru
 mu ebvuru.
³ Mbụ lẹ mba ono, mu anụ ono
 bẹ iphere iya dụ mu.
 O buru iya l'akpali mu eye onu.
⁴ Ire-lanụ bu opfu bu l'ị maru-a
 g'iphe dukpoo e -shi lẹ ndiche;
 mbụ eshi ophu e meru
 nemadzụ dobe l'eliphe.
⁵ Ị maru-a l'onye ejo-iphe bẹ
 ehuru-utso nkiya abujele-a tsokere;
 mbụ l'onye amadụ Chileke bẹ
 ta adudu g'ootebejeru eswa.
⁶ A makwaru-a l'eku-onwonye
 nkiya erwuje akpaminigwe.
 O nodu apangobeje ishi
 ehuka-ehuka;
 k'ophu ishi iya ejeje
 asu-pfuru l'urwukpu.
⁷ Ole oo ge nshi, o nyiru
 anyinyi erekashihuje-a
 bu g'oo-rekashihu jasụ
 l'ojejoje.
 Ndu shi ahumaje iya nu
 e-mechaa ajije su:
 ?O jhunuru awe?
⁸ Oo ge nrwo ephukashihuje-a

bụ g'oo-phukahụ;
 ọphu a hụmabaedu iya
 ọhumalenya;
 mbụ l'oo-me phosamu
 g'ophulenyà, a phuru l'enyashi.

9 Onye shi hụma iya nụ -nonyaa
 be ọ tọo hụmahedu iya ọzo.

Okpokwu ibe iya ta
 ahụmabaedu iya ọnya
 ọzobaa.

10 O bụru ụnwu iya e-mechaa
 pfula ndu akpa nri
 ụgwọ iphe, o meru phe.

Mbụ l'ephē e-mechaa gude
 ẹka phe nụ-phuchaa phe
 ẹku phe ono azu.

11 Okpēhu okpēhu ono,
 o shi eme k'okorọbya ono
 etsoru iya bụru wurumu
 l'ilu.

12 A makwaru-a l'ejo-iphe
 atsoje iya utso l'onu.
 O nọdu akpụjeru ẹjo-iphe l'onu;
 gude ire sụ-mia ya.

13 A makwaru-a l'ọ tọo dọjedu
 ike haa ẹjo-iphe g'o je;
 l'o wojeru iya kpuru
 akpuru l'onu.

14 Olee nri, o riru eriri
 e-mechakwanaa nọdu
 iya l'ephō shiahaa ishi.

Nri ọbu e-mechaa dọ iya
 l'ẹhu g'onye óghù tsọru onu.

15 Noo teke ọo-gboshi ẹku ono,
 o shi elwee kawomu
 kawomu onoya;
 mbu le Chileke e-me
 g'ephio iya tuko iya nwashia
 g'ọ ha.

16 L'ọ wata ericha ọnu-mini
 óghù.

Ọ buru ire, óghù meru
 nmeremu e-mechaa
 kpọ-nyia ya ẹnya.

17 Ọ-sọ-gborogboro ono taa
 aduedu iya k'ele ẹnya;
 mbu nggele ono, bu iphe,
 agba iya dederere bu
 manu-ẹnwu yee mini
 era-eswi ono.

18 Iphe ono, o seru akanya
 iya ono be oo-mecha
 nu-phu azu;
 o too ridu iya l'onu.

Urwu, dabaru iya le ngho,
 o gbaru ta atsohedu iya utso.

19 Iphemiphe ono buru opfu l'o
 mewaru ndu akpa nri
 mkpawere woru phe
 togbo mgbegere.

O yeru aka nata ndiphe ulo,
 o to kpuduru.

20 Hoo haa; eshinu o to
 nmapfujeduru anmapfuru
 l'eme ughoro be o to
 dukwa iphemiphe ono,

- agụ iya nụ ono duru ophu
oo-nweru;
ophu eku iya adzokwanu iya.
- 21 O tọ duedu iphe, duru iya nụ,
bụ iphe,
oo-gude ria gwoo-gwoo.
Eku iya ta adukwa eka
o-n-beru.
- 22 Oo teke o nọ eri g'ọ dụ iya
be ọla-l'iswi atuje iya l'upfu;
mbụ aphụ asọru kpulakpula
bya asọ-kputa iya ishi.
- 23 Epho -bya eji iya;
Chileke atukoepho oke
ehu-eghu iya byabe iya l'ishi;
chie ya pho gbaa-gbaa.
- 24 Teke o ketarụ oso nahụ
mgbo-igwè;
apfu, e kweru l'onwirubvu
eguru iya l'okpurukpu.
- 25 L'ọ bya ephefu iya
l'okpurukpu iya;
mbụ phefu iya mpyipyi
iphe-igwè ono,
charu oku gbarara ono
le meji.
- Ndzu-agugu emee ya omeliwe.
- 26 Eku iya l'ophu aburu iphe,
kuru l'ochii.
Oku, e nweziduru enwezi
enwulihu woru iya
kepyashia tsupyashichaa
me nwa ndu phoduru l'ulo

iya.

²⁷ Akpaminigwe l'ophu atuko
 ejo-iphe,
 o mekotaru kpuhaa ghebe
 onu.

Ali agbalihu gbaa ya ekebe.

²⁸ Mini abyaa utso bya ekpota
 ulo iya;
 mbu o-gba-gborogboro
 mini a-bya mboku,
 Chileke a-tu-koshi iya
 ehu-eghu iya.

²⁹ Noo egube obunggo,
 Chileke ebuje ndu ejo-iphe;
 teme o buru okiphe,
 Chileke gude aka iya
 keru nu phe.

21

Jiobu epfu ge ndu ejo-iphe ababeje uba

¹ Jiobu bya eyee onu su:

² Unu ngabekwa nchi
 ree l'opfu-a, mu epfu-a.

G'ono bukpoorunu obu unu
 du mu iya.

³ Unu takpoeppo nshi haa ge
 mu pfughee.

Mu -pfuchaa; unu emeahawa
 mu ro sukusuku obu.

⁴ Aphu, mu agu; ?bu nemadzu
 be mu aguru iya?

?Denu aka mu e-gude taa nshi?

- 5 Unu lee mu ɛnya ree;
 hɔma l'unu a-kpɔ beru.
 Unu woru ɛka hua l'ɔnu.
- 6 Ɔobujeru; mu -rɛnyaa iphe-a;
 ndzɔ aguaha mu;
 ɛhu aphukota mu
 kpaakpaakpaa.
- 7 ?Dɛnu g'o gude ndu ɛjo-iphe
 nɔdu anɔduje ndzɔ;
 kaa nka; ɛphe abɔru ndu
 ike dɔ?
- 8 Ɖphe anɔdu hɔma;
 unwu phɛ ekofutachaa
 bya ebuchaaru shihu ike
 nɔ-pee phɛ mgburugburu.
 Ɖphe anɔdu gude ɛnya phɛ
 hɔmachaa nwanwanwaranwa
 phɛ nno kwaphɔ.
- 9 Unuphu ibe phɛ adakɔta jii;
 ɔ tɔ dɔdu ndzɔ-agugu,
 adɔ iya nɔ; ɔphu Chileke
 echidu phɛ ɛchachi.
- 10 Oke-eswi ibe phɛ eyeɛpho
 eswi ime l'o rwuberu iya.
 Eswi phɛ ono atsɛpho ime eje;
 ɔ tɔ dɔdu ɔphu ekwo nwa.
- 11 Ɖphe anɔdu azushi unwu
 g'ikpoto aturu.
 Unwegirima ono -teru ebvu
 shia ɛkiya-a;
 ɛphe eteru iya shia ɛkiya-a.
- 12 Ɖphe egude ogumogu gude
 une agu ntumatu.

Èphe eme ẹmereme egbu opu
eye iya.

13 Èphe eria gwoogwoo;
tɔsaru ẹhu jasɔ g'ẹphe
a-nọ-beru.

Mbọku, ẹphe a-nwuhu;
ẹphe anwuhuepho ẹ
nchị-odoo.

14 Èphe asuje Chileke g'ọ parɔ
phẹ haa;
l'ọ tọo gudu phẹ ẹgu amaru
uzo iya.

15 Èphe asu: ?Bụ onye bẹ
Okalibe-kangokotaru-nu bụ
kẹ g'ẹphe jeeru iya ozi?
?Bụ gunu bẹ ẹphe erita l'epfu
anu iya?

16 Ophu ẹphe amadu l'ajàjà,
ẹphe jàru ta abudu phẹ
bẹ o shi l'ẹka.

Noo ẹka mu gude ophu mu
ayidu l'idzù, ndu ẹjo-iphe
achi.

17 O ọ bụ; ?ọ dukpooru teke
aaphunyije oku ndu ẹjo-iphe?

?O dukpooru teke eze
iphe-ẹhuka abyapfutajẹ phẹ;
bụ iya bụ obunggo ono,
Chileke egudeje ẹhu-eghu
bua ono?

18 ?O dukpooru teke aanonyaje;
ẹphe adu g'ẹswa okponku,
a kuberu l'ẹka pherephere ezi;

mbụ ẹphe adu g'ẹswa ereshi,
oke pherephere ezikashi?

- 19 A sukwaru ẹ Chileke
ewojeru iphe, o gogo me
nemadzu doberu unwu iya.
Ole o bu; g'o wojeru iphe obu
mee onye meru iya nu;
k'ophu onye ono a-maru
l'oola ula iphe, o meru.
- 20 G'o gude ẹnya iya huma
ola-l'iswi, a-byapfuta iya nu.
G'oke ẹhu-eghu
Okalibe-kangokotaru-nu
tukokwaru iya l'ishi.
- 21 Kele nwa onwa olemole,
a nuru iya l'eliphe-a -bvụwa.
?O kpakwadu ishi ndu
o haru l'eliphe me o towaa azu?
- 22 Su-a; ?o duru onye suru
g'oo-zi Chileke mmamiphe;
eshinu o bu iya ekpeje ndu
kikota shii ikpe?
- 23 A -nonyaa; nwoke
agbakwohu nwuhu;
onye ẹhu du guu;
ophu o dudu iphe,
atsu iya l'ẹhu;
24 onye ẹhu ẹbebe nwa
pukalapukala;
umi tsuru iya l'okpu.
- 25 Onye ozo ejekpọephọ
iphe-ẹhuka teme l'onwuhuje;
mbu l'ẹhu teke atso-swee

ya uto.

26 E -mechaa l'a tuko phe libe
l'ali;
ekà atuko phe ripyabe.

27 Iphe, unu ari dokwaru mu
enya ree;
mbu iphemiphe ono,
unu gude oriri kpakoo bo
mu onoya.

28 Unu pfuru su: ?Bu awe be ulo
oke amadu nohunu;
mbu ulo ono, ndu ejo-iphe
shi bugbaaru onoya?

29 ?Unu teke aji-swekpoo ndu
ije aji?

?Unu teke ato-swee nwehu
gbua igo l'iphe, ephe gude
onu phe ako?

30 Su l'oke iphe-ehuka byaru oha;
ophu o dudu iphe,
o meru onye ejo-iphe.

Chileke bya atu-koshi ndiphe
oke ehueghu iya;
ophu o dudu iphe,
o meru onye ejo-iphe.

31 ?Bu onye apfujeru iya l'iphu
gbaa ya iphe, oome?

?Bu onye apfuje iya ugwo iphe,
o meru?

32 Eelije iya l'ilu lirwee elirwe.
A gbenu eche ilu iya echeche
g'o to du iphe, e-me iya nu.

33 Eja, shi le nsuda a-du iya ree

l'èhu.

Ndiphe l'ophu awu etso iya l'azu;
teme ndu ophu bu aguta
aguta vuwaru iya uzo
wuru jeshia.

34 “Sụ-a; ?bu mkpokoro opfu
ono, unu epfu ono bu obu,
unu nodu adu mu iya nta-a
to?

Kele iphe, bu onu, unu eye ta
adukwa iphe, du iya nu,
abudu uka be unu adzushi.”

22

Elifazu ebo iya Jiobu ozo

1 Tobudu iya bu; Elifazu onye
Temanu bya eyee onu sụ-a:

2 ?Bu Chileke be nemadzu
abarụ urwu?

Mbu-a; onye maru iphe;
?o-bakporu iya nu urwu?

3 ?Bu udu ehu-utso gunu be
oo-meru nu
Okalibe-kangokotaru-nu
m'o buru l'i bu onye
pfuberekoto?

?Bu gunu be oo-rita iya;
ome o o ke g'a sụ l'o to
dudu uta, du ngu l'èhu?

4 ?Bu l'i bu onye atsuje iya
ebvu be oobaru ngu
mba iya?

?Bu iya be o gude kua ngu

ikpe tọo?

⁵ Ọo ẹjo-iphe ngu pakpooru
ẹka apaa.

Iphe-ẹji, iimeshi bu aguta aguta.

⁶ Mkpaleka, iipfu g'unwune
ngu naa ngu te nwekwa ishi.
Gube onye atọtaje ndiphe ẹkwa,
ẹphe nma l'upfu gbabe
phe oto.

⁷ Onye ike bvuru be i ti
chebeduru mini.

I paru nri domiaru onye ẹgu
agu g'o to ri iya.

⁸ Ọle i bukwa oke amadu,
nweru ali ẹka ngu;
bya aburu onye aakwabe
ubvu buru l'ali obu.

⁹ Unwanyi, ji phe anọedu
-gbapfuta ngu l'i chiphu
phe azu; gbabe phe ẹka oto;
teme i nodu emeje g'ike
bvu ndu enwedu nna.

¹⁰ Ọo iphe ono meru g'o gude
a gbaa ọnyà gbaphee
ngu mgburugburu.

Ọtulupfu, eye ngu ebvu nodu
atsu ngu l'ehu.

¹¹ Ọo iphe ono meru g'o gude
ekameka gbahukota ngu
ochii; k'ophu o to duedu
iphe, ihumaje.

Ọ buru iphe ono meru g'o gude
utso gbawa gbamia ngu.

12 Ẹka Chileke nọ bukwa ẹka
kachaa ephekerephe l'imigwe.
Humawaro gẹ kpokpode
nọ-be ephekerephe!

13 I gbẹ sù: “Chileke ?ọ maru
ole?

?Oogbeje l'ẹka agba ọchii
ẹgube ono ekpe ikpe?

14 ?Mbù l'oke urwukpu
sopyaberu iya;
k'ọphu ọ tọo humajedu
anyi ẹnya m'ọ nọdu
aghaphe lẹ mgbaka igwe
yẹe alì.”

15 ?Bù ọzo, ịi-nọdu eshi bù
akahù ọzo ono,
bù ọzo, ndu ẹjo-iphe tọru?

16 Ndu ono bẹ a
kpọ-kwofukwaru
akpọ-kwofu;
ẹphe laa teke o teke
agbadu pẹ k'alala.

Ukporo-mini bya avua pẹ
l'ogbarabvu.

17 Ẹphe sù Chileke: “Parù anyi
haa!

?Bù gùnu bẹ
Ọkalibe-kangokotaru-nu
e-me anyi?”

18 Ọle ọ kwa iya vukoru iphe,
dù ree vujia ọlo pẹ evuji.
Noo ẹka mu gude ọphu mu
ayidu l'ìdzù, ndu

ẹjo-iphe achi.

19 Ndu pfuberu-ẹka-oto
ahumaje iyi, yiru phe
nu tee eswa.

Ndu iswi du mma achia phe
ochi su:

20 Tororo; ndu ohogu anyi
be a kabekwa mebyishia.

Oku tsuakwaru ẹku phe.

21 Su-a; wodurupho onwongu
see ase ẹ l'eka Chileke;
k'ophu gu l'iya a-du le ree.

Oo ya bu g'oojehuru ngu.

22 Natadupho anma okwa,
shi iya l'onu.

Woru opfu iya doo giriri
l'okpoma ngu.

23 Li -lwaphuta azu
lwapfuta
Okalibe-kangokotaru-nu
be oo-dophu ngu azu
l'onodu ngu.

I -tuko ẹjo-iphe, du l'ibe ngu
woshikota;

24 bya eworu mkpola-ododo
ngu l'ophu rwua le nu;
mbu tuko mkpola-ododo
Ofi ngu je achiru ye l'ogba
g'o buru mkpuma
no le mini;

25 noo teke
Okalibe-kangokotaru-nu
a-buru mkpola-ododo ngu;

buru mkpọla-ọchaa,
 kakọta ree, i nweru;
²⁶ noo teke
 Ọkalibe-kangokọtaru-nu
 atsoaha ngu uto;
 l'i paliaha iphu lee Chileke.

²⁷ Teke ono be ii-pfuru nu
 Chileke; l'ọ numa olu ngu;
 teme l'i mekwaaru iya pho
 iphe, i kweru ukwe iya.

²⁸ Ii-toje okpa iphe; l'e mee ya
 gi toru iya.

Ìphóró abya aduru ngu l'uzo,
 iishi.

²⁹ Teke e wozeru nemadzu ali;
 i -su g'e wolia onye ono eli;
 Chileke adzo onye ono,
 e wozeru ali ono;
³⁰ mbu l'oo-dzo ndu iswi
 adudu mma.

Ọ buru iphe, oo-gude dzo
 phe bu le gubedua
 l'onwongu du chiriri.

23

¹ Jiobu bya eyee onu su:

² Ntanu owa-a be aphu,
 mu agu erwukwa mu le
 meji.

Èka Chileke anyilekwaa
 tuduu l'ehu mu l'eka mu
 atsukpokwaa ude-a,
 mu atsua.

- 3 Ọme mu makpooru ẹka mu
 a-cho-vu Chileke.
 Ọ du mu g'a sù lẹ mu a-du
 ike jerwua ẹka o bu;
 4 mẹ mu apfuru iya l'iphu
 pfua g'ooghu mu;
 mẹ mu l'iya atẹ ya pho
 jasù mu epfugbua g'o
 jiru mu ọnu.
- 5 Noo teke mu gege
 amawaruro iphe,
 o gogo yeru mu ọnu;
 mẹ iphe,
 oopfụ edokwanaa mu
 ẹnya.
- 6 Ọo-gude ike-ọkpụ gẹ mu
 l'iya kpegba ikpe ọo?
 Waawakwa; o togo dukwa iphe,
 o g'aguru nù mu l'onoo iphe,
 mu meru.
- 7 Ọo l'iphu ẹka ono bẹ onye
 pfuberekoto gege apfuru
 kọoru iya iphe,
 atsù iya l'ẹhu;
 mẹ ọ dzọo mu l'ẹka
 onye-ikpe mu;
 mu enweru onwomu jasù
 l'ojejoje.
- 8 Obenu lẹ g'ọ du nta;
 mu -choo ya shia ọzo
 ẹnyanwu-awawa;
 mu ta ahumadu iya;
 teke mu chọru iya shia ọzo
 ẹnyanwu-ariba;

- mu ta ahụmakwa iya phọ.
 9 O -nọdu lẹ ndẹgu eje ozi iya;
 mu ta ahụmadu iya.
 Teke o shiru ụzo ndọhali;
 mu ta ahụmakpoda ya
 rọ ahụma ophu.
- 10 O le mbedua ta adukpoda
 ụzo, mu shiru, o madu.
 O buru iya bu o -huchaa mu
 ama;
 mu amaaha mma ge
 mkpola-ododo.
- 11 Okpa mu etsoekwapho eka o
 zoru okpa purupuru.
 O buekwapho ụzo,
 o toru be mu tsoru;
 ophu mu ahajekwaru iya
 shiahaa ụzo ozo.
- 12 Iphe, o suru g'e meje be mu
 teke ahaswekwaa ememe.
 Opfu, shi iya l'onu be mu
 kakwa agube iphe
 eme lẹ nri, mu erije
 mboku-mboku.
- 13 Obenu l'o pfuru akatakpa
 eka iya;
 teme ?bukwanu onye suru
 iya akwachị ụzo?
 Oo iphe, du iya ree ememe
 be oomeje.
- 14 O chiru idzu mee iphe,
 du iya ree l'ehu mu.
 O chibakwaaro egube idzu

- ono igwerigwe
 woru kwachiaru onwiya.
- 15 Oo iphe ono meru g'o gude
 o nodu abujeru;
 mu -nodu l'eka o no;
 ndzu agushi mu ike.
- Teke mu ritaru iya;
 ndzu aguhaha mu.
- 16 Chileke mewaru mu;
 meji nodu emewaa mu
 pheripheri;
 mbu le
 Okalibe-kangokotaru-nu
 yewaru mu ebvu.
- 17 O to budu ochii, l'agba nu
 meru ge mu dobe onu doo;
 mbu ochii ono,
 tukoru mu iphu
 rachia ono.

24

Umere ndu ejo-iphe

- 1 ?Bu gunu kparu iphe,
 Okalibe-kangokotaru-nu
 te edobejedu mboku,
 oo-kpe ikpe?
- Denu g'o gude ndu maru
 Chileke nodu anoduje
 ele enya
 egube eswe mboku ono;
 o to dudu ophu ephe
 ahuma?
- 2 Mkpuma a kporeru gude

kpa a oke aḷi bẹ amadu
aphoribejeru.

Ẹphe nọdu echechaa eche
aturu, ẹphe rwutaru l'iphuru.

³ Ẹphe nọdu achifuje
nkapfu-igara nwogbee;
bya anatajẹ nwanyi,
ji iya anọedu oke-eswi
iya l'itumo.

⁴ Ndu ukpa bẹ ẹphe
achiribejeru l'uzo;
tẹme ẹphe nọdu akpatajẹ
gẹ ndu akpa nri domishia
onwophe.

⁵ Oo gẹ nkapfu-igara-oswa
etsojeru echiẹgu aghaphe-a
bụ gẹ ndu ukpa etsojeru
aghaphe acho ẹka ẹphe
a-kpata nri.

O buru l'okorobo-ẹgu bẹ
ẹphe akpatajẹru unwu
phe nri.

⁶ Iphe, bụ mkpakọ nri,
ẹphe erije bụ iphe,
ẹphe tsoru oma ẹgu kpata
l'akpa.

Tẹme ẹphe nọdu ejejechaa
akpa obu eje iya l'ẹgu
ndu ẹjo-iphe.

⁷ Eshinu ẹphe enwedu uwe
bẹ ẹphe agbajẹru oto zẹe
futa utsu.

Oyi -tsua g'ọ tsuhabe;

ẹphe te nweduru iphe,
 ẹphe e-gude kpuchia
 onwophe.

- 8 Igwe -wata edze eze mini;
 mini, shi l'úbvú ono
 anmaa phe; ẹphe adu shegele.
 O buru l'agbara mkpuma be ẹphe
 ejeje anmakoru;
 kele o to duedu eka ozo,
 ẹphe a-gbaba je ekpuru.
- 9 Nwa, enwedu nna be a nataru
 ne iya teke ọongukwadu era.
 Ndu akpa nri be a naru unwu
 phe opfu l'ẹphe ji ugwo.
- 10 Eshinu ẹphe enwedu uwe
 be ẹphe agbajeru oto tsoru
 aghaphe.
- Ẹgu anọduje eme phe;
 ẹphe evukwaru iphe,
 e meberu l'opfu evulata.
- 11 Ẹphe anọduje le mgbabu
 olivu mee manu olivu.
 Ẹphe abya akua mee-vayinu
 kuta; l'oggu phe;
 ẹphe te ededu iya ire.
- 12 Ude, ndu anwuhu anwuhu
 atsu be adashi ike le mkpukpu;
 teme maa ndu e mekaru
 iphe nodu echi mkpu
 achọ onye e-yeru phe eka;
 ophu o dudu onye Chileke
 angajeru nchi l'iphe, oopfu.
- 13 O nweru ndu ophu kpuru

ìphóró ono ashì.
 Èphe ta amadu ụzo iya amama
 ophu;
 ọphu ẹphe eshidu gbororo
 iya ililekpọo.

14 Ọobujeru;
 ẹkameka -gbahụepfo ọchii;
 mgbugbụmadzu agbalihu
 je egbua onye ụkpa yẹ
 onye adudu g'ọ dụ iya.

Ọ bụru l'enyashi bẹ
 ọonoduje apya g'onye-oshi.

15 Ọzo bụ l'onye eri ogori
 bụ iphe, ọonoduje ele ẹnya
 iya bụ nchi-ejihu.

Ọriri iya aburu:
 “Nta-a bẹ mu maru l'ọ tọ
 dudu onye hụmaru mu nù!”
 L'ọ woru iphu mee g'a ta hụbe
 iya ama.

16 Ọo l'ọchii bẹ ndiphe ejeje
 etsufua ụlo nwibe pẹ bahu.

Teke o beru l'eswe;
 ẹphe agu-chia onwophe
 ụzo nọdu;
 noo kẹle ìphóró aduje
 pẹ ashì.

17 L'ẹhu nkepẹ g'ẹphe hakọta
 bụ ọchii,
 agbashi ike bụ nchi-abọhu
 nkepẹ.

Ọ bụru n-yemebvu,
 nọ l'ọchii bẹ ẹphe l'ẹphe

eshi ònyà.

18 “Obenu l'èphe bụ ụphu-mini,
tukoru l'eli mini.

Oke-alì phẹ bẹ a tũru ọnu;
k'ọphu ọ tọ dudu onye
agba ọkpa l'ẹka ẹphe
kọru opfu.

19 Ọo ẹgube ono, okpomọku
yẹe anwu erwubashije
aka-mini-sunoo-a;
bụ g'ilu anọduje alwuko
ndu emeje iphe-ẹji.

20 Ẹpho ne phẹ eworu phẹ
zọhaa.

Ẹkà akpaa phẹ nri l'ẹhu.
Ndu ẹjo-ememe ta adukwa
onye anyatajẹ phẹ nụ.

Ọ kwa g'aagbakwoshije oshi-a
bụ gẹ aagbakwotajẹ phẹ.

21 Ụnwanyi, ta atsudu ime yẹe
ndu ọphu enwedu nwa
bẹ ẹphe egudeje azu
onwophe;
ọphu ẹphe aphujeduru
ụnwanyi, ji phẹ anọedu
obu-imemini.

22 Obenu lẹ Chileke egudeje
ike iya lọ ndu nweru
ike phèlèphèlè.

A makwaru-a l'ẹphe angujeru
anguru l'eliphe-a;
obenu l'ẹphe ta amajedu
?ẹphe a-nọdu ndzụ tọo

ẹphe ta adzudu.

23 Ọpajekpokwaaru phe ro
 haa g'ẹphe tuta unme;
 ẹphe ọdu tuzowaruro ẹhu;
 ọle ẹnya iya dọepho l'iphe,
 ẹphe eme.

24 E -mee g'e kuliru phe eli;
 a -nọepho nwanshi;
 ẹphe ephukahụ.

L'a bya ekuzetakpoo phe ali;
 ọnwu eworu phe gbua
 g'oogbuje ndu ozo.

L'e gbua phe g'onye egbu
 ishi akpe.

25 Teke ọ bu l'ọ tọ dudu ge
 mu pfuru ono;
 g'onye a-gba mu iya nu
 gbawa mu iya ro.

G'onye ono byawarọ apfuru
 sụ l'iphe-a,
 mu epfu-a ta adudu iphe,
 ọ bu!"

25

*Bilidadu epfu l'ọ tọ dudu
 onye pfuberekoto l'iphu Chipfu*

¹ Tọbudu iya bu; Bilidadu,
 bu onye Shuwa bya
 eyeeru iya ọnu sụ iya:

² "Ọo Chileke be aburu
 ishi du l'eka;
 teme ọ buru iya be oha
 l'ophu gbaru g'ẹphe

- tsuje ebvu.
 Oomeje gę nchị dụ doo
 l'ephekerephe.
- ³ ?Bụ onye adu ike aguta
 ojogu iya l'ogu?
 ?To bu onye be iphoro,
 shi iya l'eka te erwudu
 l'ehu?
- ⁴ ?Denu g'eeshi gę nemadzu
 buru onye pfuberekoto
 l'iphu Chileke?
 ?Denu g'eeshi gę nemadzu,
 nwanyi nwuru buru
 onye dubebe ree?
- ⁵ O -bukpoorunu l'onwa te
 echizidu echichi;
 ophu kpokpode egbudu
 nwijnwii ree l'iphu iya;
⁶ ?buchia nemadzu, bu
 eka-ali be o guberu iphe;
 mbu nwa, nemadzu nwuru,
 bu mgbashiride be o bu?"

26

Jiobu epfu gę Chileke habe shii

- ¹ Tobudu iya bu;
 Jiobu bya eyee onu su:
- ² Lewarọ egube mkpu,
 igbaru onye adudu ike,
 dụ iya nu!
 Lewarọ egube g'i gude dzọ
 onye eka tsuhuru mee!

- ³ Lewarọ ẹgube ẹguru idzu,
 ị chiru nụ onye amadu iphe;
 mekpoo iphe, du omilomi,
 ị chifutachaa ru ghebe onu.
- ⁴ ?Bu onye pfubuderu ngu
 iphemiphe ono,
 i pfukotaru ono?
 ?Bu unme onye gbẹ ngu l'onu
 pfua ya?
- ⁵ Ndu nwuhuru anwuhu be
 ndzu-agugu mekwaru;
 ẹphe nọdu aphu kparikpari;
 mbu ndu maa,
 bu le mkpula mini;
 me ndu ophu bu iya l'ime.
- ⁶ Ali-maa gbakwa oto l'iphu
 Chileke.
 Ola-l'iswi ghekwarupho onu
 l'iphu iya.
- ⁷ Akpaminigwe, no l'isheli bu
 iya gbaru iya ogodo dobe;
 ophu o dudu l'eli iphe,
 o tukoberu iya.
 Mgboko-a l'ophu be o meru
 dobe;
 ophu o dudu l'eli iphe,
 o tu-koberu iya.
- ⁸ Oke mini bu iya kpukoru
 iya dobe l'urwukpu;
 ophu urwukpu
 agbawashihujedu.
- ⁹ Oo ya phu-chiru atatiphu
 aba-eze iya;

mbụ woru urwukpu nkiya
phushi iya l'eli.

10 Okoke, bụ ẹnya-erwu bẹ
ọ togbowaru l'eli eze-mini.

Ono buru okoke, ọ kparụ
doberu ìphóró yẹe ọchii.

11 Ọobujeru ọ -baa mba; itso,
gude igwe anmaa jiiijiii
tsuhu ebvu.

12 Ọo ike nkiya bẹ o gude mee
g'oke-ẹnymu deru yẹkete.

Ọ buru mmamiphe iya bẹ o
gude gbua Réhabu.

13 Ọo unme bẹ ọ tųru atųtu;
akpaminigwe nọdu ama
ntųmatu ono.

Teme ejo-agwọ ono,
akpụ wuruwuru ono bụ
iya nmafuru iya ẹpho.

14 Sụ-a; iphemiphe ono hachaaru
bụru iphe, oomeje;
ọle ọdu iya ta adudu ẹka o
jeberu.

Ọle ọ bụ; ike iya ono,
adaje g'egbigwe ono;
?bụ ono sụru g'oo-do
iya ẹnya?

27

1 Jiobu nọdu epfukwarọ
iphe, oopfụ eje. Ọ sụ:

2 Eshinu Chileke nọ ndzụ g'ọ
nọ iya-a;

mbụ onye ono,
 te ekwedu haarụ mu enge;
 bya aburu yẹbe
 Okalibe-kangokotaru-nụ ono,
 meru g'obu mu gbua ire l'iphe,
 atsọ ilu.

³ Eshinu ophu ndzụ nọkwadu
 mu l'ime ililekpọo.

Unme, Chileke kuru nụ mu
 nọdu eshijekwadu mu
 l'imi akpushi;

⁴ bẹ mu ta abyakwa egude
 ogbogboromọnu mu
 pfua ejo-opfu;
 ophu ire mu ọwa-a abyadụ
 epfu iphe, bụ ẹregede opfu.

⁵ Tụswekwa! Mu ta abyakwa
 ekwe l'iphe,
 unu epfu bụ ọkpobe-opfu;
 ophu mu abyakwa l'ekweta
 l'iswi ta adụdu mu mma
 jasụ mu anwụhu.

⁶ Apfubekoto mu ono be mu
 e-gudeshiēpho gẹ mu gudeshi
 iya; ophu mu abyadụ aha iya
 ahaha ophu;
 ophu ẹkpa-egomunggo mu
 abyadụ abarụ mu mba
 jasụ gẹ mu a-nọ-beru.

⁷ Sụ-a; gẹ ndu ọhogu mu
 dukwa gẹ ndu ejo-iphe dụ.
 Gẹ ndu mu dụ ashị dukwa gẹ
 ndu apfubeduru ẹka ọto.

- 8 Lẹ-a; ?bụ ụnu bẹ onye
 amadụ Chileke elekwadu
 ẹnnya iya mẹ ọ chihuwaa;
 mbụ mẹ Chileke wofuwaa
 ndzụ iya?
- 9 Ẹgube onye ono bẹ Chileke
 ta angajekwaaru nchị l'olu mẹ
 oke iphe-ẹhuka byapfuta iya;
 10 ọphu
 Ọkalibe-kangokotaru-nu
 adujeekwa iya ree;
 ọphu ọ bukwaa tekenteke
 bẹ ọora-kuje Chileke.
- 11 Gebe gẹ mu bya egoshi
 unu g'ike dụ-be Chileke;
 mbụ l'uzo kẹ
 Ọkalibe-kangokotaru-nu
 ono bẹ mu te
 edomikpodaanu edomi.
- 12 Eshinu unu humakotawaru
 iphe ono l'onwunu;
 ?denuhunu g'o gude unu nọdu
 epfuhunu opfu, enwedu ishi
 ọwa-a?
- 13 Nokwa ẹgube obunggo,
 Chileke ebuje ndu ejo-iphe;
 teme ọ buru okiphe,
 ndu iwashị eketajẹ l'ẹka
 Ọkalibe-kangokotaru-nu
 bụ onoya.
- 14 Ọ tọ dukpoda g'unwu
 iya a-habe l'otu;
 iphe, nọ swiru phẹ nu

- bụ l'aa-phụ phẹ teterii.
 Awa iya ta abyakpòdaa
 ahụmaje nri, sụru phẹ
 eriri.
- 15 Ọ bụru ẹjo iphe-ememe bẹ
 e-gbushi awa iya ndu ọphu
 wafuru nụ; ọphu ụnwanyi,
 ẹphe haru l'ulo-maa aradu
 ẹkwa phẹ.
- 16 A makwaru-a l'ọ kparu
 okpoga kùbe l'ikpo
 l'ikpo g'onye kùberu ẹja;
 bya anmaa uwe kùbe g'onye
 kùberu ẹja-ulo;
 17 obenu l'uwe ono, ọ kùberu
 ono bụ ndu pfuberekoto
 e-mechaa yee ya.
- Ọ bụru ndu iswi dụ mma
 e-mechaa kee okpoga
 phẹ ono.
- 18 Ụlo, ọ kpuru dobe dule-a
 phuge phuge g'ẹka
 udude kweru;
 mbụ l'ọ dụ gẹ nwobu,
 onye-nche kpuru nọdu.
- 19 Ọ zẹ azẹe onye nweru iphe;
 ọle ọ tọo zẹbaekwanu iya.
- Ọ -bya asa ẹnya ta aduadu
 iphe ono ọphu
 ọohumakwadu.
- 20 Ndzu-agugu asopyabeje
 iya g'onye mini sopyaberu.
 Oke pherephere nọdu abyajẹ

- ezikọta iya l'enyashi.
- 21 Pherephere, shi l'uzo
 ẹnyanwu-awawa apataje
 iya pamihu;
 a taa humabaedu iya;
 mbu l'oozikotaje iya
 pafukpoe ya pho l'ibe
 iya apafu ophu.
- 22 Ootuje iya gbaagbaa;
 imemini iya ta adudu l'eka
 oogbalaru ike iya.
- 23 L'oochi iya eka gbaagbaa;
 l'ophuru iya
 swooswooswo gude
 zikota iya zifu l'ibe iya.

28

- 1 Su-a; eka eebvutaje
 mkpola-ochaa du.
 Uzú, aakpuje mkpola-ododo
 dukwapho.
- 2 Igwè bukwa l'alì bẹ eebvutaje
 iya.
- Ọ buru akpaga bẹ eegudeje
 meta onyirubvu.
- 3 Mbu lẹ nemadzu bvuwaru
 ochii omilomi omilomi;
 bvurwukpọepho eka alì
 kachaa omilomi;
 eka ephe achọ iphemiphe
 ono l'ime alì.
- 4 E shi l'eka nemadzu bu ebubu
 l'eli alì

bvua ọgba omilomi
 omilomi;
 bvurwua ẹka ọkpa teke
 azọbeswee ililekpọo;
 nọdu l'omilomi ẹka ono,
 adudu onye nọ iya nọ ono
 akọ eregede akọ akọkunvu.

5 Ọ bọru alị ono, bọ iya bẹ
 eemefutajẹ nri ono bẹ
 e jerwuru je ekwongaa
 ya;

ọ nọdu enwu phuruphuru
 g'ọku.

6 Ọ bọru agbara-mkpuma,
 nọ l'ime ẹka ono bẹ mkpuma,
 bọ sáfàyà shi.

Nshì mkpọla-ododo dọ
 l'urwuku shi iya etsushihu.

7 Ọ tọ dudu ẹnu, eri anọ,
 pheswetajẹwaru ọzo
 ibiya ono;

ọphu ivu amadọ iya ọzo.

8 Anọ-ẹgbudu -kua onwiya
 g'ookuhabe;
 ọkpa iya ta atudu l'ẹka ono;
 ọphu oduma ejedu iya
 akpa nri.

9 Ọ bọru nemadọ gude ẹka
 iya egbukpọshi ịgbangu
 ịgbangu mkpuma ono;
 ebvulitajẹro úbvú ebvulita
 gha igharaphu.

10 Ọokukpọshi mkpuma

atọ owere eje;
 shi nno gude ẹnya
 tųkokpoo ẹku ẹku,
 dųkota iya nų humachaa.

11 Oogudeje ẹja nwuchia ẹnya
 mini ẹka nggele eshije
 asọ asoso; l'ọ jee je
 ewofuta iphe,
 e shi domia edomi bya
 atọgbo l'ebederebadara.

12 Obenu ẹ-a; ?bų awe bẹ
 aa-humakwanu
 mmamiphe?

?Bų awe bẹ nkwaẹnya
 bukpọo?

13 Nemadzų ta adųjedu
 ike makọtaru gẹ
 mmamiphe erebe ire;
 mbų l'ọ tọ dųdu onye
 maru iya nų l'eliphe-a,
 e bu ebubu-a l'ophu l'ophu.

14 A jiru ogbu-mini; ọ sų l'ọ
 tọ dųkwa l'ime iya.

Oke-ẹnyimụ sų: Ophu ọ
 dųkwa ophu dų l'ime
 nkemu.

15 Mkpọla-ododo, kakọta ama
 mma bẹ e tee gudekọtakwa
 azų iya; ophu aatųkwanu
 aswa iya eyeru
 mkpọla-ọchaa.

16 A taa zų-butadu iya ẹ
 mkpọla-ododo Ofi;

ọphu e gudedu mkpuma
 ónikùsù ọzoo sáfàyà
 azụ-butá iya;

¹⁷ ọphu a tũdu iya eyeru
 mkpọla-ododo ọzoo
 mkpuma, aphụ ngerengere;
 ọphu e gudedu iya
 agbanweta
 ụnwu-ẹrengete-iphe,
 e gude ọkpobe

mkpọla-ododo meshia;
¹⁸ ọphu e jeduro ọpfu kẹ
 l'eewota mmamiphe
 atụ eyeru mkpuma koralu;
 yẹe mkpuma jíásùpà;
 mbụ l'aswa mmamiphe
 kakwa aswa mkpuma
 rubi shii;

¹⁹ ọphu e wokwarupho
 mmamiphe atuberu
 mkpuma tópàzù,
 shi l'alị Kushi;
 ọphu e gudedu mkpọla-ododo,
 ọbebe ree azụ iya.

²⁰ ?Bụkwanu awe bẹ
 mmamiphe shi?
 Nkwamenya ?bụ aweya bẹ
 o bukpo ebubu?

²¹ Ono bẹ e domiru g'ọ tọ
 ọdu iphe, dzụ ndzụ
 a-hụma iya nụ;
 mbụ l'e kpuchiru iya
 ekpuchi g'ẹnya ta

ahuma iya je akpachaa l'enu,
ephe l'eli.

22 Ola-l'iswi yee onwu
l'onwiya tukoru su-a
l'ephebedua bukwa
tafutafu iya rwuru
phe nchi.

23 Oo Chileke maru uzo iya.

O buru iya kpoloko maru aka
o bu ebubu;

24 kele oo ya be enya erwuje
l'eka eliphe jeberu;
teme o nodu atukoje
iphemiphe,
no igwe le mkpula
humakota.

25 Teke o meru ike nu
pherephere;

bya atua mini atutu dobe;

26 teke o turu ekemu dobe
l'owa-a g'igwe e-gudeje
edze mini;

bya atoo gbororo togboru
ire egbigwe;

27 noo teke o leru mmamiphe
enya tua onu iya.

O bya apfubeshia ya ike bya
ahua ya ama;

28 bya asu unwu-eliphe-a:

Atsu Nnajiuphu ebvu bukwa
iya bu mmamiphe.

Ajika eme ejo-iphe,
buru nkwaanya.

29

- ¹ Jobu nọdu epfukwaphọ iphe, oopfu eje. Ọ sụ:
² Ọ dū mu g'a sụ l'ọnwá l'ọnwá onó, chiwarụ nyihu onó a-lwaphutagbaa azụ; mbụ mbọku lẹ mbọku onó, bụ teke Chileke shi anọduje eche mu nche onó;
³ teke orọku iya shi asụjeru mu l'uzo ishi eke paapaapa.
 Mu shi egudeje ìphóró iya ghaa ẹka ọchii agba.
- ⁴ Sụ-a; teke onó, iphe shi ejehuru mu; noo teke eshi ọnyà mu lẹ Chileke shi abụjeru iphe, jiru ụlo mu bushihu.
- ⁵ Teke onó bẹ Ọkalibe-kangokotaru-nụ shikwadu swiru mu eswiru. Ụnwu mu nọ-pee mu mgburugburu.
- ⁶ Teke onó bẹ ụzo, mu eshi shi akwoje tẹrete g'a wuru iya mini ẹra-eswi. Agbara-mkpuma nọdu anwuru mu shokoshoko anwushi manụ olivu.
- ⁷ Teke mu jeru l'ọnu-abata mkpukpu; bya eje gẹ mu nọdu l'ẹka ibe mu nọ l'oma edupfu;

8 bẹ ụnwokoroby
 ụmaru mu bya etochiru
 mu.

Ndu bụ ọgerenya wụ-lihu
 p̄furu ap̄furu.

9 Ndu-ishi daa ikpigbi;
 bya eworu ẹka d̄e l'ọnu.

10 Ọnu kp̄oru ndu a maru ẹpha
 p̄h̄e op̄fu.

Ire nyakuru p̄h̄e l'akpo.

11 Iphe, buk̄poo onye n̄umaru
 ẹka mu ep̄fu op̄fu ọ̄ru mu
 ọnu-ọma; t̄eme ndu ụmaru
 mu n̄ jaa mu ajaja.

12 Iphe, kparū iya n̄ b̄uru l̄e
 ndu ụkpa, rarū g'a gbaaru
 p̄h̄e mkpu b̄e mu shi
 agbaj̄eru mkpu.

Nokwaph̄o ọ̄ mu shi adzoje
 ụnwu-ogbee, enwedu nna;
 ọ̄phu ẹp̄he enwedu
 onye gbaaru p̄h̄e mkpu.

13 Onye ala l'iswi shi agojeru
 ọnu-ọma n̄ mu;
 t̄eme mu shi emeje g'obu
 nwanyị, ji iya an̄oedu
 ḡua ebvu ẹhu-utso.

14 Ap̄fubekoto nkemu b̄e mu shi
 yee g'onye yeru uwe.

Ikpe, p̄furu ọto b̄uru mu
 awurukpata uwe mgbalan̄;
 yee okpu, mu kpu l'ishi.

15 Mu shi b̄uru ẹnya,

- ndu atsụ ishi gude aphụ ụzọ;
 bya abụru ọkpa,
 ndu ẹniyeni gude eje ije.
- 16 Ndu nọ lẹ mkpa bẹ mu shi
 bụru nna phẹ.
 Mu shi agbajẹru onye mu
 amadụ ọdzori.
- 17 Ndu ẹjo-iphe bẹ mu shi
 anyakwashije agba;
 nata phẹ ndu ẹphe
 tabẹwaru ẹru eme
 g'ẹphe tagbua.
- 18 Mu shi dobesukpọephe lẹ mu
 a-zẹkpọephe l'ụlo mu nwụhu.
 L'apha, mu a-nọ l'eliphe-a
 a-du igwerigwe g'ẹja,
 nọ l'ali.
- 19 Mu shi dobesụ l'ogbarabvu
 mu a-jakpọephe bahụ
 l'ime mini.
 L'iji a-nọdu akwa putuputu
 l'eli ẹkali,
 mu jakashiru
 mkpụrumkpuru;
- 20 L'akpabiri mu a-duẹpho
 ọphúú ọphúú l'ime mu.
 Apfụ mu adụkwapho
 ọphúú ọphúú nọdu mu l'ẹka
 jasụ l'ojeje.
- 21 Ndiphe shi anọduje anga
 mu nchị l'olu g'ẹphe
 nwuta iphe.
 Ẹphe shi adajẹ gbẹe ngabẹ

- nchị l'idzù, mu achiru phẹ.
- 22 O shi abujeru; mu -yewaa
 ọnu; ọ tọ dudu iphe,
 ẹphe epfubaa ọzo.
 Opfu mu ejeepho gurumaa
 gurumaa abahụ phẹ
 ị nchị.
- 23 Ẹphe shi anọduje kwabẹru
 mu g'onye kwabẹru
 yẹgeyege mini;
 tẹme ẹphe shi anguje opfu
 mu g'onye angụ mini
 ishi-apha.
- 24 Mu -nwụjaaru phẹ ọnu-ọchi
 obu ejizeta phẹ.
 Ẹphe lee mu ẹnya l'iphu;
 ẹphe ajakerehu.
- 25 Ọo mu shi anọduje egoshi
 phẹ ụzo;
 tẹme mu shi bụru eze phẹ.
 Mu shi asugajeru g'ẹka eze
 sụgaru l'echilabọ ndu
 ojọgu iya phẹ.
 Mbụ ị ndu aphụ tsọru bụ
 mbẹdua shi aduje phẹ obu.

30

- 1 Obenu ị nta-a bẹ ẹphe
 achiwaa mu ọchi;
 mbụ ndu mu bụ ọgerenya;
 ndu bụ ẹgube ndu mu gege
 enwujeru nna phẹ ye
 g'ẹphe ị nkuta,

- echeru mu ẹku tuko zẹe.
² ?Bụ urwu ụnu be ọkpu ẹka
 phẹ barụ mu;
 eshinu ike aduadu phẹ?
- ³ Ẹphe anọduje eje
 phururugbada eje eje
 l'enyashi lẹ mgbegu
 alị ọkponku;
 ẹka ẹjeka du phẹ;
 teme ẹgu nọdu eme phẹ.
- ⁴ Ẹphe etsojeru ime ẹgbudu
 akpakọ ẹkwo,
 atso unú-unú ata.
 O buru ọgbarabvu oshi,
 amishije ẹkali g'ẹza be
 ẹphe avutaje ata.
- ⁵ Ndu-a bu ndu a chiru achichi
 g'ẹphe ta anoshi
 l'ẹka nemadzụ ibe phẹ nọ.
 A nọdu atụ phẹ ụzu g'ẹphe bu
 iphuru.
- ⁶ E kebutaru phẹ;
 ẹphe je eburu l'oma nggele,
 mini tahuru; buru lẹ
 mgbaka agbara mkpuma;
 mbụ utubuku ime alị.
- ⁷ Ẹphe anọduje l'ime ẹgbudu
 l'ẹka ono ara mimimi
 eme kwọfukwọfufu lẹ
 mkpula irwu l'ẹka ono.
- ⁸ Ndu bu ndu mmanu;
 bya aburu ndibe ndu
 enwedu ẹpha;

ndu e chiru ẹchachi gude
chifu ẹ mkpukpu.

9 Ọ bụru ẹgube ndu ono bẹ
unwu phẹ gbẹ nta-a
wata mu aguru ebvu
phuahaa mu iphu.

Mu bya bya aburu iphe,
ẹphe gude atụ phukuku.

10 Mu dụ phẹ ashị;
ẹphe nọdu anọduje
akpa mu ụzenya;
ọphu ẹphe ezejeedu ezeze
agbụ tųphakwa l'iphu mu.

11 Ọ bụru iphe, kparụ iya nụ bụ
ẹ Chileke tųshiwaru
udo mu;
bya eyewaa mu ọru;
ọphu ọ dųedu iphe,
ẹphe asoje nsọ k'anọdu mu
l'iphu mee.

12 Ọ bụru l'ẹkutara mu bẹ
unwu-ogbolanu ono
eshije abya mu ọgu.

Ẹphe agbakashia ọnyà
dobegbaa
l'ẹka mu a-zọ ọkpa;
bya ekephee mu
mgburugburu.

13 Ẹphe tochishia ụzo mu;
bya emekpọepho jasụ
ẹphe mebyishia mu;
ọphu ọ dųdu g'ọ ka mma
l'ọo onye lanụ,

- gbaru mu mkpu.
 14 Ẹp̄he n̄odu as̄o kpereree
 eje abya;
 awu gbutugbutu;
 eshi ẹzo, du l'igbulo
 mkpukpu ono,
 ẹp̄he tsukp̄oshiru ono
 eje abya.
- 15 Ndz̄u rwuta mu; nwubvu,
 e shi akwabeje mu
 be a ch̄iru ọso.
 O phekash̄ihu g'iphe,
 pherephere pataru.
 Ẹku mu phukash̄ihu
 g'eka urwukpu
 phukash̄ihuru l'igwe.
- 16 Nta-a be ndz̄u mu eribufuwa.
 Iphe, zuru mu gburumu
 pfurii buwaa eswe
 iphe-ehuka.
- 17 Ẹnyashi an̄oduje anyapyashi
 mu okpu.
 Ẹka-iphe-n̄o-mu ono,
 an̄oduje ata mu kwaramu
 kwaramu ono l'an̄odujeep̄ho
 ata mu nno mkp̄urumkpuru.
- 18 Chileke gude okpehu iya
 lokota uwe mu nmaa
 erupfureru;
 bya eworu mbedua l'ophu
 tsupfua ge mu atsupfuje
 olu uwe mu-a.
- 19 O par̄u mu chie l'ime epuchi.

- Mu nọdu l'ẹka ono;
o woru mu gwee arakabya.
- 20 Mu chiku ngu ẹ mkpu gube
Chileke;
ọphu i yeduru mu onu.
- Mu gbalihu pfuru apfuru;
ọ buleru-a ẹnya be i
leru mu kpoloko.
- 21 Ị bya aghaaruu mu iphu
bya eworu mu mee
omeliwe.
- I gude ogboro ẹka ngu,
ha ntumatu eme mu
omeliwe.
- 22 Ị palia mu ephekerephe
woru mu tẹaru
pherephere.
- Ị nọdu apanga mu g'onye
oke pherephere apanga.
- 23 Mu makwaru-a ẹ ị kpwa
mu ala maa.
- Ị kpwa mu ala ẹka ono,
e doberu iphe,
bu onye nọ ndu.
- 24 Su-a; ọ to dukwa onye
ahumajechaa onye ike
bvwaru bya ejeshia
ya echi iphe.
- L'ẹka oochi ojileka togbo l'iphe,
eme iya nu.
- 25 ?Ọ kwa ẹ mbedua shi
abujeru; mu -huma
onye eje iphe-ehuka;
mu araaharu iya ekwa?

?Mu te eshidu abụjeru;
 mu -huma onye ụkpa;
 meji awashihu mu
 awashihu?

26 Obenu lẹ mu leri ọnya iphe,
 dụ ree;
 ọ bụru ọjọ iya bẹ mu
 humaru.

Mu lee ọnya l'ìphóró a-duru
 mu;
 ọ bụru ọchii tukuru
 ẹkameka gbachia.

27 Iphe, aswọrishi mu ime ẹhu ta
 adudu teke ọononyaje
 haa mu aswọrishi.

Ọ buepho l'ọo eswe
 iphe-ẹhuka turu mu swiswia.

28 Mu tsoru aghaphe;
 gbachihuchaa agbachihu;
 ọphu ọ bụdu l'ọo
 anwu chiru mu;
 mu gbachihu ọbu.

Mu pfuru l'echi edzudzu-ọha
 chia ojileka-togbo.

29 Mu bya bya aburu nwune
 nkuta-ọswa.

Ọ bụru mu lẹ mgbashi-ujiku
 aswi ọswi.

30 Akpọ ẹhu mu jihuwaru
 nchi aswashihuwaa
 aswashihu.

Ẹhu nọdu enwu mu
 phuruphuru erekuta anụ.

31 Ogumogu, mu shi akpoje
 buwaa mu aphụ.
 Ototo, mu shi aphuje
 buwaru erwubvu.

31

1 Mu l'anya mu pfuru iya
 gbaa ya ndzụ ị mu ta abyadụ
 ele nwamgboko ọnya k'ejepfu;
 2 kele-a; ?bụ ọunu be
 nemadzụ e-keta l'eka Chileke,
 bu l'igwe?
 ?Bụ ọunu bụ iphe,
 Okalibe-kangokotaru-nụ,
 nọ l'ephekerephe nweru,
 a-dasweru nemadzụ?
 3 ?Tobudu ndu ọjo-ipe be
 ọla-l'iswi duru.
 Eze iphe-ehuka duru ndu te
 emedu ree?
 4 ?Tọ humaduru ọzo, mu eshi?
 Tọ ?tọ ọdu ntụ ọkpa mu
 ọgu?
 5 Ọ -buru ị mu tsoru iphe,
 abudu iphe;
 ọzoo ị mu gude ọkpa
 mu-a chipyabe iphe,
 abudu ire-lanụ;
 6 mbụ-a; ọ Chileke tụa
 mu ọọ l'ipe,
 ọotuje ndu ire-lanụ;
 g'ọ hụma l'uta ta adudu
 mu l'ehu.

- 7 Sụ-a; ọ -bụru lẹ mu
 shiswejeru ụzo;
 ọzoo ẹnya mu duphujeru
 ọkpoma mu ụzo;
 ọzoo lẹ mu yejeru ẹka l'iphe,
 dị eji;
 8 ọo ya bụ gẹ ndu ọzo
 rikwa iphe,
 mu kọberu l'alị;
 tẹme g'iphe, mu kuru
 akuku bụkwaru iphe,
 ee-pheshi epheshi.
- 9 Mbụ-a; teke ọ bụ l'o nweru
 onye nwanị,
 mebyijeru mu ọkpoma;
 ọzoo lẹ mu jejeru ngge
 l'ibe obutobu mu;
 10 ọo ya bụ gẹ nyee mu
 bụkwaru onye e-mechaa
 ejeru onye ọzo ozi;
 tẹme gẹ yee nwoke ọzo
 watakwa akwakwa;
 11 kele ọo ẹgube iphe ono
 gege aburu iphe-ẹji,
 iphere iya gege adu.
- Ọ bụru iya bụ iphe,
 gbaru g'e kpée mu ikpe iya.
- 12 Ono bụkwa ọku, etsujewarọ
 tsurwua alị-maa.
- Ọ bụru iya gege ekegbushi
 iphe, mu gege akpata l'ẹgu.
- 13 Sụ-a; ọ -bụru l'ohu mu lanu
 byaru echia mu lẹ mu meru

- phẹ iphe, eg̃hu phẹ eg̃hu;
 ọ̃phu mu eyeduru phẹ ọ̃nu;
 14 ?mu e-mebaa g̃nu mẹ
 Chileke tsoahaa mu op̃fu?
 ?Bụ g̃nu bẹ mu e-pfuje mẹ a
 s̃u gẹ mu bya ep̃fua g'ọ̃
 nw̃uru mu l'iya?
 15 ?Tọ̃budu Chileke meru mu
 ye l'ẹ̃pho ne mu;
 meru yẹ̃bedua?
 ?Tọ̃budu onye lanu ono
 t̃ukoru mu l'iya mee
 g'anyi a-du l'ẹ̃pho ne anyi?
 16 S̃u-a; ọ̃ -b̃uru l'onye ụ̃kpa
 rwojeru mu iphe;
 mu j̃ika iya ya añnu;
 ọ̃zoo lẹ mu haj̃eru nwanyi,
 ji iya añedu; ọ̃ kwata ishi;
 17 ọ̃ -b̃uru lẹ mu wojeru
 nri mu dobe k'eri nw̃ekinyi
 mu; ọ̃phu mu ekeduru iya
 ụ̃nwu ogbee, enwedu nna;
 18 obenu l'eshinu mu b̃u
 nwata bẹ mu shiẹ̃pho
 heta iya g'onye nna iya ehe;
 t̃eme mu shiẹ̃pho eshi ọ̃phu
 a nw̃uru mu eleta nwanyi,
 ji phẹ añedu ẹ̃nya.
 19 Mb̃u-a; mu -h̃umajekwa onye
 emebyihu emebyihu op̃fu
 l'o to nwedu iphe,
 anma l'up̃fu;
 ọ̃zoo onye ad̃udu g'ọ̃ du iya,

enwedu uwe eye l'ehu;
 20 ophu o goduru onu-oma nu
 mu;
 opfu le mu gude eji aturu
 ibe mu meta ukpo gude
 gbobuta iya oyi.

21 O -buru l'o nweru iphe,
 mu halijeru aka mee
 ndu enwedu nna;
 opfu le mu bu onye onu
 erwu l'opfu l'ulo-ikpe;

22 G'aka kwahukwa mu l'ukuvu;
 g'o shikwaa inwo rifu erifu.

23 Su-a; eshinu mu atsu Chileke
 ebvu l'oo-nu mu aphu;
 teme mu ndu atsu
 akpabiri iya ebvu be mu te
 emejekwaru egube iphe ono.

24 Ome mu chiru upfu ye
 l'okpoga mkpola-ododo;
 ozoo le mu suru okpobe
 mkpola-ododo l'o kwa
 iya gude ndzu mu;

25 ome mu tejeru eswa
 kpua iphe, mu nweru;
 mbu eku, mu gude aka
 mu kpata;

26 ome mu wojeru enya
 dabu l'enyanywu,
 egbu nwijnwii;
 ozoo le mu wojeru enya
 dabu l'onwa,
 echi phuuphuu;

27 k'ophu bu l'iphe ono byaru
 bya esweta mu okpoma;
 mu gude aka mu owa-a
 baaharu phe eja le mpya;

28 noo iphe, gege aburu iphe-eji,
 gbaru g'e kpee mu
 ikpe iya bu onoya;
 kele mu -nodu eme nno
 bu iphe obu bu le mu ta
 akpoduru obu yeru Chileke,
 bu l'igwe.

29 Ome ehu tsojeru mu
 utso l'onye ohogu mu
 laru l'iyi;
 ozoo le mu tejeru eswa kpua
 iphe-ehuka, byapfutaru iya nu;

30 mbu-a; mu teke
 egudeswekwaa onu mu-a
 mee iphe-eji;
 k'atu ndzu onye ohogu
 mu onu.

31 O to dukwa onye no l'ibe
 mu sujeru le ya te erijiduru
 epho l'ibe Jiobu.

32 Mbu l'o toko duswee onye
 shi eshishi, kwajeru le gbororo;
 kele mu shi eghebejeepho
 ibe mu onu;
 ge ndu eje iphe bata
 bya akwaa.

33 Mu teke emeswe iphe-eji,
 woru domia egube
 ndiphe emeje domia-a;

mbụ woru ikpe,
 nmaru mu nu domia
 l'ime okpoma mu;
³⁴ kele mu atsu ikpoto
 oha ebvu;
 gude ndzu-agugu k'iphe,
 ee-pfuru mu kwaa l'ulo;
 ophu mu afutajedu afuta.

³⁵ Gege o dukpooru onye
 e-ye onu l'iphe-a,
 mu epfu-a!

Mu doakwaru edo mu
 ye aka l'ekwo.

Ge
 Okalibe-kangokotaru-nu
 gbawa mu iya ro!

Gege iphe-a, ndu epfuru mu
 nu suru le mu meru-a be
 ephe deru l'ekwo dobe;

³⁶ me mu ewojeeru iya
 pho jikoru l'ukuvu;
 mbu le mu gege ewoeru
 iya pho kpuru g'onye
 kpu okpu-eze;

³⁷ me mu eshikwanu
 ishi lanu dooru iya edo
 ehmu mu nanu nanu;
 me mu abyakpopho
 bya apfuru iya l'iphu
 g'onye pfuru l'iphu
 ndu-ishi.

³⁸ "O -buru l'ali mu e-chi mkpu
 kpua mu;

mbụ lẹ mgbawara,
 nọ iya nụ bụ ẹnya-mini anwụ
 iya shokoshoko;

³⁹ ọ -bụru lẹ mu riru iphe,
 mu kọru iya lẹ mu ba pfulu
 ugwo ozi iya;
 ọzoo lẹ mu mebyiru ndzụ
 ndu eje iya ozi;
⁴⁰ g'ọ bukwaru ẹwu-óbvú
 e-fushi iya.

Gẹ witi, mu kọru iya te
 emekwa ememe;
 ẹswa mmanụ efushia
 ya l'ozo balị, a kuru iya.”

Nta-a bẹ Jiobu
 yeghewaru ọnu.

32

Opfu Elihu

¹ Tọbudu iya bụ; ụmadzu ẹto ono haa eye
 ọnu yeru Jiobu; kele ọ pfuluberekoto l'ẹnya nkiya.

² Noo ya; Elihu tangirihu. Opfu ẹhu Jiobu mee;
 ẹhu ghuhaa ya egbu; kele Jiobu haru eme Chileke
 onye pfuluberekoto bya emechia onwiya onye
 pfuluberekoto. Elihu bukwanu nwa Barakelu, bụ
 onye Buzu; oshilokpa Ramu. ³ Ọnyà iya pho
 ẹphe n'eto mekwapho; ẹhu nọdu egbu iya egbu;
 kele ẹphe ta adudu ike pfukpee Jiobu; ọle ẹphe
 nmakwaru iya nụ ikpe. ⁴ Iphe, kparu iphe, Elihu
 nọkpoepho doo gẹ ndu ọphuu pfugbukpoda g'ọ
 dụ pphẹ teme o yejeru Jiobu ọnu bụ l'ẹphe buchaa
 ya ọgerenya. ⁵ O be g'ọ nọnyaaru; ọ hụma

l'umadzu ẹto ono ta maẹdu iphe, ẹphe e-pfu; o
ghuahaa ya eghu.

⁶ Tọbudu iya bụ; Elihu, bụ nwa Barakẹlu, bụ
onye Buzu bya eyee ọnu sụ:

Mbẹdua bukwa nwata;
unubẹdua bụwaru ndu
bụ ọgerenya.

Ọ bụru iphe ono meru g'o
gude mu shi asọ unu ẹnya;
ọphu mu ejeduru atụ ama
k'epfuru unu gẹ mu
mataberu.

⁷ Mu shi rịa sụ: G'ọgerenya
pfunaa opfu.

G'onye nọwaru apha olemole
zinaa mmamiphe.

⁸ Obenu l'ọo maa, nọ nemadzụ
l'ime;
mbụ unme
Ọkalibe-kangokọtaru-nụ bẹ
emeje gẹ nemadzụ maru iphe.

⁹ Ọ tọ bụekwapho ọgerenya
amajeru iphe;
ọphu ọ bụekwapho onye
akahụwanu bẹ iphe edoje
ẹnya ree.

¹⁰ Noo g'o gude mu sụ: Unu
gebekpọdapho.

Mbẹdua e-pfufukwarupho
unu iphe, mu maru.

¹¹ Mu shikpọekwapho daa gbẹe;
unu nọdu epfu k'unu.

Mu shi ngabẹkpoepho nchị ẹka

unu tsoru achokashi iphe,
unu e-pfu.

12 Mu ngabekpooru unu nchi
rengurengu;
ole o to dudu g'o ka mma
l'oo onye lanu l'ime unu,
duru ike goshi Jiobu
l'o meru eji.

Ophu o dudu g'unu ha onye
duru ike zaa ya aji,
o jiru unu.

13 Unu ta asukwa l'unu
ahumawaa mmamiphe.
Ge Chileke mawaruro onu,
oo-yeru Jiobu;
l'o to budu nemadzu maru
onu, oo-yeru iya.

14 Su-a; eshinu Jiobu abudu
mu be oopfuru be mu te
epfukwaru iya;
ophu mu eyekwaru iya
onu egube unu yeru iya.

15 Ee! O tuwaru phe eberebete;
ophu phe amaedu iphe,
phe e-pfu.

16 ?Bu ge mu ngabehunuru
gunu nta-a,
g'ephe nowaa
nggujunguji-a;
g'ephe nmamoru l'eka pho;
ophu phe amaedu iphe,
phe e-pfua?

17 Mbedua kwapho nwekwarupho

- ọnu, mu e-ye.
 Mbẹdua l'e-pfukwaphọ gẹ
 mu maberu.
 18 Noo kẹle opfu jiru mu ọnu
 ebushihu ebushihu;
 tẹme ọphu obu mu ekwedu
 gẹ mu dobe ọnu doo.
 19 L'ime onwomu bẹ mu
 dọepho gẹ mẹe,
 a gbaru ye l'ime ekpemu
 kpuchia.
 Mu dọepho g'ite ọphúú,
 e yeru mẹe;
 ọ nọdu abya agbawahụ.
 20 Mu e-pfu opfu g'ẹhu agụa mu
 phoo.
 Mu a-sa ọnu yee ọnu.
 21 O tọ dọkpodaa onye mu agba
 eyeru;
 ọphu ọ dọkwa onye mu aja
 ajaja mkpẹ;
 22 kẹle ọme ọ kwọru mu ẹhu;
 mbụ aja nemadzụ ajaja mkpẹ;
 mẹ onye ono,
 meru mu dobe ono ewofu
 ndzụ mu ẹgwegwa.

33

- 1 Noo g'o gude mu sụ-a: Jiobu;
 jiko ngabẹkpoe kwapho
 nchị rengurengu
 l'iphemiphe-a, mu epfu-a!
 2 Mu abyakwa asa ọnu wata
 epfu opfu;

mbụ l'iphe, mu abya epfupfu
degekwaru mu edegeru l'onu.

³ Opfu, mu epfu bẹ mu gudekwa
obu, ọ guru ìphóró epfu.

Ogbogboromonu mu buru
iphe, ọ maru bẹ oopfu.

⁴ Ọ kwa Unme Chileke meru
mu dobe.

Ọ buru Unme
Ọkalibe-kangokotaru-nu
bẹ mu gude ndu ndu.

⁵ Zanaa mu iphe-a,
mu abya epfupfu-a
m'i -je l'adu ike.

Dozia onwongu ọ mu ọ ngu
pfuta iya.

⁶ Ọo g'i du bu ọ mu du l'iphu
Chileke.

Ọo g'e gude ọja mee ngu bu
g'e gude ọja mee mbedua.

⁷ Ọ ndu mu te ejekwa ngu
agugu;
ozo bu l'eka mu bya ngu
ebyibyi-a ta anyibedu ngu
ro ọrwa ke nno.

⁸ I gudekpoo onu ngu pfua ya;
mu numa;
mbu ọ mu numakpooru
iphe, i pfuru gededede
teke i pfuru iya.

⁹ "L'i duebe ree;
ophu iphe-ẹji adudu ngu l'ehu.
L'i du iche; ophu ọ dudu uta,

- dụ ngu l'èhu;
 10 tème Chileke nõdu
 etsokwa ngu phọ opfu.
 O woru ngu gụa l'onye
 opfu iya;
 11 bya akpọru ngu ọkpa ye
 lẹ mkpọro;
 tème ọ nõdu anọduje enyocha
 iphemiphe, iimekpọo
 ememe ophu.”
- 12 Ọle iphe, mu emekwanụ
 g'ị maru l'ẹka ono Jiobu
 bụ l'iswi ta adụdu ngu mma;
 kẹle Chileke kakwa nemadzụ shii.
- 13 ?Denu g'o gude ị nõdu ayọru
 iya ọshi asuje l'o too yejedu ọnu
 l'opfu ẹhu unwu-eliphe?
- 14 Kẹle Chileke epfuje opfu;
 o -pfua ya l'uzo iya ọwa-a;
 l'o pfua ya l'uzo iya ọzo.
 O too dokwaphọ nemadzụ
 ẹnya.
- 15 Oopfu iya lẹ nrwọ;
 mẹ l'ophulenyanya ẹnyashi;
 teke oke mgbenya
 tushigbawaru nemadzụ;
 ẹphe nõdu eku mgbenya
 l'eli iphe-azẹe phẹ.
- 16 Noo teke oopfujẹ opfu ye phẹ
 lẹ nchị;
 mee; ndzụ aguhu phẹ l'ọkwa,
 ọonmaru phẹ;
 17 g'eeshi gẹ nemadzụ haa

emeswe iphe;
mekwapho g'o to kuhę
onwiya;

¹⁸ g'eeshi g'a dzota iya g'ọ to
dalahu l'iduma;
dzotakwapho ndzu iya g'e te
gude ogu-echi supyashia ya.

¹⁹ O duru ophu Chileke egudeje
iphe-ememe hua nemadzu
ahuhu obu;
gburu iya togbo l'iphe-azee
ya anyapyashi iya okpu;
²⁰ k'ophu bu l'onye obu
be nri adujeashi.

Nri, kachakpo utso aburu iphe,
anodu atso iya ilu.

²¹ L'o joo ehu buru okpu.
Okpu iya ono, e te shidu
ahumaje l'enya ono awushiru
ke jashi.

²² L'ookpo geegee akpo
ala l'ilu.

Ndzu iya eje alapfu
unwu-ozu ali-maa.

²³ Obenu le-a; o -buru l'o nweru
ojozi-imigwe, no iya
l'aguga buru onye no l'echilabo;
onye lanu l'ime unu unwu
ojozi labo l'unu iri;
g'o pfiaru nemadzu iphe,
gbaru iya l'ememe;
²⁴ g'o meeru iya eze-iphe-oma
su:

“Jiko g'a dzọọ ya rọ g'ọ tọ
 daba l'iduma;
 ọ ya hụmawaru onye a-nọduru
 iya l'itumo.”

25 Noo teke akpọ ẹhu iya a-bya
 enwee dọ ọ ọ nwata nshị.

L'ọ bya alaphu azụ je
 adukpooro g'ọ dọ teke
 ọ bụ nwokoro.

26 O -pfuru nọ Chileke;
 l'ọ meeru iya iphe, o pfuru;
 l'ọ hụma iphu Chileke
 tee ọkpobe ẹswa,
 Chileke abyakwa emee ya
 l'ọ bụru onye pfuberekoto
 ọzo.

27 Noo teke ọo-pfuru
 l'edzudzu-ọha pfua ya
 hoo haa sụ:

“Mu meakwaru iphe-ẹji;
 tẹme mu mebyiwaa iphe,
 pfuru nhamunha;
 ọphu a gwataduru mu
 ọgwo iphe, mu meru.

28 Ọ gbafutaru ndzụ mu;
 ọphu mu adabaduru l'iduma.
 Nta-a bẹ mu a-dzuru ndzụ;
 hụma ẹka ìphóró dọ.”

29 Lewarọ; Chileke emejekwaru
 nemadzụ iphemiphe ono
 ugbo labọ;
 mee ya ugbo ẹto;

30 g'eeshi g'ọ nafuta ndzụ iya

- g'ọ tọ dalahụ l'iduma;
 k'ọphu ìphóró kẹ ndzụ-a
 l'a-nọdu echikwaduru iya.
- 31 Sụ-a; nọdukpoekwapho doo
 Jiobu; ngabẹru mu nchị.
 Nọdukpoekwapho doo gẹ
 mu pfu iphe, mu epfu.
- 32 Teke i nweru ọnu, ii-ye;
 yeeru mu iya.
 Pfua iphe, dụ ngu k'epfupfu;
 kẹle ọ dụ mu g'a sụ l'e
 kpefuru ngu.
- 33 Teke ọ tọ dudu;
 ngabẹkpoeru mu phọ nchị.
 Nọdukpoepfo doo gẹ mu zia
 ngu mmamiphe!

34

- 1 Elihu byakwa eyee ọnu
 bya asụ-a:
- 2 Unu ngabẹkwa nchị l'opfu,
 mu epfu; unubẹ ndu
 maru iphe.
 Unu ngabẹkwaru mu nchị;
 unubẹ ndu nwuru
 iphe anwunwu;
- 3 kẹle ọo g'eedeje ọnu lẹ nri
 g'a maru ụtso iya-a;
 bụ g'aangajẹ nchị l'opfu.
- 4 G'anyi hotanu iphe,
 pfuru nhamunha l'onwanyi.
 G'anyi tükonu nwua iphe,
 dụ ree.

- 5 Mbụ ịe Jobu sụru l'iswi dụ
 iya mma;
 ọphu Chileke ekwedu iya
 aharu enge.
- 6 L'ọ kalẹru iya; a sụkwapho ịe
 ya adzụ ụka.
 L'ọ tọ dudu iphe, ikpe iya
 nmaru iya; ọle ọnyá,
 o gburu iya bụ agwọta
 agwọta.
- 7 ?Unu hụmajeru onye ọphu
 dụ ge Jobu;
 onye ọphu angụ ekwe une
 g'onye angụ mini?
- 8 Ndu ẹphe l'iya achị idzu lanu bụ
 ndu eme ẹjo-ememe.
 Ọ buru ndu ẹjo-iphe be ẹphe
 l'iya aswị ọswi;
 9 kele ọ sụru l'ọ tọ dudu iphe,
 nemadzụ erita l'eme iphe,
 dụ Chileke ree.
- 10 Sụ-a; unu ngabekwaru mu
 nchị; unube ndu iphe
 edoje ẹnya.
 Tụswekwa! Chileke ta
 abyakwa eme ẹjo-ememe!
 Ọkalibe-kangokotaru-nu ta
 abyakwa eme iphe,
 adudu ree!
- 11 Ọ kwa ụgwọ be ọpofuje
 nemadzụ l'iphe, o meru.
 Ọ nọdu ewotajeru iya iphe,
 gbaru umere, oome.

12 Mbụ-a; ọkpobe opfu kpọ
bụ lẹ Chileke te emejekwa iphe,
adudu ree.

Ọkalibe-kangokotaru-nu ta
anmaswejekwa ikpe
anmaswe.

13 ?Bụ onye meru Chileke g'ọ
buru onye eliphe-a
l'ophu du l'eka?

?Bụ onye bu onye suru iya g'o
lekota mgboko-a gbaa
mgburugburu?

14 Ọ -buru l'ọ bu uche iya;
o seta ndzu sephu azu;
bya erwuta unme,
aatuje atutu doberu onwiya;
15 nemadzu l'ophu atukoepho
buru mkpurupyata
mgbo lanu.

Nemadzu anwuhu je aburu eja,
no l'ali.

16 Ọ -buru l'iphe edoje ngu enya;
ngabekwa nchi;
numakwa iphe-a,
mu abya epfufu-a.

17 ?Bụ onye ono, ikpe pfuru oto
du ashi a-bya aburu onye
bu ishi?

?I suru g'ii-nma iya ikpe;
mbu onye ono, pfuru oto bya
aburu onye paru eka ono?

18 Todbudu iya bu onye ono,
asuje ndu eze: Ọ to dudu iphe,

- unu bu!
 L'ò sù ndu nweru ẹnya:
 Ejo-iphe parụ unu ẹka l'ẹhu!
- 19 O o ya bu onye ono,
 ta agbajeduru nemadzu ọdzori
 opfu l'ọ bu onye-ishi;
 ọphu oo-wotadu iphe,
 o gogo meru onye ụkpa
 meeru onye eze opfu l'ọ bu eze;
 kele ẹphenebo tukoru buru
 iya gude ẹka iya mee phe.
- 20 Ẹphe anwuhuje
 buregedegengu l'echi abali.
 Ọnmaghukota igwe ọha anmaghu;
 ẹphe anwushihukota.
 Ndu oke amadu be oowofujekwa;
 ọle ọ to bukwa nemadzu
 egudeje ẹka wofu phe.
- 21 “Sụ-a; ẹnya Chileke
 tukokwaru iphe, ndiphe eme
 humakota;
 teme ọ nodu ahumakotaje
 ẹka ẹphe zoru okpa.
- 22 O to dudu ẹka agba ọchii,
 du nu; ọphu ọ dudu ẹgube
 dadishi, du nu,
 bu ẹka ndu eme ejo-ememe
 e-je edomia onwophe.
- 23 O to dudu Chileke mkpa
 ke ge ya bya awata enyocha
 nemadzu ọzobaa;
 mbu ke g'ẹphe bya anodu iya
 l'iphu k'ikpe ọzobaa.

- 24 O too jejedu akpata ishi teme
l'ọ chikaa ndu oke amadu;
bya ahoo ndu ozo dochia
enya phe.
- 25 Eshinu o makotaru iphe,
ephe eme
be oomekpeje phe l'enyasi
gwee phe arakabya.
- 26 L'ọ hua phe ahuhù ejo-iphe,
ephe eme l'edzudzu-oha;
eka onyemonye a-huma phe;
27 opfu l'ephe haru
etso Chileke;
ophu o dudu iphe,
o suru g'e mee, duru ophu
ephe akpaje ishi ememe.
- 28 Ephe emeje; ndu akpa nri
echi mkpu, erwuje Chileke
le nchi;
k'ophu Chileke anumaje
ekwa ndu adudu g'ọ du phe.
- 29 O ọ bu; o -sukwanu le ya te
eyekpoda onu; ?bu onye suru
iya anma ikpe?
O -domia iphu iya;
?bu onye bya adu ike huma iya?
O ọ kwa iya nwe nemadzu
bya enweru oha l'ophu.
- 30 Oomeje g'onye te emedu ele
Chileke ta aburu onye-ishi;
k'ophu o too watadu agbaru
ndiphe onya.
- 31 O -buru ke ge nemadzu

sụ Chileke:

‘O dekwaru mu; ọphu mu
alaphubaekwa azụ l'iphe-ẹji
ono ọzo;

32 Zinaa mu iphe,
mu taa dudu ike ahuma.

Mu -mewaa ẹji;
mu tee emehedu iya ọzobaa.’

33 Sụ-a; ?bụ g'ọ dụ ngu ree
bụ g'i dobesu ẹ Chileke
a-pfu ngu ugwo l'eka
i ti kwedu g'izimanu lwa
ngu azu?

Ọ kwa ngu e-pfukpoepho
l'onwongu; ọ tọ bukwa
mbedua. Pfukwaa iphe,
ị maru.

34 Gẹ ndu iphe edoje ẹn्या
yena ọnu.

Gẹ ndu mmamiphe,
l'anụ iphe-a, mu epfu-a
pfunaa sụ:

35 ‘Jiobu epfukwa opfu onye
enwedu egomunggo;
mbụ l'opfu iya ta adukwa
omilomi.’

36 Ọ dụ g'a sụ ẹ Jiobu bẹ
aa-hukpoepho ama hu-rwua
ya l'ishi;
kele oopfu g'onye ẹjo-iphe.

37 O meru iphe-ẹji; teme ọ nọdu
eko Chileke okpa l'ishi.

Ọonoduje l'echilabọ anyi akụ

ẹka aja anyi ewenu;
tẹme ọ nọdu epfu ẹjo opfu
mpfukwase ekpu Chileke.”

35

- ¹ Elihu nọdu eyekwarọ ọnu,
ooye.
- ² Sụ-a; ?i dobesụ l'iphe ono
bụ apfubekoto;
g'ì sùru l'apfubekoto nkengu
ka kẹ Chileke?
- ³ Ọle ì jìkwaru iya nù sù:
?Bù urwu gùnu bẹ iirita iya?
Sù: ?Bù gùnu bù obunggo,
dù iya nù l'ì harù eme iphe-ẹjì?
- ⁴ Gebe gẹ mu bya eyeeru
ngu ọnu;
gù lẹ ndu unu l'iya eshi ọnyà.
- ⁵ Palikpodapho ọnya lee
l'akpaminigwe.
Tabekpodapho ọnya tatata
l'urwukpu ono,
nọ ephekerephe
ephekerephe l'uzo ishi
ngu ono.
- ⁶ I -mee iphe-ẹjì;
?i mekataru Chileke l'awe?
Iphe-ẹjì ngu -dùkpoo igwerigwe
g'ọ dùhabe; ?oo-mebata
iya gùnu?
- ⁷ Teke ọ bù l'ì pfuberekoto;
?ì nùru iya gùnu?
Tọo ?bù gùnu bẹ ọnata

l'ẹka ngu?

⁸ Ejo-iphe, iime buẹpho
onye dụ gẹ ngu bẹ
oomekata.

Apfubekoto ngu bukwarupho
unwu-eliphe bẹ ọ dọru.

⁹ “Oobujeru; e -menuka
ndiphe ewere;
ẹphe eye mkpu l'ọnu.

Ẹphe echiaha: ‘Ojileka togbó’;
kẹle ndu ike dụ l'ebyi
pẹ ẹka l'ẹhu.

¹⁰ Ọle ọ tọ dọdu onye asuje:
?Bụ awe bẹ Chileke,
bụ onye meru mu nọ nọ;
onye ewojeru ebvu-oma
nọ nemadzu l'enyashi;
¹¹ onye ka anyi ezi iphe
eme lẹ g'oozi anọ, bu l'eliphe;
bya emee; anyi ka ẹnu,
ephe l'eli amaru iphe.

¹² O to yejeduru nemadzu
ọnu mẹ ọ -nọdu echi mkpu.

Ọ buru iphe, kparu iya nọ
bụ lẹ ndu ejo-iphe
kunukaru onwophe.

¹³ Tororo iya bụ lẹ Chileke te
eyejedu ọnu l'arwọrwo iphoro,
ẹphe anọduje arwọ;
mbụ lẹ
Ọkalibe-kangokotaru-nu te
eyejedu ọnu l'ẹgube
iphe ono.

- 14 ?Denu g'ọ bụchia gụbe onye
 sụru l'ị tị hụmaduru iya
 ahụma ophu bẹ ọo-nọdu
 angaru nchi;
 mbụ gube onye sụru l'ikpe
 ngu dabyiru l'ataphu iya;
 i je l'anọdu echeru iya?
- 15 Teme ị sụkwapho l'ẹhu-eghu
 Chileke ta adudu iphe, oomeje;
 ophu ọokpajedu onye
 eme ẹjo-iphe ishi.
- 16 Ọo ya bụ ẹ gube Jiobu
 epfu mkpọkoro opfu.
 Iipfu mpfukwase opfu,
 enwedu ishi.”

36

- 1 Ophu Elihu ahakwaru
 iphe, oopfu.
- 2 Tabakpọkwapho nshi
 nwanshii;
 gẹ mu goshi ngu l'o
 nwebakwaru-a iphe, ee-pfu
 l'opfu ẹhu kẹ Chileke.
- 3 Ẹka mmamiphe mu shi
 dukwa ẹnya.
 Mu jekwa egoshi l'ikpe
 kalẹru onye ono,
 meru mu nụ ono.
- 4 G'o dokwaa ngu ẹnya ree
 l'opfu, mu epfu ta
 adukwa ophu bụ ụka.
 L'onye iphe doru ẹnya doẹbe

bẹ unu l'iya tɔkokwaru
nɔdu l'eka-a.

⁵ Chileke pakwaru ẹka;
ọle o to lephuduru
nemadzɔ ẹnya.

Ọ paru ẹka bya ekeru
jɔmujimu l'iphe edo ẹnya.

⁶ Ndu ẹjo-iphe bẹ o too
dobejedu ndzu.

Ọ nɔdu anujekwanu ndu
aakpa ẹhu iphe,
rwuberu phe nu.

⁷ Ẹnya ta alufujedu iya
alufu l'eka ndu pɔberekoto
nɔ.

Oomeje; ẹphe lẹ ndu eze
atuko buru eze;
tẹme ọ nɔdu ekutseje phe
ephekerephe jasɔ l'ojejoje.

⁸ Obenu teke ọ bu l'a tɔru
nemadzɔ mkpɔro;
l'udo iphe-ẹhuka tɔru
iya swiswia;

⁹ bu iphe, Chileke eme bu
l'oogoshi phe iphe, ẹphe meru;
l'ẹphe meru iphe-ẹji l'eka
ẹphe eku onwophe.

¹⁰ Iphe, oome bu g'ẹphe ngabe
nchi l'uzo, aakpo-ziru phe;
bya asukwa phe pho
g'izimanu ẹjo-ememe,
ẹphe eme lwa phe azu.

¹¹ Ẹphe -mee iphe, o pfuru

bya ejeahaaru iya ozi;
 nweswe ndzụ phẹ ọphu
 phọduru nụ aburu phẹ
 eswe ẹhu-ọdu-guu.

Nwapha olemole ono,
 phọduru ị ndzụ phẹ ono aburu
 apha, a-buru phẹ k'oma k'oma.

12 Obenu teke ẹphe jikaru
 l'ẹphe te eyeduru iya ọnu;
 ọoburu ogu-echi bẹ
 ee-gude saa phẹ ọsampfu.

Ẹphe anwuhu l'ẹbe ẹphe
 enwe egomunggo.

13 Obenu ị ndu Chileke adudu
 l'obu phẹ ewojeru
 ẹhu-eghu gude suchia
 obu phẹ ọbu;
 mbụ o -kekpoo phẹ ẹgbu
 g'ookehabe;
 ẹphe ta aradu g'e yeru
 phẹ ẹka.

14 Ẹphe agbakwohuje nwuhu
 teke ẹphe bukwađu okorọbya;
 tsoru unwoke, a ọoru ị nshi,
 agba ukpara laa l'ite lanu.

15 Obenu ị ndu eje iphe-ẹhuka
 bẹ ọnafutaje l'iphe-ẹhuka ono.

Ọ nọdu epfuje opfu gude ọdu
 phẹ obu m'ẹphe nọdu
 eje iphe-ẹhuka ọbu.

16 Ọ kwa mkpu bẹ ọogbaru
 ngu.

Oome g'ọ phafuta ngu l'asha

- iphe-ehuka dobe ngu le
 phorokotoko aka
 adukpoedu iphe,
 akpakube ngu nu;
 teme nri, e doberu ngu g'i
 ria buru nri, kachaa ree.
- 17 Obenu le nta-a be ikpe,
 e kperu ngu bu ikpe,
 gbaru onye ejo-iphe.
 Ikpe, pfuru oto yee
 iswi-odumma tuwaru
 ngu swiswia.
- 18 Tokwa ehu g'o to du onye
 e-gude eku deru ngu ye.
 B'ekwekwa g'oke uphalazu
 chechi ngu iphu.
- 19 Eku ono; ?oo-me g'i ti
 noduhe l'iphe-ehuka-a?
 Too ?ii-gude okpehu ngu l'ophu
 gude nahu iya?
- 20 Be lekwa enya udu enyashi
 ono,
 emeje ge ndiphe shi
 l'ibe phe chihu ono.
- 21 Tonupho ehu g'i ti je aghaar
 ejo-ememe iphu,
 bu iphe, mu ele enya
 l'i ka ahata eme l'eje iphe-ehuka.
- 22 Chileke be e kutseru kele
 ike du iya shii.
 ?Bu onye bu O-zi-iphe,
 aatu eyeru iya?
- 23 ?Bu onye suru asu Chileke:

- Waa iphe, ii-me baa.
 Tọo ?bụ onye sụru iya asụ l'iphe,
 o meru bẹ o mekwaru eji?
- 24 Nyatajekwa kwolita
 ozi Chileke,
 bụ iphe, ndiphe agụ ebvu
 gude etu iya ẹpha.
- 25 Nemadụ l'ophu
 hụma-dzuwaru iya.
 A nọdu agbeje ụzenya ele
 iya phoriphori.
- 26 Chileke pakwaru ẹka
 mebyi apapa;
 daghata ẹ mmamiphe anyi ha.
 O tọ dukwa onye adu ike aguta
 apha ole o nọwaru ndzụ.
- 27 Oomeje mini; l'oda paapaa.
 O buru mini ono l'edzeje
 wọowoowo awu ala
 l'oma nggele l'oma nggele.
- 28 Igwe avuje tsutsutsu;
 l'o dzekwapho mini,
 paru ẹka wushiru unwu-eliphe.
- 29 G'oogudeje erwu erwurwu
 ta adukwa onye o doru ẹnya;
 ophu o dukwa onye maru
 g'oomeje shi l'okpoku iya
 atu egbigwe tarara tarara.
- 30 Hụmanu g'o woru
 ebemu-igwe iya doo
 onwiya mgburugburu;
 bya egude iya ekpuhaje
 ẹka kachaa omilomi

l'eze-enyimu.

31 Oo egube ono bu g'o gude
elekota eliphe l'ophu.

O nodu emefuta nri eme
k'etsutsu iya.

32 Iphe, jiru iya mkpoji-eka
bu egbigwe.

O buru eka du iya ree be
otuje iya.

33 Oo ririri be oodeje l'a
maru l'obyawaa
edze oke mini;
mbu je akpaa l'eswi,
eeche echeche
egoshijechakwaa l'igwe
emewaa ome mini.

37

1 Nta be meji etekwa mu
ophe;
mbu le meji akufukwa mu
akufu.

2 Unu ngabekpodapho!
Unu ngabe nchi
numakpodapho olu Chileke!
Unu numakpodapho ekiri,
o gude onu iya asu!

3 Oomeje; ebemu-igwe alo
waawaa l'igwe;
l'o rwuchaa eka igwe beru
ali beru.

4 Teke e mechaerupho;
o raahaa ora;

- l'o gude oke olu iya atu
egbigwe.
- Ọphu ọ dudu ọphu oodophuje
azu me ọrà iya gbụfuwa.
- ⁵ G'olu Chileke egudeje edebe
ririri be du oke ebvu.
- Ọ nọdu emeje iphe, paru ẹka;
meghata g'oodobe
nemadzụ ẹnya.
- ⁶ Ọo ya asuje aka-mini-sunoo
g'ọ daa l'eliphe.
- L'ọ bya asukwapho igwe: Ngwa;
dzee mini dzeshia ya ike!
- ⁷ Oomeje ge nemadzụ
jebuhu ozi;
shi nno goshi onyemonye g'ozì,
ya eje habe shii.
- ⁸ Ụnwu anụ anọduje ekpu
ekpukpu ndzụ.
- Ẹphe ejeje edomichaa onwophe
l'ime ọgba phe.
- ⁹ Oke pherephere eshije l'ọgba
iya;
teme oyi-atsutsu nọdu
eshije le taphutaphu pherephere.
- ¹⁰ Mkpukorophu akamini bu unme,
Chileke turu atutu be ooshije.
- Ọ -tụa ya; phosa phosa mini,
doru nyimunyimu akpukoo
ophu.
- ¹¹ Urwukpu be oogudeje
tsutsutsu mini wu-jia awu-ji.
- Ọ buru urwukpu ono

anọduje atụ egbigwe
gbaagbaa.

12 O nọdu abujeru; o -zia pẹ;
ẹphe alojashia onwophe
waawaa l'eliphe l'ophu;
wata eje ozi, o ziru pẹ.

13 Erwurwu bẹ o gude bya
g'o gude iya hụa
unwu-eliphe ahùhù;
ọzoo gude iya gbaa mini
l'eliphe gude goshi
n-yemobu iya.

14 Ngabekpodapho nchị l'iphe-a
Jiobu!

Hakpọephe iphe, iime;
gbukpodapho igo l'ọdu-biribiri
Chileke!

15 ?Ị makpọoru gẹ Chileke
egudeje esede urwukpu
l'akpaminigwe?

?Ị maru g'oogudeje alọ ebemu
phaaphaa?

16 ?Ị maru g'urwukpu adojeru
l'eli iya awungwa l'akpaminigwe?

Ono bukwa ẹguru ozi, o jeru;
mbụ onye tukuru
iphemiphe makotaru onoya;

17 mbụ gube onye uwe ngu
ekpo okpomoku l'eka
mgboko deru yekete.

O buru iphe, kparụ iya nụ bu
pherephere, shi l'uzo ndohali.

18 ?Ị-dụ-a ike mee iphe, o meru;

mbụ mee; akpaminigwe phushi;
 g'o meru nkiya phushi
 lẹ mgboko-a;
 ọ kpọo gbengu g'onyo,
 a wuru awuwu?

19 “Kanuru anyi iphe,
 anyi e-pfuru iya.

Anyi ta adukwa ike rikobe iphe,
 anyi e-pfu.

Ọ buru iphe, kparu iya nu
 bu l'uzo anyi gbanukaru
 ochii.

20 ?Ee-je epfuaru iya lẹ mu
 achọ epfu opfu tọo?

?O nweru onye a nonyaa
 rwọahaa arwọrwo g'e
 lwee ya tọo?”

21 “A bya lẹ nta-a; nemadzu
 te elejekwa ęnya l'ęnyanwu,
 echi echichi;
 mbu mę igwe bọo gbarara.

22 Chileke abyaakwaa. Ọ
 dukwa ebvu l'ęnya bya adu
 akpabiri. O shikwa l'isheli abya;
 kwaa onwiya akwa lẹ
 mkpọla-ododo.

23 Ọ kwa iya bu
 Ọkalibe-kangokotaru-nu;
 buru onye ęka anyi ta
 abyadu erwu erwurwu ophu.

Ọ paru ęka l'ike-okpu;
 mę l'ekpe ikpe, pfuru oto.
 Apfubekoto nkiya paru ęka;

ọphu oomedu
 nemadzụ ewere.
 24 Noo g'o gude ndiphe
 nọdu atsu iya ebvu.
 Ndu ari l'ephē maru iphe
 bẹ tọ gubeduru iphe."

38

Chipfu wataru eye onu

1 Tọbudu iya bu; a nonyaepho; oke
 pherephere wata ezizi. Chipfu gbẹ l'oke
 pherephere ono wata eyeru Jiobu onu. O
 su Jiobu:

2 ?Bu onye epfu iphe pho?
 ?Bu onye woru enweru
 egomunggo mu rwutoshia;
 l'ebe abụ l'onye obu maru iphe,
 oopfu?

3 Rikota onwongu gẹ nwoke;
 gẹ mu bya ajia ngu aji!

O kwa g'i zaje mu iya!

4 Su-a; ?bu awe bẹ i nọ teke
 mu turu okpa mgboko-a
 l'ophu?

Karu mu iya; m'o buru l'o
 doru ngu enya!

5 ?Bu onye turu iya onyeka su
 l'owa-a g'oo-habe baa?
 ?I maru iya?

?Bu onye gude eri tuta l'uswekete
 iya?

6 ?Bu le gunu bẹ a kpobechaaru

ọkpa iya?

Too ?bụ onye gbuberu ishi
mkpuma, gude mgboko;
7 mbụ teke ono, e mechaaru;
kpokpode nchi-abọhu tụ
uzu wata agụ ebvu;
unwu-ojozi-imigwe g'ephe
hakota gbọaha kwakokoo.

8 ?Bụ onye guru ụzo gburumu
gụ-buru eze-enyimu ye
l'azu teke ono, o meru
kpukungu kpofuta l'epho
ne iya ono?

9 Noo teke mu woru
urwukpu mee uwe yee ya;
bya eworu tsukiribaa
ochii phua ya g'ekwa;
10 bya akpaaru iya oke
eka oo-jeberu;
bya asu-chia ya woru iya
gua kpukpurukpu.

11 Noo teke mu suru: "Lekwa
eka ii-jeberu; ba ghatakwa
eka ono!

Lekwa eka akparamini
ngu e-ku onwiya
jeberu gburu."

12 ?I sujewaru nchi-abọhu
l'owa-a iphe, oo-me baa?

?Ozoo karu geregere utsu
l'owa-a eka rwuberu iya nu
baa?

13 ?I sujewaru iya g'o je

egudegbaa ẹka l'igburonu
igburonu mgboko
jia ya phulaphula jishia ya
ndu ẹjo-iphe?

14 Mgboko l'ophu kpuru
oronmono g'urwa, e gude
eme ohubama;
teme o nodu aduje rwarri
g'uwe.

15 Ndu ẹjo-iphe be e te
ekwedu g'iphoro duru;
teme a nyakwoshichaa phe
eka ẹphe shi palichawa
ephekerephe.

16 ?I jejewaru ije jerwua
eka oke-enyimu agba
deredere?

?I jejewaru ije l'eka enyimu
bu utubuku?

17 ?E goshijewaru ngu
onu-abata ali-maa?

?I humajewaru eka eeshije
abahu l'ononyo onwu?

18 ?I rijekpowaru iya;
o doo ngu enya su ge
mgboko-a l'ophu habe
phorokotoko?

Karu mu iya me o -buru li
tukoru iphemiphe-a
makotaru!

19 ?Bu awe be eeshije eje
eka iphoro bu?

?Bu awe be ochii chiru

upfu yee?

20 ?Ị dụ-a ike dua ndu ono
g'ephe lagbaa ẹka ephe
shigbaa?

?Ị maru ụzo, eeshije eje ẹka
ephe akwaje?

21 Mu maru-a l'ị makotaru
iphemiphe ono;
eshinu a nwuadaru ngu
teme e mee iphemiphe ono.

Ị nọwaru ndzu nọgbawaa
apha, dụ igwerigwe!

22 ?Ị bahujewaru l'ulo ẹka
aakubeje aka-mini-sunoo?

Tọo ?ị humajewaru ulo
ophu aakubeje ire egbigwe,
23 buro iphe, mu doberu
kwaberu teke iphe-ehuka a-bya;
mbu kwaberu mboku ogu
a-da.

24 ?Denu gbororo, eeshije eje
ẹka iphóró futaru;
ozoo ẹka pherephere ụzo
enyanwu-awawa
eshije dzuru mgboko?

25 ?Bụ onye gbuwaru oswawara
tọgbo;
ọ buro ụzo, mini eshije edze;
bya atogboru egbigwe ụzo,
ọo-nodu eshi.

26 Ọ nọdu egudeje iya agba
mini l'ẹka nemadzu te
ebudu ebubu;

mbụ echięgu, adudu onye
bu iya nụ;

²⁷ gude iya mee gę ncharacha
ali, adudu iphe, du iya nụ
ngu-jia ępho wata
efushi ęswa ọphúú.

²⁸ Mini ono, igwe edzeje ono;
?o nweru nna ọo?

Mbụ-a ?bụ onye nwuru iji,
akwa akwakwa?

²⁹ ?Bụ nwanyị ole nwuru
mkpukorophu mini oyi?

?Bụ onye tsuru ime
mkpukorophu iji mini ono,
eshije l'imigwe adashihu ono,
³⁰ bụ iya emeje mini l'ọ
kpukoo ophu du
gę mkpuma;
mbarabata ogbumini ahukoo
ahuko?

³¹ ?Ii-du-a ike swikobe
kpokpode, Puleyadesu?

Too ?i du ike atoshi
kpokpode, Orayonu
g'ọ nọdu nanu nanu?

³² ?I du ike eme kpokpode,
dugbaa nụ g'ęphe
futaje teke gbaru phę nụ?

Too ?i du ike edu kpokpode,
Beya; yę ụnwu iya?

³³ ?I maru ekemu, a turu doberu
iphe, bu l'imigwe?

?I-du ike mee g'ọ buru g'ọ

- dụ l'imigwe bụ g'ọ-dụ l'eliphe?
- 34 ?Ị dụ ike ara ọrà g'o rwua
 ẹka urwukpu nọ;
 ọzoo g'ị ratsua mini
 l'a-gba utso, e-ri ngu nụ?
- 35 ?Bụ ngu atufuje ire egbigwe
 g'o tsoru ụzo iya?
 Ẹphe -jeshia; ?ẹphe abya asụ
 ngu l'ẹphe ejeakwa ozi,
 i ziru phe?
- 36 ?Bụ onye nuru ọkpoma
 egomunggo;
 bya emee g'iphe doje
 uche ọnya?
- 37 ?Bụ onye bẹ mmamiphe
 iya rwuru k'aguje
 urwukpu ọgu?
 ?Bụ onye awụshije itemini,
 sụru l'imigwe;
 38 mẹ urwuku hukọepho
 ahuko; bya anmaa agbadagba.
- 39 “?Bụ ngu ejeje akparu
 nyee oduma nri;
 bya anụ-jije unwu iya
 ẹpho g'egu ta aguhe phe;
 40 m'ẹphe tuko nọdu
 l'ime ọgba phe;
 ọzoo l'ẹphe tukurorọ geparu
 l'ote ẹka ẹphe e-gbu anụ?
- 41 ?Bụ onye anuje okpoko-ohà
 nri, ẹphe erije;
 teke ono, unwu iya
 anọduje echiru Chileke

mkpu nri tsoru
 ẹkameka aghaphe acho
 nri, ẹphe e-ri?"

39

- ¹ ?Iimajeru teke egħu-ọswa,
 bu l'úbvú nwùru nwa?
 ?Iihubeje ama l'ọwa-a teke ne
 ele anwù nwa baa?
- ² ?Iiguje ọnwa ole,
 ẹphe anoje tẹme ẹphe
 atsua ime?
 ?I maru teke ẹphe ezedaje
 gẹdegede?
- ³ Ọobujeru; ẹphe -bya ezeda;
 ẹphe egbushi ikpere l'alì
 woru nwa phẹ nwua.
 Ime, shi eme phẹ nù
 aburu sarìmu.
- ⁴ Ụnwu iya ọbu agbashia ike
 nọdu l'ime ẹgbudu
 l'ẹka ono vua vughee.
 Ẹphe aparu ne phẹ ono haa
 gbakashihu;
 ẹphe ta lwapfutabaẹdu iya.
- ⁵ ?Bù onye harù
 nkafù-ìgara-ọswa;
 ọ nọdu akpaphe;
 ọphu ọ dudu iphe,
 eme iya nù?
 ?Bù onye tọshiru phẹ haa;
 ẹphe nọdu ejeje ẹka dù
 phẹ ree?

- 6 Echięgu ali ọkponku be mu
 nukpoeru iya pho su
 g'o buru;
 bya emee ali ono,
 buepho unu unu ono g'o
 buru eka oo-buru eburu.
- 7 Woowoowo, anoduje atu le
 mkpukpu be onoduje
 achi ochi;
 ophu onudu gbagbagba,
 ndu udumali anoduje ara.
- 8 Ubvú ubvú be otukoje gbaa
 ophorokpo achọ iphe,
 oo-ri;
 achokpoepho nwa
 rwushirwushi eswa
 ge ya taa.
- 9 ?Atsu e-kwe-a bya anodu
 meahaa iphe,
 i suru g'o mee?
- Mbu-a; ?ii-dobe iya-a g'o
 nodu l'eka eeyejeru anu nri;
 l'o nodu iya l'enyashi?
- 10 ?O duru ophu ii-du ike
 tu eri kputa kpuru g'o
 jeeru ngu ozi egu;
 ?ozoo ii-gude iya-a kọ
 okoro le nsuda?
- 11 ?Ii-chiru upfu kwee ya
 su l'o shihuru ike?
 ?Ii-paru-a ozi ngu eka o
 shihuru ike paru
 haaru iya?

- 12 ?Ii-kweta haa ya g'o je
 evulataru ngu ereshi ngu;
 vuru iya je akube l'ulo,
 eechishije bali?
- 13 Oke-enu osuturichi egudeje
 ehu-utso chia nkù pyaa.
 Ole i tii tuduru ebà iya eyeru
 ebà korokoro.
- 14 Oke-enu osuturichi ono atuje
 ekwa l'ali.
 O buru l'ali be onoduje kpua
 ya.
- 15 O to kpadu ishi k'a nonyaa
 a zoo ya okpa zopyaa;
 ozoo l'unwu anu
 l'a-zopyashi iya.
- 16 Unwu iya be onoduje ehe
 anuka anuka g'ephe ta
 abudu unwu iya;
 ophu o kpadu ishi ke
 l'akanya, o seru bu
 ola-l'iswi;
¹⁷ noo kele Chileke ta anuduru
 iya mmamiphe.
- Ophu o keduru oke
 k'egomunggo nu yebedua.
- 18 Ole o -wokwanuru nkù iya
 phushia ke ge ya wata
 agba oso
 l'o nyighaaro inya yee onye
 no iya l'eli chia phe ebyi.
- 19 Su-a; ?bu ngu nuru inya ike,
 du iya nu?

Tọ ọ bụ ngu gbarụ nza-inya
 phushi iya l'olu;
 ọ dụ kẹ nwa
 buyabuya ono?

20 Ọ bụ ngu meru iya;
 ọ nọdu anọduje apfu
 shooshoo g'igube ono;
 o -zia unme fuu;
 ndzụ agụhu unwu-eliphe?

21 Ọzoje garamu garamu;
 ẹhu atso iya ntumatu
 l'ike dụ iya.

Looje ẹnari ẹnari ejepfu ọgu,
 duru iya nụ.

22 Ọchi bẹ ọochije ndzụ-agugu;
 kele ọ tọ dudu iphe,
 ọotsu ebvu;
 ọphu ọola-phujedu azu
 mẹ a haliaru iya ogu-echi.

23 Ikpoto apfu, kuru l'ekpa apfu,
 nọ iya lẹ mgbureku
 anọduje azu iya
 yogoro yogoro;
 yele o-gbungerengere arwa.

24 G'o gude awu kẹ wugelengu
 wugelengu bẹ
 ooghudujehaa mẹ o
 lwee alị elwelwe;
 ọphu ọ byadu apfuru doo
 mẹ e gbua opu.

25 E -gbua opu ono l'o woru
 okwe rwua.

Ọgu -nọdukwaduro ụzenya;

l'ọ kpọtawa ẹgburu iya.
 L'ọ nūwaro olu ndu-ishi
 ojọgu ono;
 waa mkpu-ọgu, ada nū.

26 “Sū-a; ?bū mmamiphe ngu
 bẹ ọkpo-ngwere gude
 ephe l'eli?

?Bū ngu meru iya;
 ọ nọdu ewojeru ñkù jaa
 l'uzo ndọhali ono?

27 ?Bū ngu ezije ugo g'o phee
 phaa phemihu imeli imeli
 je anọdu kpaafune iya
 l'ẹka dū ephekerephe
 ephekerephe?

28 Ẹka ọonoduje bū l'újì,
 nọ ephekerephe
 ephekerephe;
 nọwaro l'ẹka ono
 jasū nchi abọhu.

Ọ būru l'ẹka ono bẹ oodomije
 onwiya.

29 Ọ būru ẹka ono bẹ ọonoduje
 levu iphe, oo-ri.

Ọ -nọdukwaduro ụzenya;
 ẹnya iya arwutawa iya.

30 Ụnwu iya amije mee.
 Ọ būru ẹka odzu dabyiru bẹ
 yẹbedua anọduje.”

40

¹ Chipfu nọdu epfukwaro
 eyeru Jiobu sū iya:

- 2 “Gube nwọphu abarụ
 Ọkalibe-kangokotaru-nu
 mba;
 ?ị sụru g'ikajeru iya iphe,
 oo-me?
 Gẹ gube onye ono,
 ebo Chileke ibo ono
 yena ọnu l'opfu-a,
 oopfu-a!”
- 3 Tọbudu iya bụ; Jiobu bya eyeeru
 Chipfu ọnu sụ iya:
- 4 “Mu bụkwa onye ta abadu ị
 mkpa.
 ?Denu gẹ mu e-shi jeye ọnu
 l'iphe, iipfu?
 Mu woakwaru ẹka ẹe l'ọnu.
- 5 Mu pfuakwaru akpọ opfu
 lanu; ọphu mu
 adukwanu ike eye ọnu
 l'ọphu iipfu.
 Mu bya epfuwa akpọ labọ;
 nta-a bẹ mu tee
 pfubaekwa ọzo.”
- 6 Noo ya bụ; Chipfu bya agbekwa
 l'oke pherephere ono pfuru
 yeru Jiobu sụ iya:
- 7 Rikota onwongu gẹ nwoke;
 gẹ mu bya aja ngu aji.
 Ọọ ẹpho g'i yejekwa ọnu
 l'iphe, mu aji ngu.
- 8 ?Ii-dụ ike mebyia ikpe,
 mu kperu?
 ?Ii-dụ ike nma mu ikpe;

- k'ophu ikpe a-kaleru gubedua?
 9 Odzu-eka ngu; ?o ha ge ke
 Chileke?
 Too ?i du ike egude olu ngu
 atu egbigwe g'ootuje ono?
- 10 Ngwanu; gudenu
 o-gbu-nwainwii ye akpabiri
 kwaa onwongu akwa!
 Yena akwabẹ ubvụ ye
 enweru enya g'onye
 yeru uwe!
- 11 Gbanwubenu iphu ehuka
 ehuka gude goshi l'ehu
 egbu ngu egbu!
 Lenaa enya huma iphe,
 bukpuo ndu eku
 onwophe kuzeta phe ali;
 12 mbu lee enya huma iphe,
 bukpuo ndu eku
 onwophe mee phe
 g'ephe darwua ali!
- Tukonu iphe, bukpuo ndu
 ejo-iphe mebyishikota
 l'eka ephe pfuru!
- 13 Tuko phe g'ephe ha lia elili l'ali!
 Woru phe iphu kpupyabe
 ekpupyabe l'ime ilu!
- 14 Noo teke mu e-kweta ngu
 l'ekutara ngu a-du-a ike
 dzoo ngu.
- 15 Lenaa oke anu ono,
 bu behemotu,
 bu anu, mu tukoru gu l'iya

- mee dobe;
 teme o buru anu,
 ata eswa l'ali g'eswi.
- 16 Su-a; lenaa egube ike,
 du iya l'okpa!
- Humawaro egube ike,
 du iya l'akwara akwara,
 gbashiru iya l'epho!
- 17 Odzu iya anoduje enwunga
 g'oshi sida.
- Anu anu, du iya l'utapfu
 ligbachaaru eligba.
- 18 Okpu iya bu mkpurukpu
 onyirubvu be o bu.
- Oshi-okpa iya buru mgborigwe.
- 19 Oo ya kachaa shii l'iphe,
 bukpuo iphe,
 Chileke meshiru dobe le
 mgboko;
 ole onye ono, meru iya nu
 ono egudejele-a
 ogu-echi iya zaa ya ntse.
- 20 Ubu ubu anoduje ewotaru
 iya iphe, ephe metaru;
 teme anu, bu l'egbudu
 g'ephe ha nodu
 anoduje iya ntse ebvu
 ebvu.
- 21 Oozeje le mkpula oshi lotusu;
 woru onwiya domia le
 mkpula eswa, no l'uda.
- 22 Oshi lotusu ono egudeje
 epfukala, du iya nu

gude domia ya.
 Ekali oshi wilo nọ-phae ya
 mgburugburu.
 23 Mini -nọdu atụ kpereree;
 o too yedu iya ebvu.
 Ophu ọ dudu iphe,
 eme iya nụ
 m'obetakpọo ẹnnyimu
 Jiódanu gbaa utso
 sùbe iya l'ọnu.
 24 ?Bụ onye sụru iya egude
 m'ọ nọdu ele iya ẹnya?
 Tọo ?bụ onye sụru
 g'ọo-nmata iya swọo
 ya imi?

41

1 ?Ii-dụ-a ike gude
 ikokoro nmata
 ejo-oke-agiyi,
 bụ Leviyatanu;
 ọzoo tụa ya eri l'ire woru
 libe elibe?
 2 ?Ii-dụ ike ye iya eri l'imi
 lipyia;
 ọzoo woru ikokoro dzube
 iya l'agba?
 3 ?Ii-dụ-a ike mee ya g'ọ wata
 ngu arwọ sụ g'ị
 phụaru iya obu-imemini?
 ?Oo-gọzeta olu pfuru opfu nụ
 ngu?
 4 ?Ii-dụ-a ike mee g'unu l'iya

- gbaa ndzu
 g'ò b̄uru ohu ngu jas̄u
 g'ìi-n̄o-beru?
 5 ?Ìi-d̄u-a ike mekoshi iya
 g'eemekoshije
 nw̄enu-a?
 Ii-woru iya haaru
 ̀nwumgboko ibe ngu
 g'̀ephe gude bv̄u ebv̄u?
 6 Ndu agba ngh̄o; ?̀ephe e-kwe
 ngu iya-a ̀onu?
 T̄oo ?̀ephe e-ke iya l'̀ehu l'̀ehu
 g'̀ephe ha agba ngh̄o ̀obu?
 7 ?Ìi-d̄u-a ike gude mkpirikpu
 mkpirikpu igwe
 gbajash̄ia ya akp̄o?
 T̄oo ?̀ii-d̄u ike gude ìkekee
 s̄uwaa ya ishi?
 8 I -byikp̄oo ya ̀eka ebyibyi
 ophu b̄e ìi-nyata-a iphe,
 ḡu l'iya jeru.
 I t̄ii laphubādu iya az̄u
 ememe.
 9 I -dobekp̄oo ̀nya l'ii-mekpe
 iya; maru l'̀oo ̀uka b̄e
 ì dz̄uru.
 I -humakpoo ya n̄u ah̄uma b̄e
 ike bv̄uwaru ngu.
 10 Eshinu ̀ d̄udu onye agirigo,
 n̄o iya l'̀ehu s̄uru
 k̄e g'ò je akpatsu
 ejo-oke-agiyi;
 ?b̄uchia m̄ube Chileke b̄e

nemadzụ sụru k'etso opfu?

11 ?Bụ onye abya asụ l'owa-a
iphe iya, ẹka mu dụ
baa ọ́ ẹ mu pfa ya
ugwo iya?

Noo kele iphemiphe,
no le mgboko bu nkemu.

12 “Mu taa hakwa ọ́ mu ta tu
onu okpa ejo-oke-agiyi ono;
tua onu g'ọ du-be okpehu
ye ọ́ bu-be anu,
du ubvu l'anya.

13 ?Bụ onye sụru iya aswa
akpo?

?Bụ onye a-du ike paru
odogoro eje iya l'iphu
le ya eje iya ya eyeye?

14 ?Bụ onye a-tukponu ama
k'eje iya ajaha onu,
o gude phengara phengara
eze kpo okpokuu
gbaa mgburugburu?

15 Okpurukpu iya be iphe,
kporu iya giriri bu
iphe-mgbobuta-ogu,
nochaa huru ahuru;
bya anoduchaa nwibe iya
ntsentsentse;

16 mbu l'ephe nochaa
onwophentse
shingushingu;
k'opu pherephere te
eshidu mgbaka iya

abahu iya l'ehu.

17 Eṗhe rakubecharu nwibe phe
arakube.

Eṗhe tugbaru nanu k'ophu
a taa tuwadu iya ebo.

18 O -zee uze; icheku-oku
aghashihu.

Eṗnya iya du g'eka enyanwu
keru paa le nchi-abohu.

19 Oku-owa anoduje enwu iya
phoophoophoo l'onu.

Ekoru-oku eshi iya agba
kpitikimu kpitikimu
kpitikimu.

20 Enwuru-oku eshi iya l'imi
akpu tututuutu
g'ite, e shiberu chiru eswa
kuba iya.

21 O -kushi unme l'icheku,
oku adudu l'o gbanwuhu oku;
teme oku, enwu
phoophoophoo nodu
eshije iya l'onu agushihu.

22 Okpehu du iya l'olu;
k'ophu oomeje ge meji tofu iphe,
bukpoo onye humaru iya nu.

23 Igbigirigbi akpo ehuiya
rakugbaerupho l'ehu
nwibe iya;
k'ophu o dudu onye suru
iya arakufu.

24 Okpoma iya kporu
gbengugbengu ge mkpuma;

mbụ l'ọ shihuru ike ọ mkpuma,
eegweje iphe.

25 Ọ -gbalihu agbalihu;
ndzụ erwuta ndu ike ụ.

Ọphe egude ọhu-anmanma
gbaphu azụ.

26 E -gbua ya ogu-echi;
ọ tọ ụdu iphe, oo-me iya;
ọphu ọ ụdu iphe, arwa;
ọzoo ịkekee;
ọzoo agụgu emeje iya.

27 Ịgwè bẹ ọonyajishije g'onye
anyapyashi ọwa.

Ọ nọdu emeje onyirubvu
g'onye eme oshi,
rehuru erehu.

28 Apfụ te emejedu iya g'ọ gbaa
ọso gbala.

Mkpuma ọbo nọdu adujele
iya-a g'ọ bụ udzu,
etsushi ekpu iya.

29 E -chia ya mgboro l'ọ gbẹ ụ
iya g'e chiru iya oshi ọwa.

A -nọdu atụ iya arwa
swiiswiiswii l'ọ chile
iya-a ọchi.

30 Mkputepho iya atụ nkọ
g'igburonu ibiribe mbeji.

Ọ -wụ awụwu l'epuchi l'ọ ụ
g'eka e swiru igwe,
e gude echi ereshi.

31 Ọ -rwuba l'ogbumini l'ọ
phuhu ụphu g'ite,

e shiberu l'òku.
 Teke o rwubaru l'eze-onyimu l'ò
 tsu gbudugbudu g'èka e
 shiberu manu urwazi.
 32 Èka o gbaru bẹ mini asoje
 raa bukahụ ẹbo acha
 kẹ phuuphuu.
 Onye leri ọnya lẹ mini teke
 ono l'ò dobesu l'ogbu-mini
 furu ẹwó.
 33 Ọ tọ dudu iphe,
 du lẹ mgboko-a,
 aatu eyeru iya.
 Ọ bu iphe, e meru dobe
 lẹ mgboko; ophu ndzu
 agujeedu iya.
 34 G'iphe ahahabe l'eli;
 o tọ dudu iphe, ọo-gube iya.
 Ọo ya bu eze l'iphe,
 bukpo iphemiphe,
 eku onwiya ekuku.”

42

1 Tọbudu iya bu; Jobu bya
 eyeeru Chipfu onu
 bya asu iya:
 2 Mu maru-a l'i suru eme
 iphemiphe;
 l'ò tọ dudu iphe, i tọberu
 k'ememe, a byaru
 agbanwe agbanwe.
 3 I jiru su: “?Bu onye woru
 enweru egomunggo

kẹ gube Chileke rwutoshia;
l'ẹbe abụ l'onye ọbu maru
iphe, oopfu?"

Mu kwetakwaru ọ mu shi
epfu iphe, mu amadu
ishi iya;
iphe, du biribiri k'ophu mu
ta asudu iya amaru.

⁴ I pfukwarupho su:
"Ngabekwa nchi;
ge mu bya aja ngu aji.

Ọ kwa g'i zaje mu iya."

⁵ Ọ kwa ọ nchi be mu
shi anumaje aka a tu onu ngu.

Obenu ọ nta-a be mu
humawaru ngu l'anya.

⁶ Noo g'o gude mu lawaro
onwomu ashi.
Izimanu lwawaru mu azu.

Wakwa mu l'ophu l'ime
urwuku yele ime ntu.

Akpochi opfu obu ishi

⁷ Tọbudu iya bu; Chipfu pfuchaa iphemiphe
ono yeru Jiobu bya epfukwarupho yeru Elifazu
onye Temanu su iya: "Ehu eghukwa mu egbu;
ọ buru gu l'onya ngu phe ephenebo kpatsuru
mu iya; kele unu te epfuduru mu iphe, pfuru
nhamunha g'onye-ozu mu, bu Jiobu pfuru. ⁸ Nta-
a bu iphe, unu e-mekwa bu g'unu kputa oke-
eswi esaa; yee ebili esaa jepfu onye-ozu mu, bu
Jiobu g'o gude iya gwee ngweja-akpo-oku nu mu
l'opfu ehu unu. Onye-ozu mu, bu Jiobu epfuru

nụ Chileke l'iswi ẹhu unu; mu anata epfupfu, o pfuru nụ mu. Mu te emeedu unu iphe, mu gege eme unu l'esweswe ono, unu meru ono. Noo kele unu te epfuduru mu iphe, pfuru nhamunha g'onye-ozu mu, bu Jiobu pfuru.”⁹ Noo ya bu; Elifazu onye Temanu; yee Bilidadu onye Shuwa; waa Zofa, bu onye Nama gbeshi bya emee iphe, Chipfu suru g'ephe mee. Jiobu bya epfuru nụ Chipfu; o nata iphe, o pfuru nụ iya.

¹⁰ Tọbudu iya bu; Jiobu bya epfuchaepho nuchaa Chileke l'iswi ẹhu ọnyà iya phe onoya; Chipfu bya emee ya; o byakwa enweru ẹku ọzo. O bya emee ya iphe, bukpo iphemiphe, o shi nweru hakota g'o shi ha ugbo labo. ¹¹ Unwune iya unwoke me unwanyi; mekpoo onyemonye, shi mahawaru iya nụ byaahaa ibe iya ọzo; ephe l'ephe riaha nri ọzo. Ephe kpoharu iya iphu; duaha ya obu k'iphe-ehuka ono g'o ha, bu iphe, Chipfu shi woru tukobe iya ono. O nodu abujeru onye byatasharu nụ l'ooguderu iya kobo bya egudekwaru iya pho iphe-nchi, e gude mkpola-ododo mee.

¹² Chipfu bya agoru onu-oma nụ Jiobu le ndzu ophu o mechaaru nofua eme le ndzu ophu o vuru uzo noo. Aturu, o mechaaru nweru du ukporo unu aturu l'unu iri l'ise. Inya-kamelu du unu iri l'ise. Eswi iya, e jigbaru ebo ebo du unu ise. Nkapfu-igara du unu labo l'ukporo iri. ¹³ O nwuta unwoke esaa bya anwuta unwanyi eto. ¹⁴ Okpara iya ke nwanyi be o guru Jiemima bya agua otsota iya Kezaya bya agua k'eto Kerenu-Hapuku. ¹⁵ E -jegbabe ekameka l'ali ono ta adudu eka aahuma onye nwanyi,

mapfuru unwu ada Jiobu lẹ mma. Nna phẹ, bu Jiobu keru iphe, o nweru gbaa phẹ teke o keru iya unwu iya kẹ nwoke.

¹⁶ Gẹ Jiobu jechaaru iphe-ehuka ono bẹ ọ dzufuaru ndzụ nọo ukporo apha ẹsaa. Ọ nọdu ndzụ gude ẹnya hụma unwu iya; yẹe unwu nwanwa iya phẹ; mẹkpoo unwu nwanwanwanwanwa; mẹkpoo nwanwanwanwanwa nwanwa iya. ¹⁷ Tọbudu iya bu; o mechaa nwuhu kakpoo nka karwee akarwe; nọkpoo ikpoto apha, du igwerigwe igwerigwe.

clxxiii

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d